

O Le Liahona



O Se Talatuu o le
Faatuatua mo Tupulaga
i le Lumanai, i. 44

O La Tatou Sini: Faasoa atu le
Talalelei i Tagata e 100, i. 18

E Sili Atu Ona Malolosi i Lo
Mafuie, Afi, po o Matagi, i. 20

Paionia: O Le A le Mea Na
Tuleia i Latou i Luma? i. 24

“MATOU TE ... FAAILOA ATU
LE LOTOFAAFETAI MO
PAIONIA O LE AU PAIA O
ASO E GATA AI I LE
LALOLAGI ATOA O E NA
ASAINA LE GASŪ O LE
TAEAO—MA O LOO SAVALIA
PEA—SE ALA O LE TALALELEI
MO ISI E MULIMULI AI.”

ELDER RONALD A. RASBAND




Mai le "Faatuatua e Tulei ai i Luma," itulau 24.



TALA FAAALIA

12 Au Paia: O Le Tala o le Ekalesia—Mataupu 5: Ua Maumau Mea Uma

Ina ua maea le amataga o le faaliliuina o papatusi faatasi ma le fesoasoani a Matini Harisi, na feagai Iosefa ma taunuuga o lona faatagaina o laupepa na aveese atu ma ona lima.



I LE FAAVAA
Ata na tusia e David Green.

18 O Le Auala Tatou te Manuia ai i le Faasoaina Atu o le Talalelei

Saunia e Never Chikunguwo
A tatou setiina ma le faamaoni ni sini e aumai isi ia Keriso, o le a faamanuiaina i tatou i ni vavega.

20 Ia Aua Ne'i o Tatou Toilalo e Lagonaina

Saunia e Elder Jorge F. Zeballos
I se lalolagi o loo i ai se pisapisao faifai pea, e tatau lava ona tatou faalogo atu i le leo filemu ma le itiiti ia iloa ai le finagalo o le Tama.

24 Faatuatua e Tulei ai i Luma

Saunia e Elder Ronald A. Rasband
Sa lavatia e o tatou tuua paionia faigata sili ona ogaoga a o latou saili e faapotopoto i Siona.

30 Tausisi i le Faatuatua i le Tulaga e Tu ai Nao Oe

Saunia e Ryan W. Saltzgjver
E ui i le leai o se falelotu e oo lava i se uarota, ae sa galulue malolosi nei Au Paia e faatu le Ekalesia i o latou nuu moni.

36 E Suia e le Tusi a Mamona Olaga

Ua faasoa mai e Tagata Liliu Mai le auala na fesoasoani ai le Tusi a Mamona ia i latou e talia le talalelei.

MATAGALUEGA

4 O Atatosi o le Faatuatua: Victor Barbinyagra

6 Mataupu Faavae mo le Auaunaga: Aapa Atu ma le Agaalofo

10 I le Pulelaa: O le Iloaina Pe o Ai Oe—ma Pe o Ai na Avea ai Lava Oe i Taimi Uma
Sheri L. Dew

40 O Leo o Le Au Paia o Aso e Gata Ai

80 Seia Tatou Toe Feiloai: E Aumai e le Tusi a Mamona le Anoanoai o Faamanuiaga
Saunia e Peresitene Ezra Taft Benson



44

44 O Malaga e Tolu a Paionia o Onapo Nei

Saunia e Sarah Keenan

E pei lava ona sa faia e paionia anamua, o le auai i le Ekalesia i aso nei e aofia ai le lototele ma le ositaulaga.

48 Lagona le Motusia o Fesootaiga? Taumafai e Faalemu

Saunia e Charlotte Larcabal

Sa ou iloa ina o le saosaoa, ma le lavelave o lo'u ala o le olaga sa faataumamao ina a'u mai le Atua.



Vaai pe mafai ona e mauaina le Liahona o loo natia i le lomiga lenei. Faaitete: O le a le galuega a lou tama matua?



59

50 Taulimaina o Fesili Faigata: 3 Mataupu Faavae e Mafai ona Fesoasoani

O le faia o fesili i se ala sili e faamalosi ai lau molimau, ma liliu atu ai i le Alii mo ni tali o le a mafai ai ona fesoasoani atu le Agaga ia te oe.

54 Ina ua Faigata le Auauna Atu

Saunia Lyka T. Valdez

O le auauna atu i lo'u tama matua sa le'i faafiafiaina—seia oo ina ou suia o'u uiga.

56 7 Motugā'afa mo le Tuuina atu o se Lauga

Saunia e Sarah Hanson

O le lauga atu i le lotu e mafai ona taufaafefe! Ae e mafai ona e faaao-gaina nei motugā'afa e saunia ai ma tuuina atu se lauga mataalia.

58 Sauniuniga o le Olaga: O A Mea Tatou Te Faia i le Malumalu?

60 O Se Tulaga o ni Lagona Faanoanoa o le Sapati

Saunia e Alyssa Nielsen

Sa ou aoao le auala na mafai ai ona ou amata tulimatai atu i le aso Sapati nai lo le faafefefefe i ai.

62 Pepa Lautele o I Ai se Savali: Faasologa o Taaloga

63 O Le Upu Mulimuli: E Mafai ona E Agavaa mo le Malumalu

Saunia e Elder Quentin L. Cook



68

64 O Le Malaga a Isapela

Saunia e Jessica Larsen

O le malaga o le a umi, ae sa iloa e le aiga o Isapela o le malaga i le malumalu o le a tauia lea.

66 O Matua Matutua Lelei

Saunia e Jenna Koford

Sa popole lava Andrew i le aso a lana vasega o le Aumai-se-Matua-i-le-Aoga.

68 Ua I'u Lava [Ina Maua] se Aiga e Faavavau

Saunia e Jane McBride

Sa fiafia Mia i le lagona mafanafana sa ia maua i le fale o lana uo o Zoey.

70 Faasusulu Atu Lou Malamalama: O Se Ou ma se Faifeautalai

72 Ua Molimau Aposetolo e uiga ia Keriso

Saunia e Elder Gary E. Stevenson

73 O Le Kalapu Faitau o le Tusi a Mamona: Helamana 5:12

74 O La Tatou Itulau

75 Kata o Toa o le Feagaiga Tuai

76 Tala o Tusitusiga Paia: Hana ma Samuelu
Saunia e Kim Webb Reid

79 Itulau e Valivali: E Mafai ona Ou Faasoa Atu i Isi

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Russell M. Nelson,
Dallin H. Oaks, Henry B. Eyring

O Le Korama a Aposetolo e Toasefululua:

M. Russell Ballard, Jeffrey R. Holland, Dieter F. Uchtdorf,
David A. Bednar, Quentin L. Cook, D. Todd Christofferson,
Neil L. Andersen, Ronald A. Rasband, Gary E. Stevenson,
Dale G. Renlund, Gerrit W. Gong, Ulisses Soares

Faatonu: Hugo E. Martinez

Faatonu Lagolago: Randall K. Bennett, Carol F. McConkie

Fautua: Brian K. Ashton, Bonnie H. Cordon, LeGrand R.
Curtis Jr., Edward Dube, Sharon Eubank, Donald L.
Hallstrom, Douglas D. Holmes, Erich W. Kopischke

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: Adam Olson

Pule Faatonutonu Lagolago: Ryan Carr

Lagolago o Lomiga: Francisca Olson

Au Tusitusi ma Faatonutonu: Maryssa Dennis, David
Dickson, David A. Edwards, Matthew D. Flitton, Lori Fuller,
Garrett H. Garff, LaRene Porter Gaunt, Jon Ryan Jensen,
Charlotte Larcabal, Michael R. Morris, Eric B. Murdock,
Sally Johnson Odekirik, Joshua J. Perkey, Jan Pinborough,
Richard M. Romney, Mindy Selu, Chakell Wardleigh,
Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,
Mandy Bentley, C. Kimball Bott, Thomas Child,
David Green, Colleen Hincley, Eric P. Johnsen,
Susan Lofgren, Scott M. Mooy, Emily Chieko Remington,
Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Julie Burdett, Thomas G. Cronin,
Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufatufaga: Troy R. Barker

Mo le okaina o mekasini, alu i le store.lds.org po o le
faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

**Auina atu tusitusiga ma faafesili i luga o le
initonetu** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuuala") e lomlia i le faa-Alepania, Aminia
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Igilisi, Esitonia,
Fiti, Finelani, Farani, Siamani, Eleni, Hanikeri, Initu, Iselani,
Initonesia, Italia, Iapani, Kiripati, Korea, Lativia, Litunia,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faaifogofeina), Silovenia,
Sipaniolo, Suetena, Swahili, Tagaloka, Tahiti, Tai, Toga,
lukureini, Urutu, ma Viatename. (E eseese lava gagana.)

© 2018 Puletaofia e le Intellectual Reserve, Inc. Ua taofia
aia tatau uma. Lomia i le Iunaita Setete o Amerika.

Faamatalaga o le Puletaofia: Vagana ua faailoa atu,
e mafai e tagata taitoatasi ona kopiina anomea mai le
Liahona mo lo latou faaaogaina patino, ma le saili tupe
(e aofia ai mo valaauga o le Ekalesia). O lenei aia tatau
e mafai ona faaleaogaina i soo se taimi. O anomea o
mea faitino e le mafai ona kopiina pe afai o o loo faailoa
mai se faasa i le laina o loo i ai ma le faatufugaga.
O fesili mo le Puletaofia e tatau ona faatuatusi mai
i le Intellectual Property Office, 50 E., North Temple
St., FL 13, Salt Lake City, UT 84150, USA; email:
cor-intellectualproperty@ldschurch.org.

For Readers in the United States and Canada:
July 2018 Vol. 42 No. 7. O Le Liahona (USPS 311) Samoan
(ISSN 1045-0947) is published monthly by The Church of
Jesus Christ of Latter-day Saints, 50 East North Temple,
Salt Lake City, UT 84150. USA subscription price is \$10.00
per year; Canada, \$12.00 plus applicable taxes. Periodicals
Postage Paid at Salt Lake City, Utah. Sixty days' notice
required for change of address. Include address label from
a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 507.1.5.2).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

FAAOPOPOGA I LE INITONETI



Faitau tusiga ma auina atu la oe lava
tusiga i le liahona.lds.org



Sue savali musuia e mafai ona
faasoa atu (i le gagana Peretania,
Potukale, ma le Sipaniolo) i le
[facebook.com/liahona](https://www.facebook.com/liahona).



Auina mai finagalo faaalua i le
liahona@ldschurch.org



Ia lesitala i le store.lds.org
Po o le asiasi i se faletusi autu, fesili
atu i taitai o le uarota, pe valaau i le
1-800-537-5971 (I.S, ma Kanata).

AIKONA MAILE GETTY IMAGES

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 20, 68

Aiga, 62, 64, 66, 68

Alofa Mama, 6

Aso Sapati, 56, 60

Auauna atu, 6, 54

Faaitaiga, 40, 41, 70

Faatuatua, 30, 40, 43

Faauga, 68, 70, 75

Faigata, 24, 43

Fetufaaiga, 79

Fiafia, 4

Galuega faafaifeautalai,
18, 70

Iesu Keriso, 60, 72

Iosefa Samita, 12

Liua, 18, 36, 42, 44

Lotonuu, 30, 75

Malumalu, 58, 62, 63,
64, 74

Paionia, 24, 30, 44

Papatisoga, 74

Salamo, 63

Suesue i tusitusiga paia,
48, 50

**Talafaasolopito o le
Ekalesia,** 12

Tama Faalelagi, 20, 48

Tatalo, 20, 48, 50, 76

Taulaga, 44, 64

to'a, 10

Tusi a Mamona, 12, 36,
73, 80

Upumoni, 50





O ATATOSI O LE FAATUATUA

Sa vave fanau mai Victor toe tolu masina oo i le aso sa tatau ona fanau ai. I se tau-nuuga, sa tele ni ona le atoatoa faaletino, ma sa le mafai ai ona savali seia oo ina fitu tausaga le matua. E ui i luitau o loo feagai ma ia, ae ua filifili Victor ina ia ave ma se tagata fiafia. Ua ia mauaina le olioli i le aapa atu ma faaali atu le alofa i isi.

LESLIE NILSSON, TAGATA PUEATA

Victor Barbinyagra

Kiev, Iukureini

E i ai ni o'u faafitauli, e pei lava o isi tagata uma. E le tetelē pe laiti tele, ma e ui atonu e le mafai ona tatou foiaina na mea i le 100 pasene, ae ou te iloa e mafai ona tatou taulimaina faatasi o tatou faafitauli ma mafai ona tatou agai i luma ma le mautinoa.

Ona o le Ekalesia, ou te iloa e mafai ona e fiafia e tusa lava po o le a, ona o le fuafuaga a le Atua o se fuafuaga o le fiafia. Ou te talitonu o le fiafia o se mea e i ai i totonu o i tatou, e le o fafo.

O le fiafia e sau mai le mauaina o le faatuatua, faalagolago i le Atua, ma ola i le talalelei. Ua fesoasoani lenei mea ia i tatou ia maua le uiga sa'o ma faaoga mea ua tatou maua e faaleleia atili ai i tatou lava.

SAILI NISI MEA

Tagai mo nisi mea e uiga i le malaga o le faatuatua a Victor i le liahona.lds.org

Asiasi i le "Ata o le Faaolataga" i le lds.org/topics e iloa ai pe faapefea ona fesoasoani le ata o le faaolataga ia i tatou ia maua le fiafia.

Mataupu Faavae mo le Auaunaga AAPA ATU MA LE AGAALOFA

*A o e mulimuli i le faataitaiga a le Faaola o le agaalofo,
o le a e iloa ai e mafai ona e faia se eseese i olaga o isi.*

O le agaalofo o le nofouta lea i mafatiaga o isi faatasi ai ma se manao ia faamāmā pe tuuititia. O se feagaiga e mulimuli i le Faaola o se feagaiga lea o le agaalofo e “tauave avega a le tasi” (Mosaea 18:8). O se tofiga e vaavaaia isi o se avanoa lea e auauna atu ai e pei ona faia e le Alii: faatasi ai ma le “[alofa] ma ia faatatau” (Iuta 1:22). Na poloai mai le Alii, “Ia agalelei ma alofa o le tasi i le tasi” (Sakaria 7:9).

O Le Agaalofo o le Faaola

Sa avea le agaalofo ma se uunaiga malosi i le galuega a le Faaola (tagai i le pa tulimanu: “O Se Faaola Agaalofo”). O lona agaalofo mo Ona uso a tagata na mafua ai Lona aapa atu ia i latou o siomiaina o Ia i le tele o taimi. O le iloaina o mea e manaomia ma manaoga o tagata, sa mafai ai ona Ia faamanuiaina i latou ma aoao atu i latou i auala ia na sili ona taua ia i latou. O le finagalo o

le Faaola e sii ae i tatou i luga ae o o tatou mafatiaga na taitai atu ai i le galuega tupito o le agaalofo: o Lana Togiola mo agasala ma mafatiaga o tagata.

O lona gafatia e tali atu i manaoga o tagata o se mea lea e mafai ona tatou tau-mafai i ai ao tatou auauna atu. A o tatou ola amiotonu ma faalogo i musumusuga a le Agaga, o le a musuiaina i tatou ina ia aapa atu i ni auala anoa.

O La Tatou Feagaiga o le Agaalofo

E finagalo le Tama Faalelagi i Lana fanau ina ia agaalofo (tagai 1 Korinito 12:25–27). Ina ia avea ma soo moni, e tataua ona tatou atiinaeina ma faaali atu le agaalofo i isi, aemaise lava i na manaoga (MF&F 52:40).

O le tauave i o tatou luga o le suafa o Iesu Keriso e ala i la tatou feagaiga o le papatisoga, ua tatou molimau atu ai ua tatou naunau e faatino le agalelei. Na aoao



O mataupu faavae o le auaunaga ua faamoemoeina e fesoasoani ia i tatou e aoao e fetusia'i ai le tasi ma le isi—ae aua ne'i faasoaina atu o se savali. A o tatou iloina i latou tatou te auauna atu i ai, o le a uunaia i tatou e le Agaga Paia ia iloa po o le a le savali latou te ono manaomiaina e faapopo atu i la tatou tausiga ma le agaalofa.

mai Peresitene Henry B. Eyring, Fesoasoani Lua i le Au Peresitene Sili, o le meaalofa o le Agaga Paia e fesoasoani ia i tatou e faia lena mea: “O oe o se tagata o le feagaiga o le Ekalesia a Iesu Keriso. . . .

“O le mafuaaga lena e te maua ai se lagona o le fia manao ia fesoasoani atu i se tagata o loo tauivi e agai i luma a o mamafatu i se avega o le faanoanoa ma faigata. Na e folafola atu o le a e fesoasoani i le Alii ia faamāmāina a latou avega ma ia faamafanafanaina. Ua uma ona tuuina atu ia te oe le mana e fesoasoani ai e faamāmāina na avega pe a e mauaina le meaalofa o le Agaga Paia.”¹

Mo se faataitaiga, o se tuafafine i Rusia sa i ai se tulaga faigata o le aiga lea na taofia mai ai o ia mai le auai i le lotu mo le silia ma le tausaga. Sa aapa atu ma le agaalofa se isi tuafafine i le paranesi i Aso Sa uma i le valaau atu ia te ia e tau atu i ai lauga, lesona, valaauga o misiona, pepe fananau, ma isi talafou o le paranesi. Ina ua foia le tulaga faaleaiga o le tuafafine lea sa nofo i le fale, sa ia lagona le pei sa avea lava o ia ma se vaega o le paranesi ona o valaau faalevaiaso a lana uo. ■

FAAMATALAGA

1. Henry B. Eyring, “O Le Faamafanafana,” *Liahona*, Me 2015, 20.

O SE FAAOLA AGAALOFA

Mafaufau e suesue nisi o mau nei e vaai ai pe na faapefea e le agaalofa o Iesu Keriso ona uunaia o la e faamalolo, faamanuia, ma aoao atu i latou o e na siomiaina o la i le taimi o Lana galuega: Mataio 9:35–38; 14:14; 18:27, 33; 20:30–34; Mareko 1:40–42; 5:19; 6:30–42; 9:22; Luka 7:13; 10:33; 15:20.

E Fa Fautuaga mo le Atiinaeina o le Aagalofa

E ui o le aagalofa e masani lava ona faateleina pe a mavae ona tatou tofo i o tatou foi tofotofoga, e i ai ni mea e mafai ona tatou faia i le asō e atiinae ai le aagalofa. Mafaufau i ni auala e mafai ona e faaoga ai nei mataupu faavae e fa.

Tatalo mo lena mea. A o e ole atu i le Tama Faalelagi, o le a la tatalaina lou loto, ma “o le a e maua se lagona faamaoni o le manatu alofa mo le soifua manuia faavavau ma le fiafia o isi tagata” (*Tala’i La’u Talalelei: O Se Taiala mo le Galuega Faafaifeautalai* [2004], 126; tagai foi Moronae 7:48).

1. Tatalo

Faataitai i ai. E mafai ona e faalia le aagalofa e ala i le faalogo atu ma ia malamalama. Tuu oe i o latou tulaga ma mafaufau pe faapei o latou lagona. Afai e tala-feagai i le tulaga ma le taimi, e mafai ona e ofo atu e faaititia o latou tiga, mafatiaga, po o faanoanoaga.

4. Faauoga

AGAALOFA

2. Faataitai

Ia avea ma se uo patino. O le faalia o le aagalofa e mafai ona faigofie e pei o le faaali atu o se fiafia moni i olaga o tagata. Aoao ia lelei le faalogo (tagai i le “Mataupu Faavae mo le Auaunaga: E Lima Mea e Fai e Tagata e Faalogo Lelei,” *Liahona*, Iuni 2018, 6–9). O le a faateleina lou alofa mo i latou, ma o le a faigofie atu ona iloina auala e faalia ai lena alofa.

3. Uunaiga

Mulimuli i musumusuga. E mafai ona faaali mai e le Alii ia i tatou auala e faalia ai le aagalofa lea atonu tatou te lei iloina e i tatou lava. A e lagonaina se uunaiga mai le Agaga e fesoasoani atu i isi, aua le faatuai le faatinoaina.

ILOAINA PE O AI OE— MA PE O AI E AVEA AI LAVA OE I TAIMI UMA

Saunia e Sheri L. Dew

O lenei faagasologa ua faamamafaina ai olaga o tamaitai tuuto ma a latou savali, na sii mai le tusi *I le Pulelaa: 185 Tausaga o Aoaoga na saunia e Tamaitai o le Au Paia o Aso e Gata Ai* (2017).

Talu ai nei, sa o mai ai Megan e 16 tausaga le matua, o le tama teine a lo'u uso ma ana uo e toalua e momoe i lo'u fale. A o matou savali-vali i lena afiafi, sa fesili mai se tasi o i laua pe faape'i le ola a'e i se faatoaga i aso ua mavae. . . . Sa ou ta'u atu ia Megan ma ana uo o "aso ua mavae," sa matua ou matamuli lava ma sa matua leai lava so'u to'a.

"Na faapefea ona e faatoilaloina na lagona?" Sa fesili mai ai Megan. Sa toetoe lava ou avatu i ai se tamai tali puupuu i lena fesili ae ou tu, ma lagonaina o nei tamaitai talavou maoae na fia iloaina atili nisi mea. O lea sa ou fai atu ai ia i latou o le mafuaaga o se mafuaaga faaleagaga: Sa le'i i ai seia oo ina amata ona ou malamalama i lagona o le Alii e uiga ia te a'u lea sa amata ai ona suia o'u lagona e uiga ia te a'u lava ia ma lo'u olaga. Ona tasoo mai lea o a latou fesili: Na faapefea

ona ou *iloa* pe faape'i lagona o le Alii? Ma na faapefea ona latou iloaina le auala na Ia lagona ai e uiga ia i latou?

Mo ni itula, a o uuina tusitusiga paia, sa matou talanoa ai e uiga i le auala e lagona ai le siufofoga o le Agaga, e uiga i le naunautai o le Alii e faamatuu mai le malamalama o loo teumalu i totonu o o tatou agaga e faatautu pe o ai i tatou ma po o le a le tatou misiona, ma e uiga i le eseese e faia e suiga o le olaga pe a tatou iloaina.

. . . E leai se isi mea e sili atu ona taua i lo tatou tulaga manuia ma lo tatou fiafia iinei nai lo le aoao e faalogo i le siufofoga o le Agaga. O le Agaga lea na te faaali maia ia i tatou lo tatou faasinomaga—e le na o le pe o ai i tatou ae pe o ai e avea ai pea i tatou i taimi uma. Ma a tatou iloaina lena mea, e maua e o tatou olaga se lagona o le faamoemoega e matua mata'ina lava lea e le mafai ai ona



E UIGA IA SISTER DEW

Sa fanau Sheri Linn Dew i Ulysses, Kansas, ISA, i le 1953. O ia o le ulumatua o le fanau e

toalima, ma e oo ifo i le taimi na maea ai lana vasega lima, ua ia aveina se palau i luga o le faatoaga saito a le aiga. I Aso Sa e piki vave ai o ia e lona tina matua o Maudie Dew mo le lotu, lea sa faia i se faletele mautotogi. O i laua e saluina muli sikareti ma apa pia e saunia ai le potu mo le lotu. O le auai ai i se tamai paranesi o lona uiga sa ia faia le tele o lauga ma aoaoga. Sa oo ina avea o ia ma ta piano o le paranesi a o avea o ia ma se tamaitai talavou ma sa auuina atu i lana au peresitene o le Peraimeri o le paranesi ina ua 16 ona tausaga.

I le mavae ai ona maua o lana tikeri i talafaasolopito i le Lunivesite o Polika laga i le 1978, sa ia faigaluega loa o se faatonu i le Bookcraft. Sa ia auai i le Deseret Book i le 1988, ma avea ai ma se sui peresitene i le 2000.

E 35 ona tausaga ae auai i le fono faatonu aoao a le Aualofa i le taimi o peresitene ia Barbara W. Winder. Sa na o le 43 ona tausaga ae avea o ia ma Fesoasoani Lua ia Mary Ellen W. Smoot i le Au Peresitene Aoao o le Aualofa i le 1997.

Sa apoapoi atu Sister Dew i tamaitai ia malamalama i lo latou taua i le taimi o lana lauga i le Konafesi a Tamaitai i BYU 2001, lea o loo sii atu ii (ua faalaugatasia faamamafa).

tatou toe tumau ai i le mea e tasi.

. . . E faananau lava o tatou agaga mo i tatou ia manatua le upumoni pe o ai i tatou, ona o le auala tatou te vaai ai ia i tatou lava, lo tatou lagona o le faasinomaga, e aafia ai mea uma tatou te faia. . . . E aafia ai le auala tonu tatou te ola ai i o tatou olaga. O lea la, o le asō, ou te valaaulia ai outou ia mafaufau loloto i se auala fou e le na o le pe o ai i tatou ae pe o ai e avea ai pea i tatou i taimi uma.

. . . Mata e mafai ona e mafaufauina le Atua o le na silafia atoatoa i tatou, sa faapolopoloina i tatou e o mai i le taimi nei, i taimi ua matua tetele

ai lamatiaga ma faateteleina ai mea faafeagai nai lo se isi lava taimi? O afea Na te manaomia ai tamaitai o ē o le a fesoasoani e tausi a'e ma taitai se tupulaga filifilia i le siosiomaga faale-agaga ua sili ona lamatia? Mata e mafai ona e mafaufau na Ia filifilia i tatou ona sa Ia silafia o le a tatou le fefefe i le fausiaina o Siona?

. . . Malualii ma maoae. Lototele ma naunautai. Faamaoni ma le lē mata-tau. O le tagata lena e i ai oe, ma o le tagata lena e avea ai lava oe i taimi uma. O le malamalama i lena upumoni e mafai ona suia ai lou olaga, ona o lenei malamalama e tauaveina

se to'a lea e le mafai ona faaluaina i se isi lava ala.

. . . A e malamalama na filifilia oe ma faapolopoloina mo le taimi nei, ma a e ola e tusa ma lena misiona, o le a e fiafia atu nai lo se isi taimi muamua.

. . . O le Atua o lo tatou Tama, ma o Lona Alo e Toatasi na Fanau o le Keriso lea. Tau ina ia tatou olioli i le toe tutu atu ma le lototoa mo le Faa-ola ma auauna atu ma le lototele ma le malosi i Lona tovine. Ma ia tatou le matatau lava i le fausiaina o Siona a lo tatou Atua—ona ua tatou iloa pe o ai i tatou ma pe o ai e avea ai lava i tatou i taimi uma. ■







MATAUPU 5

Ua Leiloloa Mea Uma

O le mataupu e 5 lenei o se faamatalaga fou e fa-voluma o le talafaasolopito o le Ekalesia ua faaautuina Au Paia: O Le Tala o le Ekalesia a Iesu Keriso o le Au Paia o Aso e Gata Ai. O le a maua lenei tusi i gagana e 14 ua lolomiina, i le vaega o le Talafaasolopito o le Ekalesia o le polokalama o le Gospel Library, ma i le initoneti i le aupaiia.lds.org. O nai isi mataupu e sosoo ai o le a lolomiina i isi lomiga o le a sosoo ai seia faamatuu mai le voluma 1 i se taimi mulimuli ane o lenei tausaga. O le a maua na mataupu i gagana e 47 i le polokalama o le Gospel Library ma i le aupaiia.lds.org.

I na ua mavae ona aumai e Iosefa ia papatusi auro i le fale, sa tumafai lava tagata su'e oa mo le tele o vaiaso e gaioia. Ina ia tausisia le saogalemu o faamaumauga, sa tatau ona aveesea mai lea nofoaga i lea nofoaga, nana papatusi i lalo o le magalafu, i lalo o le fola o le faleoloa o lona tama, ma i faaputuga saito. Sa matua le mafai ona ia faavaivaia lana puipuiga.

Sa tutu ia tuaoi fiailoa i autafa o le fale ma tauanau o ia e faaali atu ia te i latou papatusi. Sa tumau pea le musu o Iosefa, tusa foi pe ofo atu se tagata e togoti o ia. Sa matua naunau o ia e tausi faalelei ia papatusi, ma le faalagolago i le folafolaga a le Alii afai na te faia mea uma na te mafaia, o le a puipuia lava.¹

O nei mea faalavafau sa tele ina taofia ai o ia mai le suesueina o papatusi ma aoao atili e uiga i le Urima ma le Tumema. Sa ia iloa sa tatau i faaliliu upu ona fesoasoani ia te ia e faaliliu ia papatusi, ae na te lei faaogaina lava ia maa vaai e faitau ai se gagana anamua. Sa naunau o ia e amata le galuega, ae sa lei manino ia te ia pe faapefea ona fai.²

A o suesue Iosefa i papatusi, sa oo ina naunau atu se pule o fanua e faaaloogia i Palamaira e igoa ia Matini Harisi i lana galuega. Sa matua Matini e pei o se tama o Iosefa ma o nisi taimi sa ia faafaigaluegaina ai Iosefa e

fesoasoani i lona fanua. Sa faalogo Matini e uiga i papatusi auro ae sa lei manatu mamafa i ai seia oo ina valaauliaina o ia e le tina o Iosefa ia asiasi atu i lana tama.³

Sa faigaluega Iosefa i le taimi na alu atu ai Matini i le fale, o lea na ia fesiligia ai Ema ma isi tagata o le aiga e uiga i papatusi. Ina ua taunuu atu Iosefa i le fale, sa uu e Matini lona lima ma fesili i ai mo nisi faamatalaga. Sa ta'u atu e Iosefa ia te ia e uiga i papatusi auro ma faatonuga a Moronae e faaliliu ma lolomi ia tusiga o i ai.

“Afai o se galuega a le tiapolo,” sa fai atu ai Matini, “O le a leai ma sa'u mea e faia i ai.” Ae afai o se galuega a le Alii, sa ia manao e fesoasoani ia Iosefa e folafola atu i le lalolagi.

Sa tuu atu e Iosefa ia Matini e sii i luga le pusa o loo loka ai i totonu papatusi. Sa mafai ona iloa e Matini se mea mamafa i totonu, ae sa lei faatalitonuina o ia o se seti o papatusi auro. “E le tatau ona e tuuaia a'u i le le talitonu i lau tala,” sa ia fai atu ai ia Iosefa.

Ina ua taunuu Matini i le fale i le tuneva o le po, sa ia tolotolo lemu atu i lona potumoe ma tatalo ai, ma folafola atu i le Atua na te foai atu mea uma ua ia te ia pe afai e mafai ona ia iloa ina o loo faia e Iosefa se galuega paia.

A o ia tatalo, sa lagona e Matini se leo filemu ma le itiiti o fetalai atu i lona loto. Sa ia iloa ai iina o ia papatusi sa aumai mai le Atua—ma ia iloa ai e ao ona ia fesoasoani atu ia Iosefa e faasoa atu lea savali i le lalolagi.⁴

I le faatausi'usi'uga o le 1827, sa iloa ai e Ema ua ma'i-tagata o ia ma sa tusi atu ai i ona matua. Sa toeitiiti atoa le tausaga talu ona faaipoipo o ia ma Iosefa, ae sa le fiafia pea lona tama ma lona tina. Ae sa malilie le au Hales e faataga

le ulugalii talavou e toefoi atu i Haramoni ina ia mafai ai ona fanau Ema e latalata i lona aiga.

E ui o le a aveesea ai o ia mai ona lava matua ma tei, ae sa naunau lava Iosefa e alu. Sa taumafai pea tagata i Niu Ioka e gaofi ia papatusi, ma o le malaga atu i se nofoaga fou na mafai ai ona maua le filemu ma le faalilolilo na ia manaomiaina e fai ai le galuega a le Alii. Ae paga lea, sa i ai ana aitalafu ma sa leai se tupe e malaga ai.⁵

I le faamoemoe ai ia faatulaga lelei ana mea tautupe, sa alu atu ai Iosefa i le taulaga e totogi nisi o ana aitalafu. A o i ai o ia i totonu o se faleoloa e totogi atu se tupe, sa savali atu Matini Harisi ia te ia. “Uso Samita, o le limasefulu tala lea,” sa ia fai atu ai. “Ou te avatu ia te oe e fai ai le galuega a le Alii.”

Sa popole Iosefa i le taliaina o le tupe ma folafola atu na te toe totogiina, ae sa fai atu i ai Matini e aua le popole fua i ai. O le tupe o se meaalofa, ma sa ia valaau atu i tagata uma sa i ai i totonu o le potu ia molimauina lona tuu atua faameaalofa.⁶

E lei pine, ae totogi e Iosefa ana aitalafu ma uta loa lana taavale toso. Ona la tuua loa lea ma Ema, ma o atu i Haramoni faatasi ma papatusi auro sa natia i totonu o se paelo o fatu pi.⁷

Sa taunuu le ulugalii i le fale tele o le au Hale pe tusa o le vaiaso mulimuli ane.⁸ E lei umi, ae faatonuina e le tama o Ema ia vaai i papatusi auro, ae sa fai atu Iosefa e mafai ona na ona ia faaali atu ia te ia o le pusa sa teu ai. Ma le le fiafia, sa sii i luga e Isaako le pusa e loka ma lagonaina ai lona mamafa, ae sa tumau pea lona masalosalo. Sa ia fai atu ia Iosefa, e le mafai ona teuina le pusa i totonu o le fale vagana ua ia faaali atu ia te ia le mea sa i ai i totonu.⁹

O le i ai o le tama o Ema, o le a le faigofie ona faaliliu, ae sa taumafai Iosefa i le mea sili. Faatasi ma le fesoasoani a Ema, sa ia kopiina le tele o mataitusi uigaese mai papatusi i pepa.¹⁰ Ona, ia taumafai lea mo ni vaiaso, e faaliliuina i le Urima ma le Tumema. Sa manaomia e le faagasologa o ia ia faia nisi mea sili atu nai lo le na ona vaai i totonu o mea faaliliu. Sa tatau ona lotomauualalo o ia ma faaoga le faatuatua a o ia suesueina ia mataitusi.¹¹

I ni nai masina mulimuli ane, sa alu atu ai Matini i Haramoni. Sa ia fai mai na ia lagona ua valaauina e le Alii ia malaga i le Aai o Niu Ioka ia feutagai ma tagata

atamamai faapitoa i gagana faaanamua. Sa faamoemoe o ia e mafai ona latou faaliliuina ia mataitusi.¹²

Sa kopi e Iosefa nisi mataitusi se tele mai papatusi, tusi i lalo lana faaliliuga, ma tuu atu le pepa ia Matini. Ona vaavaai atu lea o ia ma Ema a o agai atu le la uo i sasae e feutagai ma le au sikola lauiloa.¹³

Ina ua taunuu atu Matini i le Aai o Niu Ioka, sa ia alu atu e vaai ia Charles Anthon, o se polofesa o le FaaLatina ma le FaaEleni i le Kolisi o Kolomupia. O Polofesa Anthon o se tagata talavou—pe tusa ma le sefululima tausaga e laitiiti ai ia Matini—ma sa sili ona lauiloa i le lolomiina o se tusi talaaga lauiloa e uiga i le aganuu FaaEleni ma le FaaRoma. Sa amata foi ona ia aoina ia tala e uiga i Initia Amerika.¹⁴

O Anthon o se sikola e le finau’ia ma e musu e faala-

velaveina, ae sa ia talia Matini ma sa ia suesueina ia mataitusi ma le faaliliuga na saunia e Iosefa.¹⁵ E ui sa le iloaina e le polofesa le FaaAikupito, ae sa ia faitauina ni nai suesuega e uiga i le gagana ma sa ia iloa foliga o lea gagana. I le tagai ai i mataitusi, sa ia vaai ai ni mea talitutusa ma le FaaAikupito ma tau atu ai ia Matini sa sa’o le faaliliuga.

Sa toe faaali atu e Matini nisi mataitusi, ma sa suesueina e Anthon. Sa ia fai mai o loo i ai ni mataitusi mai le tele o gagana faaanamua ma tuu atu ai ia Matini se tusi faamaonia e faamaonia ai

lo latou moni ma le faamaoni. Sa ia fautuaina foi ia faaali atu [e Matini] ia mataitusi i se isi tagata atamai e igoa ia Samuel Mitchell, lea sa faiaoga muamua i Kolomupia.¹⁶

“O ia o se tagata sili ona atamai i nei gagana faaanamua,” sa fai atu ai Anthon, “ma ou te le masalosalo lava o le a ia mafai ona tuu atu ia te oe sina faamalieloto.”¹⁷

Sa tuu e Matini le tusi faamaoni i totonu o lana taga, ae a o ia savali ese atu, sa toe valaau atu Anthon e toe foi atu. Sa ia manao ia iloa pe na faapefea ona maua e Iosefa ia papatusi auro.

“O se agelu a le Atua,” sa fai atu ai Matini, “na faaali atu ia te ia.” Sa ia molimau atu o le faaliliuga o papatusi o le a suia ai le lalolagi ma laveai ai mai le faafanoga. Ma o lea la ua i ai ia te ia lo latou moni faamaoni, ua ia faamoemoe ai e faatau atu lana faatoaga ma foai atu tupe ina ia lolomiina ai le faaliliuga.

“Se’i ou toe vaai lava i lena tusi faamaonia,” sa fai atu ai Anthon.

Sa tago atu Matini i lana taga ma tuu atu ai ia te ia. Sa saesae ninii e Anthon ma fai atu e leai se mea faapena ua taua o auauunaga a agelu. A faapea e manao Iosefa e faaliliu ia papatusi, e mafai ona ia aumaia i Kolomupia ma tuu atu i se tagata atamai na te faaliliuina.

Sa faamalalama atu i ai e Matini o loo faamaufaailogaina se vaega o papatusi ma e le o faatagaina Iosefa na te faaali atu i se tasi.

“E le mafai ona ou faitauina se tusi ua faamaufaailogaina,” sa fai atu ai Anthon. Sa ia lapataia Matini e masalo o loo faavalea o ia e Iosefa. “Ia faaeteete i tagata pepelo,” sa ia fai atu ai.¹⁸

Sa tuua e Matini ia Polofesa Anthon ma valaau atu ia Samuel Mitchill. Sa talileleia ia Matini ma le faaaloalo, faalogo atu i lana tala, ma tagai i mataitusi ma le faaliliuga. Sa le malamalama i ai o ia, ae sa ia fai atu o ia tusitusiga ua faamanatu atu ai ia te ia ia ata mamanu o tusitusiga faaAikupito anamua ma o ni tusitusiga o se malo ua tafisea.¹⁹

Sa tuua e Matini le aai i sina taimi puupuu mulimuli ane ma toefoi atu i Haramoni, ua matua faatalitonuina nai lo se isi lava taimi faapea o loo ia Iosefa ia papatusi auro ma le mana e faaliliu ai. Sa ia faamatala atu ia Iosefa ana talanoaga ma polofesa ma le faaiuga afai e le mafai e nisi o tagata sili ona atamamai i Amerika ona faaliliuina le tusi, e ao la ona faia e Iosefa.

“Ou te le mafaia,” sa fai atu ai Iosefa, sa lofituina i le galuega, “aua e le i aoaoina au.” Ae sa ia iloaina sa saunia e le Alii faaliliu upu ina ia mafai ona ia faaliliuina papatusi.²⁰

Sa malie i ai Matini. Sa ia fuafua e toe foi atu i Palamaira e faatulaga lana pisinisi, ma toe foi vave atu e fai ma tusiupu a Iosefa.²¹

Ia Aperila 1829, sa nonofo Ema ma Iosefa i se fale i talaane o le Vaitafe o Susquehanna, e le mamao mai le fale o ona matua.²² E ui ina sa lei malosi lelei i lona maitaga, ae sa tele taimi na avea ai Ema ma tusiupu ia Iosefa ina ua amata ona ia faaliliuina le tusifaamaumau. I se tasi

aso, a o ia faia le faaliliuga, sa faafuasei ona sesega Iosefa. “Ema, pe sa i ai se papuipui na si’o ai Ierusalem?” na ia fesili ai.

“Ioe,” na fai mai ai o ia, i le toe manatuaina o faamatalaga o lena mea i le Tusi Paia.

“Oi,” sa fai atu ai Iosefa ma le toafimalie, “Sa ou popoleina nei faaseseina au.”²³


Sa maofa Ema e lei avea le le lava o le malamalama o lona toalua i le talafaasolopito o tusi paia ma mea e faalavelaveina ai le faaliliuga. Sa toetoe ina a le mafai e Iosefa ona tusia se tusi e onomea. Ae na alu le fia itula o nofo o ia i ona autafa a o ia faalau maia ia faamaumauga e aunoa ma se fesoasoani mai se tusi po o se isi tusiga. Sa iloa e ia [Ema] e na o le Atua e mafai ona musuia o ia e faaliliu e pei ona sa ia faia ai.²⁴

I se taimi, ina ua taunuu ane Matini mai Palamaira ma sui e avea ma tusiupu, na maua ai e Ema se avanoa e malolo ai a o lei fanau mai le pepe.²⁵ Ae sa lei faigofie lana malologa. Sa naunau Lusi, le toalua o Matini la te o ma ia i Haramoni, ma sa malolosi uma uiga patino o le au Harisi.²⁶ Sa masalosalo Lusi i le manao o Matini e lagolago Iosefa i mea tautupe ma sa ita ua alu Matini i le Aai o Niu Ioka e aunoa ma ia. Ina ua tau atu e Matini ia te ia o loo alu i Haramoni e fesoasoani i le faaliliuga, sa ia alu atu ai ma ia, i le fia vaai i papatusi.

Sa amata ona le lelei le faalogo a Lusi, ma a le mafai ona malamalama o ia i mea o loo talanoa ai tagata, o nisi taimi na te mafaufau ai o loo latou faitioina o ia. Sa i ai foi si ona lagona o le faalilolilo. Ina ua musu Iosefa e faaali atu ia te ia papatusi, sa amata ona ia su’eina le fale, su’eni solo fata, kapoti, ma pusatu a le aiga, ma le faamoemoe e maua ai. Sa tau leai se filifiliga a Iosefa ae nana papatusi i le togavao.²⁷

E le’i leva ae tuua e Lusi le fale ae alu nofo i se tuaoi. Sa toe maua e Ema ana fata ma kapoti mo ia lava, ae ua fai Lusi i tuaoi, o Iosefa o se taufaavalea o loo manao i tupe a Matini. Ina ua mavae se vaiaso o le faatupu vevesi, sa toe foi ai loa Lusi i Palamaira.

Faatasi ma le toe mauaina o le filemu, sa vave ia faaliliuga a Iosefa ma Matini. Ua faatupulaia le silafia o Iosefa i lana matafaioi paia o se tagatavaai ma le talifaaaliga. I le



O kopi tonu o mata’itusi mai papatusi o le Tusi a Mamona.

faaogaina o mea faaliliu upu po o se isi maa vaai, sa mafai ai ona ia faaliliu papatusi pe sa i ona luma po o afifi foi i se tasi o ie lino a Ema i luga o le laulau.²⁸

Mai ia Aperila, Me, ma le amataga o Iuni, sa faalogo ai Ema i le fati o le faalauina e Iosefa o faamaumauga.²⁹ Sa ia talanoa lemu ae manino, taofi mai lea taimi i lea taimi e faatali mo Matini e fai atu “ua tusia” pe a uma ona ia tusia mea na faalau atu e Iosefa.³⁰ Sa soloa’i atu foi Ema e fai ma tusiupu ma sa maofa i taimi e faalavelaveina ai faapea ma malologa, e toe sosoo ai lava e Iosefa mai le mea na gata ai e aunoa ma le tau faamanatu atu i ai.³¹

Sa lei pine ae oo i le taimi e fanau mai ai le pepe a Ema. Sa oo ina mafafia le faaputuga o itulau o tusitusiga, ma sa oo ina faatalitonuina Matini afai e mafai e lona toalua ona faitauina ia faaliliuga, o le a ia iloa lona taua, ma tuu ai le faalavelave mai i le la galuega.³² Sa ia faamoemoe foi o le a fiafia ai Lusi i le auala o loo ia faaaluina ai lona taimi ma tupe e fesoasoani ai e aumai le afioga a le Atua.

I se tasi aso, sa talosaga ai Matini ia Iosefa mo se faatagaga e ave ai tusitusiga i Palamaira mo ni nai vaiaso.³³ O le manatuaina o mea na faia e Lusi Harisi i le taimi na asiasi ane i le fale, o lea sa masalosalo ai Iosefa i lea manatu. Ae na ia manao e faamalie ia Matini, o le sa talitonu ia te ia i le taimi na matua toatele ai nisi na le talitonu i lana upu.³⁴

I le le mautinoa ai po o le a le mea e fai, sa tatalo ai Iosefa mo se taitaiga, ma sa ta’u atu i ai e le Alii e aua ne’i tuua Matini e ave itulau.³⁵ Ae sa mautinoa lava e Matini o le faaali atu o itulau i lona toalua o le a suia ai mea, ma na ia augani atu ai ia Iosefa e toe ole atu. Sa faia lava e Iosefa, ae o le tali lava e tasi. Peitai, sa toe uunai e Matini o ia e toe ole atu mo le taimi lona tolu, ma o le taimi la lea na faataga ai loa e le Atua i la’ua e fai le mea la te mananao ai.

Sa ta’u atu e Iosefa ia Matini e mafai ona ia aveina itulau mo le lua vaiaso pe afai na te osi feagaiga e lokaina ma faaali atu tau lava na o tagata faapitoa o lona aiga. Sa faia e Matini le folafolaga ma toe foi atu i Palamaira, ma tusitusiga i lona lima.³⁶

Ina ua alu Matini, sa faaali atu Moronae ia Iosefa ma aveese ia mea faaliliu upu mai ia te ia.³⁷

O le aso na sosoo ai ma le alu ese atu o Matini, na feagai ai Ema ma se tiga ogaoga ma sa fanauina ai se tama. Sa auvaivai ma ma’i le pepe ma sa lei umi se taimi na ola ai. Sa tuua ai e lenei mea Ema i se tulaga mafatia tele faaletino ma faalelagona, ma mo se taimi sa foliga mai ai e ono oti foi o ia. Sa tausi o ia e le aunoa e Iosefa, ma sa le’i tuua lava ona autafa mo se taimi umi.³⁸

Ina ua mavae vaiaso e lua, sa amata ona toe malosi Ema, ma liliu atu ona manatu ia Matini ma tusitusiga. “Ua lagona lava lo’u atuatuva tele,” sa ia fai atu ai ia Iosefa, “ua le mafai se malolo ma e le mafai lava ona maua se to’a seiloga ua ou iloa po o le a se mea ua fai e Matini i [tusitusiga].”

Sa ia augani atu ia Iosefa e su’e Matini, ae sa le manao Iosefa e tuua o ia. “Aami lo’u tina,” sa ia fai atu ai, “e sau ma te nonofo a o e toesea ai.”³⁹

Sa tietie atu Iosefa i se taavale solofanua i matu. Sa na o sina meaitiiti sa ‘ai ma se moe itiiti i le taimi o le malaga, sa fefe ua ia faatiga i le Alii i lona le faalogo ina ua ia fetalai mai e aua ne’i tuua Matini e ave ia tusitusiga.⁴⁰

Sa oso a’e le la i le taimi na ia taunuu ai i le fale o ona matua i Maniseta. Sa saunia e le au Samita le malu taeao ma auina atu se valaaulia ia Matini ia latou faatasi. E ta ane le valu, ua i ai le taumafataga i luga o le laulau, ae sa lei alu ane Matini. Sa amata ona faatupulaia le le to’a

o Iosefa ma le aiga a o latou faatalitali ai mo ia.

Mulimuli ane, i le mavae ai o le silia ma le fa itula, sa iloa mamao atu ai Matini, o savalivali lemu agai mai i le fale, ma ona mata o loo taulai atu i le auala i ona luma.⁴¹ I le faitotoa o le pa sa ia tu ai, nofo i luga o le pa, ma toso ifo i lalo lona pulou i ona mata. Ona ia sau lea i totonu ma nofo i lalo ma ai e aunoa ma se tala.

Sa vaavaai atu le aiga a o piki i luga e Matini lana sipuni, e pei ua sauni e ai, ona faapa’u lea i lalo. “Ua leiloa lo’u agaga!” sa ia tagi, ma oomi ona taugamata i ona lima. “Ua leiloa lo’u agaga.”

Sa osotu i luga Iosefa. “Matini, ua leiloa ia oe tusitusiga?” “Toe,” sa fai atu ai Matini. “Ua leiloloa, ma ua ou le iloa po o fea.”

“Auoi, lo’u Atua e, lo’u Atua e,” sa oi ai Iosefa, ma uu ana moto. “Ua leiloloa mea uma!”



O le maota o Iosefa ma Ema Samita i Haramoni, Penisilevania.

Sa amata ona ia savali solo i tua ma luma. Sa ia le iloa po o le a le mea e fai. “Toe foi,” sa ia faatonuina ai Matini. “Toe su’e.”

“E le toe aoga,” o le tagi lea a Matini. “Ua uma ona ou sueina nofoaga uma i le fale. Ua uma foi ona ou saeia moega ma aluga, ma ua ou iloa ua leai se mea.”

“E tataua ea la ona ou toe foi atu i lo’u toalua ma lea tala?” Sa fefe Iosefa ne’i oti o ia i lenei tala. “Ma e faapefea ona ou alu atu i luma o le Alii?”

Sa taumafai lona tina e faamafanafana ia te ia. Sa ia fai atu atonu o le a faamagalalo ia e le Alii pe afai e salamo ma le faamaulalo o ia. Ae sa matua tagitu’i Iosefa, matua ita ia te ia lava mo le le usitai i le Alii i le taimi muamua. Sa le manogi se ai mo le aso atoa. Sa ia moe i le po ma alu ai i le taeao na sosoo ai i Haramoni.⁴²

A o vaai atu Lusi i lona alu ese atu, sa matua mamafatu lona loto. Sa foliga mai o mea uma na latou faamoemoe i ai o se aiga—o mea uma na aumaia le olioli i ni nai tausaga ua mavae—ua faafuasei ona mou atu nei.⁴³ ■

O se lisi atoa o galuega ua taua ua maua i le Igilisi i le saints.lds.org.

O le upu Autu i faamatalaga ua faaalai ai faamatalaga faaopoopo i le initoneti i le aupaiia.lds.org.

FAAMATALAGA

1. Joseph Smith—History 1:59; Joseph Smith History, 1838–56, volume A-1, 8, i le *JSP*, H1:236–38 (draft 2); Lucy Mack Smith, History, 1844–45, book 6, [1]–[2]; Knight, Reminiscences, 3.
2. Knight, Reminiscences, 3–4; Lucy Mack Smith, History, 1844–45, book 6, [1]–[3]; Joseph Smith History, circa Summer 1832, 1, i le *JSP*, H1:11.
3. “Mormonism—No. II,” *Tiffany’s Monthly*, Aug. 1859, 167–68; Lucy Mack Smith, History, 1844–45, book 6, [3]–[4]; Joseph Smith History, 1838–56, volume A-1, 8, i le *JSP*, H1:238 (draft 2). **Topic:** Witnesses of the Book of Mormon
4. “Mormonism—No. II,” *Tiffany’s Monthly*, Aug. 1859, 168–70.
5. Joseph Smith History, 1838–56, volume A-1, 8–9, i le *JSP*, H1:238 (draft 2); Knight, Reminiscences, 3; “Mormonism—No. II,” *Tiffany’s Monthly*, Aug. 1859, 170.
6. Lucy Mack Smith, History, 1844–45, book 6, [6]; Lucy Mack Smith, History, 1845, 121.
7. “Mormonism—No. II,” *Tiffany’s Monthly*, Aug. 1859, 170.
8. “Mormonism—No. II,” *Tiffany’s Monthly*, Aug. 1859, 170; Joseph Smith History, 1838–56, volume A-1, 9, i le *JSP*, H1:240 (draft 2).
9. Isaac Hale, Affidavit, Mar. 20, 1834, i le “Mormonism,” *Susquehanna Register*, and *Northern Pennsylvanian*, May 1, 1834, [1].
10. Joseph Smith History, 1838–56, volume A-1, 9, i le *JSP*, H1:240 (draft 2); Knight, Reminiscences, 3.
11. Lucy Mack Smith, History, 1844–45, book 6, [3]; Joseph Smith History, 1838–56, volume A-1, 9, i le *JSP*, H1:240 (draft 2); “Letter from Elder W. H. Kelley,” *Saints’ Herald*, Mar. 1, 1882, 68; taga’i foi i le Mataupu Faavae ma Feagaiga 9:7–8 (Revelation, Apr. 1829–D, i le josephsmithpapers.org).
12. Joseph Smith History, circa Summer 1832, 5, i le *JSP*, H1:15; Knight, Reminiscences, 3. **Topic:** Book of Mormon Translation
13. Joseph Smith History, 1838–56, volume A-1, 9, i le *JSP*, H1:238–40 (draft 2); Joseph Smith History, circa Summer 1832, 5, i le *JSP*, H1:15.
14. MacKay, “Git Them Translated,” 98–100.
15. Bennett, “Read This I Pray Thee,” 192.
16. Joseph Smith History, 1838–56, volume A-1, 9, i le *JSP*, H1:240 (draft 2); Bennett, Journal, Aug. 8, 1831, i le Arrington, “James Gordon Bennett’s 1831 Report on ‘The Mormons.’” 355.
17. [James Gordon Bennett], “Mormon Religion—Clerical Ambition—Western New York—the Mormons Gone to Ohio,” *Morning Courier and New-York Enquirer*, Sept. 1, 1831, [2].
18. Joseph Smith History, 1838–56, volume A-1, 9, i le *JSP*, H1:240–42 (draft 2); Jennings, “Charles Anthon,” 171–87; Bennett, “Read This I Pray Thee,” 178–216.
19. Joseph Smith History, 1838–56, volume A-1, 9, i le *JSP*, H1:244 (draft 2); Bennett, Journal, Aug. 8, 1831, i le Arrington, “James Gordon Bennett’s 1831 Report on ‘The Mormons.’” 355; Knight, Reminiscences, 4. **Topic:** Martin Harris’s Consultations with Scholars
20. Joseph Smith History, circa Summer 1832, 5, i le *JSP*, H1:15; Isaia 29:11–12; 2 Nifae 27:15–19.
21. Lucy Mack Smith, History, 1844–45, book 6, [8]; Joseph Smith History, 1838–56, volume A-1, 9, i le *JSP*, H1:244; Joseph Smith III, “Last Testimony of Sister Emma,” *Saints’ Herald*, Oct. 1, 1879, 289–90.
22. Joseph Smith History, 1838–56, volume A-1, 9, i le *JSP*, H1:244 (draft 2); Isaac Hale, Affidavit, Mar. 20, 1834, i le “Mormonism,” *Susquehanna Register*, and *Northern Pennsylvanian*, May 1, 1834, [1]; Agreement with Isaac Hale, Apr. 6, 1829, i le *JSP*, D1:28–34.
23. Briggs, “A Visit to Nauvoo in 1856,” 454; see also Edmund C. Briggs to Joseph Smith, June 4, 1884, *Saints’ Herald*, June 21, 1884, 396.
24. Joseph Smith III, “Last Testimony of Sister Emma,” *Saints’ Herald*, Oct. 1, 1879, 289–90; Briggs, “A Visit to Nauvoo in 1856,” 454.
25. Joseph Smith History, 1838–56, volume A-1, 9, in *JSP*, H1:244 (draft 2); Isaac Hale, Affidavit, Mar. 20, 1834, i le “Mormonism,” *Susquehanna Register*, and *Northern Pennsylvanian*, May 1, 1834, [1].
26. Lucy Mack Smith, History, 1844–45, book 6, [8].
27. Lucy Mack Smith, History, 1844–45, book 6, [3]–[5], [8]–[9].
28. Lucy Mack Smith, History, 1844–45, book 6, [9]–[10]; Joseph Smith III, “Last Testimony of Sister Emma,” *Saints’ Herald*, Oct. 1, 1879, 289–90.
29. I se tala iloga, sa saunoa ai Ema Samita sa ia galue i le potu lava e tasi sa ia Iosefa ma Oliva Kaotui a o la faamaeaina le faaliliuga i le 1829, ma sa peiseai foi sa ia ai o ia a o galulue faaliliu ia Iosefa ma Matini i le 1828. (Joseph Smith III, “Last Testimony of Sister Emma,” *Saints’ Herald*, Oct. 1, 1879, 290.)
30. William Pilkington, Affidavit, Cache County, UT, Apr. 3, 1934, i le William Pilkington, Autobiography and Statements, Church History Library; “One of the Three Witnesses,” *Deseret News*, Dec. 28, 1881, 10.
31. Briggs, “A Visit to Nauvoo in 1856,” 454; Joseph Smith III, “Last Testimony of Sister Emma,” *Saints’ Herald*, Oct. 1, 1879, 289–90.
32. Tagai i le Lucy Mack Smith, History, 1844–45, book 6, [10]; Joseph Smith History, 1838–56, volume A-1, 9, i le *JSP*, H1:244; Joseph Smith History, circa Summer 1832, 5, i le *JSP*, H1:15; Knight, Reminiscences, 5; ma le Historical Introduction to Preface to the Book of Mormon, circa Aug. 1829, i le *JSP*, D1:92–93.
33. Joseph Smith History, 1838–56, volume A-1, 9, i le *JSP*, H1:244 (draft 2); Lucy Mack Smith, History, 1844–45, book 6, [10].
34. Lucy Mack Smith, History, 1844–45, book 6, [10]–[11]; book 7, [1].
35. Joseph Smith History, circa Summer 1832, 5, i le *JSP*, H1:15.
36. Joseph Smith History, 1838–56, volume A-1, 9–10, i le *JSP*, H1:244–46 (draft 2); Lucy Mack Smith, History, 1844–45, book 7, [1]; Knight, Reminiscences, 5.
37. Joseph Smith History, 1838–56, volume A-1, 9–10, i le *JSP*, H1:244–46 (draft 2).
38. Lucy Mack Smith, History, 1844–45, book 7, [1]–[2]. **Autu:** Joseph and Emma Hale Smith Family
39. Lucy Mack Smith, History, 1844–45, book 7, [1]–[2].
40. Lucy Mack Smith, History, 1844–45, book 7, [2]–[4].
41. Lucy Mack Smith, History, 1844–45, book 7, [5].
42. Lucy Mack Smith, History, 1844–45, book 7, [5]–[7]. **Autu:** Lost Manuscript of the Book of Mormon
43. Lucy Mack Smith, History, 1844–45, book 7, [7]. **Autu:** Lucy Mack Smith

O LE AUALA NA FAAMANUIAINA AI I MA'UA I LE Faasoaina Atu o le Talalelei

I le avea ai ma tagata fou faatoa liliu mai, sa ma le iloa ma lo'u toalua le tele o mea e uiga i le avea ma ni faifeautalai. Ae sa ma setiina se sini e faasoa atu i ni tagata se 100.

Saunia e Never Chikunguwo

Faufautua o Talafaasolopito o le Ekalesia, Zimbabwe

O ma'ua ma lo'u toalua, o Everjoyce, e o mai mai le tamai aai o Mutare, i le tuaoi i sasae o Zimbabwe. I le taimi lava na uma ai ona papatiso i ma'ua ma faamauina, sa vave ona ma fiafia i le faiga o galuega faafaifeautalai. Sa ma faitau e faapea “ua sinasina le fanua ua saunia e selesesele” (MF&F 33:7), ma e ui sa ma le'i iloaina le tele o mea e uiga i le avea ma faifeautalai, ae na tonu ia i ma'ua e manaomia ona ma “sasau atu a [ma'ua] selesaito, ma selesesele ma o [ma'ua] manatu atoa, mafau-fau atoa, ma le malosi atoa.”

O i ma'ua o tagata o le Paranesi a Dangamvura faatoa faatu lava i se tasi o taulaga o Mutare. I lena taimi, i le 1991, sa to'a 25 tagata o le paranesi. Sa le'i pine ae valaauina i ma'ua o faifeautalai o le paranesi. Sa tele ni mea na ma aoaoina mai se ulugalii matutua faamisiona na auuina i le matou eria. O se tasi o fautuaga na la faia o le setiina lea o ni a ma sini.

Sa ma mananao e faasoa atu le talalelei i tagata uma, o lea sa ma setiina ai le sini o le faasoa atu o le talalelei i tagata e toa 100 i le gasologa o le tausaga muamua na avea ai ma'ua ma faifeautalai o le paranesi. Atonu sa leai se ma potomasani, ae sa foliga mai sa moni lava ia i ma'ua. Sa ma faatuatuaina lava o le a fesoasoani mai le Alii ia i ma'ua.

E ala i le usuina o viiga i le Lotu, na ma iloaina ai sa i ai se ma taleni natia mo musika. Sa ma filifili e faaaoaga a ma

taleni, o lea na ma amata pepese ai mo—ma faatasi ma—tagata na faaalia le naunau i le talalelei a o matou feiloai e aoao i latou. Sa faatasi mai le Agaga ma i ma'ua a o ma usuina musika paia, ma sa la pa'i atu i loto o i latou sa ma aoaoina. Sa faapena foi i le savali o le talalelei toefuataina. Sa ma uunaia tagata uma ia auai i le aufaipese a le matou paranesi, ma sa toatele na auai, pe o i latou o nisi o le Au Paia o Aso e Gata Ai pe leai.

A o faatoateleina tagata e aoao e uiga

i le talalelei, sa toatele na ulu atu i vai o le papatisoga.

A o faaauau ai a ma taumafaiga faafaifeautalai, sa ma faaauau foi ona anapopogi ma tatalo mo aiga na auai i le Ekalesia. Sa ma lagonaina foi na molimauina e isi i le nuu ia faataitaiga amiotonu a nei aiga. Sa faateleina valaaulia na ma mauaina e aoao atu ia aiga, ma na faatumuliaina le ma lisi o aoaoga i tagata faaolioli o le ekalesia.

I se taunuuga o le aoaoina ma le ola ai i le talalelei, sa oo ina vavalalata ma agaalofo atili ulugalii faatoa papatisoina. Sa mafai e matua ona lafoai ese tumasani sa le ogatusa ma le aganuu o le talalelei. Sa latou le toe tagofia le ava



O Never ma Everjoyce Chikunguwo



malosi ma le tapaa. Sa latou aoao atu a latou fanau i mataupu faavae sa'o. O le toatele o e na matua tulai atu i mea o le lalolagi i le tuanai ua mafai nei ona taliaina valaauga i le Ekalesia. Sa oo ina avea i latou ma faamanuiaga i le latou paranesi *ma le* latou nuu. Sa aumai e le aao o le Alii se suiga tele i o latou olaga.

E ui sa alia'e se sauaga tele i Mutare i lena taimi, ae sa le'i taofia ai le tuputupu a'e o le Ekalesia. Sa foliga mai a o faatupulaia le au tete, sa faapena foi le aofai o tagata sa mananao e aoao e uiga i le Ekalesia. Mo se faataitaiga, ina ua o mai nana alii o le vaegaau a le malo e suesue le Ekalesia mo ni mease, sa ootia i latou i le Agaga. Sa toatele

na papatiso mulimuli ane ma faauuina i le perisitua.

Faatasi ai ma le fesoasoani a le Alii, sa i'u ai ina ma faasoaina atu le talalelei i tagata e toatele atu nai lo le ma uluai sini. Ona sa ma naunau e saili mo ni auala e mafai ona ma aapa atu ai i isi, sa mafai ai ona ma molimauina se suiga tele i olaga o le toatele i le matou nuu atoa. ■

Faamatalaga a le Faatonu: O le tuputupu a'e vave o le Paranesi a Dangamvura sa le'i pine ae taitai atu ai i le fausiaina o se falesa. Sa salalau atu taumafaiga faafai'feautalai i eria faaopopo, ma i le 1995, sa faatulagaina ai Mutare i se itu faatasi ma ona iunite e valu.





Elder
Jorge F. Zeballos
O Le Fitugafulu

Aua Ne'i o Tatou Toilalo e Lagonaina

*O loo i ai se malosiaga sili atu ona malosi i lo mafuie, matagi matamataita,
po o afi matautia. Ae e filemu ma itiiti, ma e tatau ona tatou gauai atu
i ai pe afai tatou te mananao na te taialaina i tatou.*

I le aso 27 o Fepuari, 2010, i le 3:34 i le vaveao, sa lulu ai ma le matautia se mafuie i le malosi e 8.8 i le fua o le malolosi o mafuie le tele o Chile, sa mafua ai le atuatuvaie, fefe, ma le popole o le faitau miliona o tagata.

I ni nai aso mulimuli ane, sa tofia ai a'u ou te pulefaa-malumu i se konafesi faalesiteki i se nofoaga na latalata i le totonugalemu o lenei mafuie tele. Sa ou tomanatu pe faamata e ono aafia le auai mai o tagata i le konafesi ona o le mafuie ma aafiaga faifai pea ina ua mavae le mafuie. Sa faateia a'u ona o le auai i sauniga taitasi o le konafesi sa sili atu i lo isi konafesi sa faia muamua.

Sa manino lava, sa faamanatu atu e le mafuie i tagata o le siteki, i se tulaga le tumau, e uiga i le taua o le faalatalata atu i le Atua, faapaiaina o le Sapati, ma le auai i sauniga. I ni nai vaiaso mulimuli ane sa ou telefoni atu ai i le peresitene o le siteki. Sa ou fesili i ai pe o maualuga lava le auai i sauniga Lotu. Sa ia tali mai e pei lava ona faaitiitia le aofai ma le malolosi o aafiaga o le mavae o le mafuie, ua faapena foi le faaitiitia o le auai i le lotu.

E faapena foi se amioga na sosoo ma mea faanoanoa na tutupu ia na faatamaia ai le Nofoaga Autu o Fefaatauaiga i le Lalolagi i Niu Ioka, ISA, ia Setema o le 2011. E faitau afe tagata na liliu atu i a latou lotu e saili i ai mo le filemu o le mafaufau ma le mafanafana sa latou manao-miaina. Ae a o mou atu le taimi, sa faaitiitia lea sailiga ma toefoi ai lava mea i tulaga masani. E le o mafuie, matagi,

po o faalavelave ma faafitauli, pe faalenatura pe faale-tagata, e atiaeina le faatuatua, molimau, ma le liuaina tumau.

O Elia ma le Leo Lemu, ma le Itiiti

O aso o le perofeta o Elia, sa avea ai Aapo ma tupu o Isaraelu. Sa faaipoipo atu Aapo ia Iesepela, o se purinise Fenisia (Phoenician [o se ituaiga o Kanana]). Sa ia faailoa atu i tagata Isaraelu ia auala FaaFenisia, e aofia le tapuai atu i tupua. Ina ua uma ona lu'iina e Elia ma faatoilalo faitaulaga a Paala o e na lauolaola i le maota o le Tupu o Aapo, sa faamatau e Iesepela le soifua o le perofeta ma sa ia sola ese atu ai i le togavao. (Tagai i le 1 Tupu 18:4, 13, 19, 21–40; 19:1–4.)

Ina ua mavae ona fafagaina ai e se agelu i le togavao, sa savali ai Elia mo le 40 ao ma le 40 po i le Mauga o Horepa (tagai i le 1 Tupu 19:5–8). I le togavao, na oo mai ai le afioga a le Alii ia Elia. Sa ta'u atu ia te ia e sau i fafo ma le ana lea sa ia nofo ai i le po. A o ia tu ai i luga o le mauga i luma o le Alii, sa tupu ai "o le matagi tetele foi ma le malosi," sa matua malosi lava lea na nuti ai papa ma mauga, "[ae sa] lei i ai Ieova i le matagi." Ona oo mai lea o se mafuie, "[ae sa] lei i ai Ieova i le mafuie." Ona oo mai lea o se afi, "[ae sa] lei i ai Ieova i le afi" (1 Tupu 19:11–12). E ui i le matautia o le matagi, mafuie, ma le afi, sa le o ni faailoaga na o le siufofoga o le Alii i le perofeta.

I le mavae ai o nei faailoaga malolosi o malosiaga o le natura, sa oo mai ai “se leo filemu ma le itiiti” ia Elia, ma sa ia lagonaina (tagai i le 1 Tupu 19:12–13). O le siufofoga mālū o le Alii na ta’u atu ai ia te ia le tagata e faauu e avea ma tupu e sosoo ai o Suria, le tagata e faauu e avea ma tupu e sosoo ai o Isaraelu, ma e tatau ona ia faauuina Elisaia e avea ma perofeta o le a sosoo ia te ia.

Mauaina o le Siufofoga

O le siufofoga lava e tasi lea na oo mai ia Elia—le siufofoga lea na ta’u atu ia te ia le mea e fai i se taimi faigata i lona olaga ma le auaunaga—o loo avanoa pea mo fanau uma a le Atua o e mananao ma le faamaoni e fai le finagalo o le Tama. Ae i le lotolotoi ai o le tele o le mau leo malomaloā faalelalolagi o loo valaauliaina i tatou e o atu i ala pogisa ma fenumiai, o fea tatou te maua ai le leo filemu ma le itiiti lea o le a ta’u maia ia i tatou mea e fai, mea e ta’u atu, ma tagata e finagalo le Atua tatou te avea ai?

Ua fautuaina i tatou e Nifae ia “taumamafa fiafia i afioga a Keriso; aua faauta, o afioga a Keriso o le a ta’u mai ai ia te outou mea uma e tatau ona outou faia” (2 Nifae 32:3).

Ma o fea tatou te maua ai afioga a Keriso ina ia mafai ai ona tatou aai ai? E mafai ona tatou saili atu i tusitusiga paia, ae maise lava le Tusi a Mamona, lea sa tusiaina ma faasao-ina lona mama a’ia’i mo i tatou, o e ‘ainā ai lenei tupulaga. Tatou te faalogo foi i upu a perofeta o aso nei, o e ta’u maia ia i tatou le finagalo o lo tatou Tama Faavavau ma lo tatou Faaola o Iesu Keriso i aso nei.

O upu a perofeta soifua e taialaina i tatou pe a tatou feagai ma ni luitau fou ma lavelave. I tausaga e lei mamao atu, mo se faataitaiga, a o saili atu e le fenumiai masani o le lalolagi ma ana filosofia ia suia tumau le manatu faavae o le faaipoipoga ma le aiga, sa faamamafa mai ma le mausali, lototele, ma le agaalofa e upu a perofeta le natura paia o le aiga, ma folafola mai ai e faapea “o le faaipoipoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Le Foafoa, mo le tau-nuuga e faavavau o Lana fanau.”¹



Ua faamamafa mai foi e perofeta ma aposetolo i aso nei le taua o le tausiga o le Sapati i le aiga ma i le lotu ma le ausiaina o le faaolataga o o tatou tuua e ala i talafaasolopito o aiga ma galuega faalemalumalu. I konafesi aoao uma, latou te tuuina mai le taitaiga faaopoopo faaleagaga mo le Ekalesia.

O Le A Taitai Oe e le Agaga Paia

Ua aoao atili mai Nifae, “Afai tou te ulu atu i le ala, ma maua le Agaga Paia, o le a faaali mai e ia ia te outou mea uma e tatau ona outou faia” (2 Nifae 32:5). O lea la, o le faamalositia o le taua o le saili atu i afioga a Keriso, ua faatuuina ai nei e Nifae i tatou e faatatau i le fesootaiga tuusao faaletagata lava ia e tatau ona tatou maua ma le Agaga Paia, le tagata lona tolu o le Aiga Atua.

Sa iloa lelei lava e Nifae le mea sa ia talanoa ai. Pe a ma se 30 pe 40 tausaga na muamua atu, a o i ai pea lona aiga i le toafa ma sa ia fauina se vaa lea o le a avatu ai i latou i le nuu folafolaina, sa aoai ai e Nifae ona uso ona o le solia o agasala, e ui lava ina ua uma ona faalogo atu i le siufofoga o se agelu.



Sa fai atu Nifae ia i latou, “Ua vave ona oulua fai o le amioletonu ae gese ona oulua manatua o le Alii lo oulua Atua. Ua oulua vaai i se agelu, ma sa fetalai mai o ia ia te oulua; ioe, sa oulua faalogo i lona siufofoga mai lea taimi i lea taimi; ma sa fetalai mai foi o ia ia te oulua i se leo filemu itiiti, peitai ua oulua te’a atu ma le toe lagonaina, na oulua lē mafafai ai ona lagona ana fetalaiga; o le mea lea, na fetalai mai ai o ia ia te oulua e pei o le leo o le faititili, lea na mafua ona luluina ai o le eleele e pei a vaeluaina” (1 Nifae 17:45).

Aua Ne’i o Tatou Tuu le Lagonaina

O fesootaiga a le Atua ma Lana fanau e masani lava ona oo mai e ala i le Agaga Paia, o le e tele ina faia fesootaiga ma i tatou i se leo e ulufale mai i o tatou mafaufau ma loto, “le leo itiiti ma le filemu, lea e musumusumu mai ma ati i mea uma” (MF&F 85:6). Ia tatou faalogo atu i lona siufofoga mālū ma aua ne’i faatalitali seiloga e fetalai mai se tasi ia i tatou i se leo o faititili! Manatua, sa iloa e Elia o le siufofoga o le Alii sa lei i ai i le matagi, mafuie, po o le afi. Sa fetalai atu le Alii ia te ia e ala i le Agaga Paia, o se siufofoga filemu ma le itiiti.

“O le siufofoga o le Agaga e oo mai o se *lagona* nai lo o se leo,” sa saunoa ai Peresitene Boyd K. Packer (1924–2015), Peresitene o le Korama a Aposetolo e Toasefululua. “O le a e iloaina, e pei ona ou iloaina, ia ‘faalogo’ atu i lona siufofoga lea e *lagonaina* nai lo le *faalogoina*. . . .

“. . . O se leo faaleagaga e o’o mai i le mafaufau, e avea o se manatu po o se lagona e tuuina i totonu o lou loto.”²

Tatou te *lagonaina* upu mai le Agaga Paia, e sili atu i lo upu tatou te *faalogoina* i o tatou taliga, i o tatou mafaufau ma loto. Ia aua ne’i o tatou toilalo e lagonaina na uunaiga! Tau ina ia tatou tatalaina o tatou mafaufau ma loto e mauaina upu a perofeta. Tau ina ia tatou faa-tagaina le Agaga Paia e faaauau pea ona aoao i tatou e ala i le leo filemu ma le itiiti. I le aoaoina ai o Ona soo e uiga i le Agaga Paia, lea o le a auina ifo ia i latou pe a mavae ona Ia afio ese atu, sa fetalai atu ai le Faaola ia i latou, “A o le Fesoasoani, o le Agaga Paia lea, e auina mai e le Tama i lo’u igoa, o ia lava na te aoao ia te outou i mea uma lava, e faamanatu mai foi o ia ia te outou i mea uma” (Ioane 14:26).

Ua i ai i tagata faatuatua uma o Le Ekalesia a Iesu Keriso o le Au Paia o Aso e Gata Ai, le aia tatau ma le faamanuiaga o le mauaina o le taitaiga patino, musumusuga, ma faaaliga patino mai le lagi e ala mai i le Agaga Paia.

Sa saunoa mai Peresitene Thomas S. Monson (1927–2018) e faapea: “Ia faatosinaina [oe] e lona leo filemu ma le itiiti. Manatua sa i ai se tasi ua i ai le pule, na tuuina ona lima i luga o lou ulu i le taimi o lou faamauga ma fai atu, “Talia le Agaga Paia.” Tatala o outou loto, e oo lava i o outou agaga, i le leo o lona siufofoga faapitoa lea e molimau mai i le upumoni. E pei ona sa folafola mai e le perofeta o Isaia, ‘E faalogo foi o outou taliga i le upu . . . o faapea mai, O le ala lava lenei, ia outou savavali ai’ [Isaia 30:21].”³ ■

FAAMATALAGA

1. “O le Aiga: O se Folafolaga i le Lalolagi,” *Liahona*, Me 2017, 145.
2. Boyd K. Packer, “Fautuaga i le Autalavou,” *Liahona*, Nov. 2011, 17–18.
3. Thomas S. Monson, “Talitonu, Usitai, ma Tumau,” *Liahona*, Me 2012, 129.

FAATUATUA E TULEI AI I LUMA

Faaaupegaina i se molimau i le Alii o Iesu Keriso, sa tulei atu ai i luma e tagata o le kamupani o taavale tosolima a Willie ma agai atu i faigata ma le matelaina.

O le tala ou te fia faasoaina atu na amata i le nuu maotua lanulauava o Egelani, lea sa fanau ai John Bennett Hawkins i Gloucester i le 1825. Sa papatisoina o ia o se tagata o le Ekalesia i le 1849 ma tuua ai i lena lava tausaga e tasi mo Amerika faatasi ma se vaega o le Au Paia o Aso e Gata Ai i le vaa o le *Henry Ware*. Sa ia taunuu i Iuta ia Aokuso 1852 ma o se tasi o paionia faiu'amea i le popofou o le faato'aina o Iuta.

O lana manamea i le lumanai, o Sarah Elizabeth Moulton, sa sau foi mai se nuu maotua i Egelani. O Irchester o se tamai nuu e latalata i le Vaitafe o Nene, pe tusa ma le 65 maila (105 km) i matu o Lonetona ma pe tusa o le mamao lava e tasi i sasae o Birmingham. Sa fanau mai Sarah Elizabeth iina i le 1837 ia Thomas Moulton ma Esther Marsh. Sa maliu le tina o Sarah Elizabeth ae na o le lua ona tausaga le matua, ma i le 1840 sa toe faaipoipo atu ai lona tama ia Sarah Denton.

Ia Iuni 1837, sa i ai Elder Heber C. Kimball (1801–68) o le Korama a Aposetolo e Toasefululua ma isi taitai o le Ekalesia i Egelani sa faia ni galuega faafaifeautalai. Faatasi ai ma le toatele o tagata liliu mai sa aoaoina e nei faifeautalai, o se aiga sa tuu atu i le au Moulton se kopi o le tamaitusi *A Voice of Warning*, na tusia e Elder Parley P. Pratt (1807–57) o le Korama a Aposetolo e Toasefululua. I le faitauina, sa liua ai Thomas ma Sarah ma papatisoina ai i le aso 29 o Tesema, 1841. I lena taimi, sa na o le toalua le la fanau sa i ai i le aiga—o Sarah Elizabeth, fa tausaga le matua; ma Mary Ann, e fitu masina le matua.

O le agaga o le faapotopotoina sa malosi i loto o tagata liliu mai i Europa. O lo latou manaoga sili o le faimalaga atu lea i Amerika, i le nofoaga e mafai ona latou faatasi ai ma le toatele o le Au Paia. E pei o le toatele o isi, sa lei lava ni tupe i le au Moulton e faatau-nuu ai lenei manaoga. Ae o lo latou naunautaiga sa malosi, ma sa amata ai ona latou sefeina ni tupe i totonu o atigi fagu.

Tupe Faaagaaga mo Femalagaaga

I le 1849, sa faatu ai e Peresitene Polika Iaga (1801–77) le Tupe Faaagaaga mo Femalagaaga e fesoasoani ai i tagata o le Ekalesia e totogi ai femalagaaga i Amerika. O le tagata muamua na malaga i lenei fesoasoani mai lenei tupe sa faia e ala i se vaega o taavale tosolima na malaga faatasi, ae o lenei auala o femalagaaga sa telegese ma taugata. E oo lava i le fesoasoani a le Tupe Faaagaaga mo Femalagaaga, sa toalaiti lava na mafai ona gafatia-ina ai le malaga. Sa suesueina e taitai o le Ekalesia le faaaogaina o taavale tosolima ma iloa ai e sili atu ona televave ma taugofie femalagaaga i taavale tosolima.

Agavale: O Gloucester, Egelani i aso nei, nuu i tua



Saunia e Elder
Ronald A.
Rasband

O Le Korama
a Aposetolo e
Toasefululua



Maa Faamanatu Faalemalo o Scotts Bluff i Nebraska i sisifo, ISA

E oo ifo i lena taimi ua toafitu le fanau a le aiga o Moulton, ae faatasi ai ma le latou teugatupe i le atigi fagu, fesoasoani mai le Tupe Faaagaaga mo Femalagaiga, ma auala taugofie o femalagaiga, sa tino mai ai le latou miti o le malaga atu [i Amerika]. Mo se aiga e toaiva, e manaomia lava se fuafuaga faateete e saunia ai mo le malaga. Ina ia sefeina nisi tupe se tele atu mo faatauga latou te manaomia ona fai, sa na o le falaoamata na latou ola ai mo le latalata i le tausaga atoa.

A o latalata ina oo i le taimi o le latou faigamalaga, sa faatuutuu lava Thomas e fai le malaga ona ua maitaga lona toalua i le la pepe. Ae o Sarah Denton Moulton o se tamaitai o le faatuatua ma sa le mafai ona faavaivai. Ae latou te lei tuua Egelani, sa tuu atu ai e se tasi o faifeautalai ia Sarah se faamanuiaga lea na ia folafola atu ai ia te ia afai o le a alu o ia i Iuta, o le a malaga atu ma le saogalemu e aunoa ma le maumuina o le ola o se tasi o tagata o lona aiga—o se faamanuiaga maoae lea ua folafola atu i se aiga o le a le pine ae atoa le toa 10!

O le aiga, na amata ona folau mai Liverpool, Egelani, i le 1856 i le vaa o le *Thornton*, sa faafeiloai atu i se pepe fou i le na o le tolu aso talu ona alu le faigamalaga. Sa togipau le *Thornton* e aveina le Au Paia e 764 o Tenimaka, Suetena ma Egelani. Sa i lalo i latou o le taitaiga a le faifeautalai e suafa ia James Grey Willies.

Ono vaiaso mulimuli ane sa folau atu ai le *Thornton* i le Uafu o Niu Ioka. Ona malaga atu ai lea o le aiga o Moulton i se nofoaafi ma agai atu ai i se faigamalaga umi i le itu i sisifo. Sa latou taunuu i le Aai o Iowa, Iowa, ia Iuni 1856, o le nofoaga lena na amata ai le malaga a vaega o taavale tosolima. Pe toe tolu aso taunuu atu i latou, ae toe o ese mai le vaega o taavale tosolima a Kapeteni Edward Bunker mai le Aai o Iowa, ma ave uma ai le tele o taavale tosolima na avanoa.

O Faafitauli o Taavale Tosolima

Pe a ma le lua vaiaso mulimuli ane, sa faatasi atu i le vaega a Willie se isi vaega o le Au Paia, i lalo o le taitaiga a Edward Martin. O sui o le Ekalesia i le Aai o Iowa, o e na galulue malolosi e faatotoga ma auina ese atu le uluai vaega e toatolu o taavale tosolima, ua tauivi nei ma le popole e tausi se vaega toatele sa lei faamoemoeina o tagata na tuai ona taunuu atu. Sa ao ia i latou ona fauina ni taavale tosolima se 250 ae lei toe faaauuina e nei Au Paia la latou malaga.

O alii uma malolosi sa faafaigaluegaina e fau ia taavale tosolima, ae o fafine sa faia le tele o faleie mo le malaga. O le toatele o nei tagata fau taavale tosolima sa le lava le tomai sa lei mulimulitai i faatonuga maoti, ae fau taavale tosolima sa eseese le tetele ma le malolosi, ia na mulimuli ane avea ma faafitauli ia i latou. Ona o le manaomiaina, sa moomia ai ona fauina le tele o taavale tosolima sa mai laau mata, ma i nisi tulaga, sa faaogaina ai pa'u povi sa lei faamamagoina ma atigiapa mo pa'u taavale. Sa ave e taavale tosolima taitasi meaa faapea ai foi ma meatotino uma faaletino a le toatele o le Au Paia.

Sa tele lava, o le 400 i le 500 pauna (180 i le 230 kg) o le falaoamata, moega, mea fai kuka, ma lavalava sa uta i luga o taavale tosolima taitasi. Sa na o le 17 pauna (8 kg) o ato a le tagata e toatasi sa faatagaina i luga o le taavale tosolima.

Sa tofia Thomas Moulton ma lona aiga e toa 10 i le vaega o taavale tosolima lona fa, sa toe i lalo foi o le taitaiga a Kapeteni Willie. Sa aofia ai le silia ma le 400 tagata o le Au Paia, faatasi ai ma le faatelega sili atu nai lo le aofaiga masani o tagata ua matutua. O se ripoti sa faia ia Setema o lena tausaga sa lisiina ai le “404 tagata, 6 taavale toso manu, 87 taavale tosolima, o amoga povi e 6, povi e 32, ma asini e 5.”¹



Sa faatagaina le aiga o Moulton e faaaoga se taavale tosolima se tasi ua ufiufiina ma se taavale tosolima matala se tasi. Sa tosoina e Thomas ma lona toalua le taavale sa ufiufiina. Sa tietie ai i totonu le pepe fou o Charles ma lona tuafafine o Lizzie (Sophia Elizabeth) i lenei taavale. Sa mafai ona tietie ai Lottie (Charlotte) i soo se taimi lava sa alu faaifoifo ai le taavale i lalo o le mauga. Sa savali James Heber e valu tausaga i tua atu faatasi ma se maea sa nonoa i lona puimanava e taofia ai o ia mai le se ese. O le isi taavale mamafa sa tosoina e teine matutua e toalua—Sarah Elizabeth (19) ma Mary Ann (15)—ma [o la] tuagane o William (12) ma Joseph (10).

Ia Iulai 1856 sa faatofa atu ai le au Moulton i le Aai o Iowa ma amata ai le latou faigamalaga e 1,300-maila (2,090 km) i le itu i sisifo. I le mavae ai o le 26 aso o le malaga, sa latou taunuu atu ai i Uinita Kuata (Florence), Nebraska. E pei ona masani ai, sa latou faaalu ni nai aso iina, sa toe fonofono taavale tosolima ma toe ave nisi sapolai ona sa leai nisi aai tetele i le va o Uinita Kuata ma le Aai o Sate Leki.

Sa i ai i le tausiusiuga o le vaitau ae lei saunia le vaega a Willie e tuua Uinita Kuata, sa faia se fonotaga e filifili ai pe tatau ona latou o pea pe nonofo ai iina seia oo mai le tautotogo. O nisi sa malaga muamua i lona auala sa lapatai atu ma le malosi ia i latou e tusa ma tulaga lamatia o le faigamalaga i le tausiusiuga o le vaitau. Ae sa lagona e Kapeteni Willie ma le toatele o tagata o le vaega e tatau ona latou o pea ona sa leai ni fale e nonofo ai i le taumalulu i Florence.

Faaitiitia o Meaai

Faatasi ai ma le lava o meaai, sa toe amata ai e tagata o le vaega a Willie le latou faigamalaga i le aso 18 o Aokuso, ma le manatu e mafai ona toe faatumu a latou

sapolai i Fort Laramie (i matu i le mea ua i ai nei Laramie, Wyoming). Ona o le lapataiga na latou maua, sa latou tuu ai se isi 100 pauna faaopoopo (45 kg) o taga falaoamata i totonu o taavale tosolima taitasi ma faatuatuaina o le a latou feiloai ma taavale toso o sapolai na auina mai mai le Aai o Sate Leki. Peitai, o e na aveina taavale toso o sapolai, na manatu ua le o toe i ai nisi tagata malaga i luga o le alasopo, o lea sa toe foi atu ai i le Aai o Sate Leki i le faaiuga o Setema, a o lei taunuu atu le vaega a Willie ia i latou.

I Florence, sa manatu ai le au Moulton o se fuafuaga lelei le tuuese o se pusa o sapolai ona o le uta sa latou tosoina mo se aiga e toa 10 sa mamafa tele. I lona taimi, sa latou tuua ai se atopa'u i le uafu i Liverpool, o se pusa lavalava i luga o le vaa, o se pusa lavalava i le Aai o Niu Ioka, ma se pusa o sapolai sa i ai le tele o a latou meatotino i le Aai o Iowa. E oo lava i le alasopo, sa latou tagai mo ni auala e faamamā ai le latou avega.

E faigata mo i latou o e olioli i tulaga mafanafana uma o le olaga o aso nei le mafaufau i faanoanoaga o aso uma o le aiga o Moulton ma isi alii ma tamaitai ofoofogia o na vaega o taavale tosolima. Faamata e mafai ona tatou mafau-fauina lima ma vae mafoefoe, o maso tiga, le pefu ma le palapala, mu i le la, o lagona ma namu, taufetuliga a lafu pafalō, ma fetaiaga ma tagata Initia? Faamata e mafai ona tatou mafaufauina le asaina o vaitafe ma faigata o le one-one ma papa maseese a o latou taumafai e avatu taavale tosolima i vaitafe tatafe pe loloto? Faamata e mafai ona tatou malamalama i le vaivai e oo mai i le lava o meaai?

I taimi o a latou malaga, sa o atu ai le fanau a le au Moulton ma lo latou tina ma ao mai saito vao e faaopoopo ai meaai i a latou sapolai na vave ona faaitiitia. I se tasi taimi sa na o le tasi le falaoa saito ma le apu e tasi i le aso mo tagata taitoatolu.



Vaitafe o Sweetwater e latalata i le Āna o Martin, Wyoming, ISA

A o lei goto le la i le aso 12 o Setema, sa toe foi ane se vaega o faifeautalai mai le Misiona a Peretania ma taunuu atu i le toluapiga. Sa taitaia i latou e Elder Franklin D. Richards (1821–99) o le Korama a Aposetolo e Toasefululua, o le tama o le tama o le tina o le tina o lo'u toalua. Ina ua vaai atu Elder Richards ma isi i faigata o le vaega o taavale tosolima, sa latou folafola atu o le a faananati atu i le Vanu o Sate Leki ma auina mai se fesoasoani i le vave e mafai ai.

I le aso 30 o Setema, sa taunuu atu ai le vaega a Willie i Fort Laramie, Wyoming, 400 maila (645 km) i sasae o le Aai o Sate Leki.

I le amataga o Oketopa, na oo mai ai le taumalulu, ma faateteleina ai faigata a o taumafai le vaega e fetaomi atu i luma. Sa faaitiitia meaai lea sa faamalosi ai Kapeteni Willie e tipi i lalo vaega o meaai i le 15 aunese (425 g) o falaoamata mo alii, 13 aunese mo tamaitai, 9 aunese mo tamaiti, ma le 5 aunese mo pepe. Sa lei pine ae fetaiai i latou ma matagi malolosi ma le mafiafia o le kiona. E oo ifo i le taeao o le aso 20 o Oketopa ua 4 inisi le mafiafia o le kiona, ma sa malepe i lalo faleie ma ufi o taavale toso i lona mamafa. E toalima tagata o le vaega na maliliu ma nisi o manu toso taavale na mamate i le malulu ma le fiaaai i le po a o lei sau le matagi, ma e toalima isi tagata na maliliu i isi aso e tolu na sosoo ai. O le fafagaina muamua o tamaitai, tamaiti, ma e na mamai, sa toatele ai alii malolosi sa faamalosi ona o pea e aunoa ma se mea e ai.

Auina Atu Vaega mo le Toomaga

E lua maila (3 km) i lalo ifo o Rocky Ridge i le Vaitafe o Sweetwater, sa toluapiga ai le vaega ma faatalitali ma le matelaina, maalilili, ma le faanoanoa mo le matagi ia te'a ese atu.

Ina ua taunuu atu le vaega a Franklin D. Richards i le Aai o Sate Leki, sa vave ona latou ripoti atu ia Peresitene Iaga ia tulaga lamatia o le aumalaga. Sa lei faamoemoeina e le Au Paia i le vanu nisi aumalaga seia oo i le tausaga na sosoo ai, ma o le tala o lo latou pagatia na salalau atu e pei o se afi matautia.

I le lua aso mulimuli ane, i le aso 6 o Oketopa, 1856, sa faia ai le konafesi aoao i le Tapeneko Tuai. Mai le pulelaa, sa avatu ai e Peresitene Iaga le valaau mo alii, meaai, ma sapalai i taavale e toso e asini po o solofanua ia o ese i le aso na sosoo ai e tuuina atu fesoasoaniga.²

Sa i ai John Bennett Hawkins i le Tapeneko Tuai i lena aso ma sa tali atu i le valaau ina ia fesoasoani atu. O ia o se tasi o le faitau selau o tagata i vaega o toomaga na o atu mai le Aai o Sate Leki. I le afiafi o le aso 21 o Oketopa, sa i'u ai ina taunuu atu taavale toso a le au laveai i le toluapiga a Willie. Sa faafeiloai i latou i le olioli ma le agaga faafetai e i latou na totoe ai na aisā ma fia aai. O le feiloaiga muamua lava lea a John Bennett Hawkins ma Sarah Elizabeth Moulton, o e na avea ma o'u matua o matua matutua.

I le aso 22 o Oketopa, sa faaaauu pea nisi o le au laveai e fesoasoani i isi vaega o taavale tosolima, ae amata ona toe foi atu William H. Kimball faatasi ma isi taavale toso na totoe ai i le Aai o Sate Leki ma taitaia le vaega a Willie.

O i latou na vaivai tele e toso a latou taavale tosolima na tuuina a latou meatotino i totonu o taavaletoso ae savavali atu i autafa o taavale. O i latou na le mafai ona savavali sa tietie atu i totonu o taavale toso. Ina ua latou taunuu i le Rocky Ridge, sa oo mai foi le isi matagi aisa matautia ia i latou. A o latou tauivi ai e a'e atu i luga o le tumutumu mauga, sa aui i latou i palanikeke ma ie soosoo e puipuia i latou mai le oti i le malulu. Pe tusa ma le 40 o le vaega ua maliliu.³



Sa matua malulu le tau lea sa mafatia ai le Au Paia i le mu o latou lima, vae, ma foliga i le aisa a o sopoliaina le tumutumu mauga. O le tasi fafine na tauaso i le aisa.

E mafai ona tatou mafaufauina le au Moulton, ma le la vaega o fanau e toavalu, o toso ma tulei a latou taavale e lua a o latou tauivi ai ma le loloto o le kiona. O le tasi taavale toso sa tosoina e Thomas ma lona toalua faatasi ai ma le la uta faapelepele—o Lottie, Lizzie, ma pepe Charles—faatasi ai ma le tamaitiiti o James Heber sa tautevateva solo ma fetosoai mai i tua e le maea o loo nonoa i lona puimanava. O le isi taavale na tosoina ma tulei e Sarah Elizabeth ma le isi toatolu o le fanau. O se olomatua agalelei, na vaai atu o tauivi mai James Heber, sa uu mai i lona lima a o ia savali mai i tua atu o le taavale tosolima. O lenei gaoioiga agalelei na faasoina lona lima taumatau, ae o lona lima agavale, sa lei ufitaiina mai le tau malulu na aisā. Ina ua latou taunuu atu i le Aai o Sate Leki, sa tipiese ai nisi o ona tamatamailima i lona lima lena.

I le aoauli o le aso 9 o Novema, sa tutu ai taavale toso a tagata puapuagatia i luma o le fale o le ofisa o le sefuluai, lea ua tu ai nei le Fale Faamanatu o Iosefa Samita i le Aai o Sate Leki. E toatele na taunuu mai ma vae ma lima aisā. E onosefulu-iva na malilili i le malaga. Ae o le folafolaga i le aiga o Moulton i lona faamanuiaga i Egelani na faataunuuina. Sa lei maliu se tamaitiiti a Thomas ma Sarah Denton Moulton.

Mai le Laveai i le Alofa Faamamai

Sa faafeiloaia le vaega e le faitau selau o tagatanuu naunautai o Sate Leki o e sa faatalitali i lo latou oo atu ma saunia e fesoasoani e tausi i latou. O le lotofaafetai ma le talisapaia e agai i se tasi o toa talavou sa fesoasoani e laveai le au Moulton mai le uu o le oti lea sa lei pine ae fotu a'e ai le alofa faamamai ma le alofa mo Sarah.

I le aso 25 o Tesema, 1856, faatasi ai ma moomooga fiafia o e pele ia te ia, sa faaipoipo atu ai Sarah Elizabeth ia John Bennett Hawkins, o le na laveaiina o ia. Sa faamauiina i laua mo le olaga nei ma le faavavau ia Iulai na sosoo ai i le Maota o Faaeega Paia. Sa faamautu lo la aiga i le Aai o Sate Leki ma sa faamanuiaina i ni atalii se toatolu ma ni afafine se toafitu. O se tasi o na afafine, o Esther Emily, sa faaipoipo atu i lo'u tamamatua o Charles Rasband i le 1891.

I le aso 24 o Iulai tatou te faamanatuina ai le Aso o Paionia, ma e tatou te faailoa atu le lotofaafetai mo le toatele o paionia na foai atu mea uma e atiae ai le Vanu o Sate Leki ma le tele o isi nuu i le itu i sisifo o le Iunaite Setete. Tatou te faailoa atu foi le lotofaafetai mo paionia o le Au Paia o Aso e Gata Ai i le lalolagi atoa na amatalia—pe o amataina—se ala o le talalelei mo isi e mulimuli ai.

O le a le mea na uunaia i latou i luma? O le a le mea na tuleia i latou i luma? O le tali, o se molimau e uiga i le Alii o Iesu Keriso. I le avea ai ma se atalii o matua o matua o matua o le au paionia, ou te faaopoopo atu la'u tautinoga ma le molimau e faapea, e le i maumaua a latou tauiviga. O mea na latou lagonaina, ua ou lagonaina. O mea na latou iloa, ua ou iloaina ma molimau atu ai. ■

Mai se savali i se sauniga faaosola o le Aso o Paionia na tuuina atu i le Tapeneko i le Aai o Sate Leki i le aso 24 o Iulai, 2007.

FAAMATALAGA

1. Ripoti a F.D. Richards ma Daniel Spencer, "Smith, Marilyn Austin, *Faithful Stewards—the Life of James Gray Willie and Elizabeth Ann Pettit*, 95–120," history.lds.org.
2. Tagai i le Brigham Young, "Remarks," *Deseret News*, Oct. 15, 1856, 252; tagai foi i le LeRoy R. Hafen and Ann W. Hafen, *Handcarts to Zion* (1981), 120–21.
3. O nei tagata, e 19 na malilili a o lei taunuu le vaega i Fort Laramie, sa aofia ai le toa 7 na malilili i luga o le vasa ma le toa 4 na malilili i le Aai o Iowa. O le isi 19 na malilili i le va o Fort Laramie ma le agai mai o le taumalulu, o le toatele lava na malilili i aso a o lumanai ai le taunuu ane o le au laveai.

FAATUMAUINA O LE

Faatuatua I LE Faaunuua

Saunia e Ryan W. Saltzgeber

Matagaluega o Talafaasolopito a le Ekalesia

O le toatele o tagata o le Au Paia o Aso e Gata Ai i nei aso e tapuai i uarota ma paranesi, lea e mafai ona latou “potopoto soo . . . e anapopogi ma tatalo, ma talatalanoa o le tasi i le tasi e uiga i le uelefea o o latou agaga” (Moronae 6:5). Ae o Moronae, le perofeta na tusia na upu, sa faia nisi o le tele o ana galuega tumau a o tuua na o ia o se soo ina ua mavae le faafanoga o lona nuu.

I le talafaasolopito atoa lava o le Ekalesia, e toatele le Au Paia o Aso e Gata Ai na tumau i le faatuatua na o i latou ina ua tuua i latou i tulaga faaunuua. O nisi, e pei o Moronae, na soifua lava i o latou aso o ni molimau ma faataitaiga mo tupulaga o lumanai. O isi na soifua ia vaai i se aso e mafai ona latou toe faasoa atu ai lo latou faatuatua.

Tatalo mo Tausaga mo Lenei Aso

Sa fai si faigata ona muaivaaia e Františka Brodilová le matafaioi o le a ia faia i le talafaasolopito o le Ekalesia ina ua tu'itu'i atu se

Ina ua tuua e taua, faama'i, po o isi tulaga nei tagata o le Ekalesia na o i latou i o latou atunuu, o le auala lenei sa latou tumau ai i le faatuatua.

ATA NA TUSIA E KEN SPENCER

faifeautalai i lona faitotoa i Viena i le 1913. O le tausaga ina ua mavae lona liliu mai, sa aafia ai le Malo o Austro-Hungarian i le Taua 1 o le Lalolagi, sa toefoi atu faifeautalai i le fale, ma sa toatele alii o le ekalesia sa valaauina i le auaunaga faamiliteli, ma tuua ai Františka ma nai isi tuafafine e feiloai na o i latou.

O le fesootaiga sili lea na maua e Františka ma tagata o le Ekalesia mo le tele o tausaga. Ina ua mavae le taua, sa folafola atu i le tane a Františka, o František se tofiga i le faigamalo fou a Siekisolovakia. Ina ua la masii atu i Prague, sa na o Františka lava le tagata o le Ekalesia i lea atunuu. Sa maliu František i ni nai masina mulimuli ane, ma tuua ai Františka ma afafine laiti e toalua—Frances ma Jane—e tausi.

I le tuua ai na o ia, sa aoao ai e Františka ona afafine i le talalelei. “Sa tausi a’e a’u i le Ekalesia,” sa faamatala ai e Frances. “O le ekalesia o le matou fale lea!”¹ Sa tusi atu foi Františka i taitai o le Ekalesia



Sa auai Františka Brodilová i le Ekalesia i Viena i le 1913—e tasi le tausaga a o lei amata le Taua 1 o le Lalolagi—ma sa lei i ai se fesootaiga ma isi tagata o le Ekalesia seia oo i le 1929.

Sa i ai Františka ina ua faapaia e Elder John A. Widtsoe (i ai la'ua uma i le atulaina ogatotonu) ia Siekisolovakia mo le tala'iina o le talalelei i le 1929.



i Auseteria ina ia tofi atu ni faifeautalai i Siekisolovakia. Sa mumusu taitai o le Ekalesia ona o faifeautalai mulimuli lava i Prague, pe tusa ma le 40 tausaga na


muamua atu, sa falepuipui mo le talaiga ona faate'a ese ai lea mai le aai. E ui i le faigamalo fou, ae sa popole pea taitai o le Ekalesia e itiiti lava sina mea ua sui.

I le le popole ai, sa faaauau pea ona tusi atu e Františka ni tusi ma tatalo mo se misiona ina ia faatutina. I le 1928, i le mavae ai ona tuua pea o Františka na o ia lava mo le sefulu tausaga, o Tomasi Pasina (Thomas Biesinger) 83 tausaga le matua—le faifeautalai lava e tasi lea sa talai i Prague i tausaga ua mavae—na toefoi ane. Sa foliga mai o le faaunuu o le aiga ua faamutaina nei. Peitai, i se taimi puupuu mulimuli ane, o le tulaga faaletonu o le soifua maloloina o Elder Pasina na faamalosia ai o ia e tuua le atunuu.

Sa faalotovaivaia Františka ae sa tonu ia te ia e tusi atu pea i tagata ma taitai o le Ekalesia i nuu mamao. Sa tauia lona faapalepale: i le aso 24 Iulai, 1929, sa taunuu ai Elder John A. Widtsoe (1872–1952) o le Korama a Aposetolo e Toasefululua i Prague faatasi ma se vaega o faifeautalai. I lena afaifi, sa fe'a'ei ai Františka ma le vaega i luga o se mauga e lata ane i le Karlštejn Castle, lea sa faapaia ai e Elder Widtsoe ia Siekisolovakia mo le tala'iina o le talalelei ma faatulaga aloaia ai se misiona. “E toalaiti ni nai tagata e mafai ona iloaina le olioli na matou lagonaina,” sa tusia mulimuli ane ai e Františka. “Sa matou tatalo mo tausaga e tele mo lenei aso.”²

E toetiiti lava ono masina o feiloai pea le paranesi i le fale o Františka. Mulimuli ane sa fesoasoani Františka i ona afafine i le faaliliuina o le Tusi a Mamona i le [gagana] Sieki ma faataatia se faavae mo le Ekalesia i le atunuu ua ta'ua nei o Ripapilika o Sieki.

E pei o Františka, e toatele tagata o le Au Paia o Aso e Gata Ai na onosaia le faaunuu. O alii ma tamaitai nei sa i ai faatasi ma uluai tagata na faasoa atu le talalelei ma faataatia le faavae o le Ekalesia i o latou nuu moni, lea sa faatagaina ai isi e faasoa atu mulimuli ane i le faaumeaina e le Au Paia.



Ina ua maliu lana tane, sa tausi e Františka na o na ia o la afafine e toahua.

E pei o Františka, e toatele tagata o le Au Paia o Aso e Gata Ai na onosaia le faaunuu. O nei alii ma tamaitai na faafaileleina le afi o lo latou faatuatua, faasoa atu le talalelei, ma fausia le Ekalesia i o latou lava nuu moni.

I le avea ai ma toeaia pulefaamalumu, sa tauave ai e Fujiya Nara (i le suti uliuli) le tiute mo le faatumauiina o le fesootaiga ma tagata o le ekalesia ina ua tapunia le Misiona a Iapani i le 1924.



O Le Meaalofa Tumau o le Faatuatua Moni

Ina ua tapunia le Misiona a Iapani i le 1924, sa toatele tagata o le ekalesia na lagona le le mautonu ma le tuulafoaiina. O le taitaiga mo tagata o le ekalesia pe tusa ma le 160 o Iapani na taatia atu lea ia Fujiya Nara, o le toeaia pulefaamalumu i le atunuu, o lana galuega i auala o nofoaafi na mafai ai ona ia asiasi atu i tagata o le ekalesia na salalau solo. Ina ua le mafai ona ia asiasi atu, sa faatumauiina e Fujiya ana fesootaiga e ala i le lolomiina ma le faasalalauina atu o se mekasini na faaulutalaina *Shuro (Lau Pama)* lea na ia faasoa atu ai savali o le talalelei ma faamalosi atu ai i le Au Paia i tausaga faigata na sosoo ai.

Ina ua mavae ona aveese e le galuega a Fujiya o ia ma avatu i Manchuria ma le faafuasei ona maliu o le na suitulaga ia te ia o le toeaia pulefaamalumu i le 1937, sa lei pine ae motusia fesootaiga ma tagata o le ekalesia i Iapani. “E ui sa leai ni fesootaiga ma le Aai o Sate Leki,” sa saunoa ai Fujiya, “. . . ae sa i ai lava lo matou talitonuga

maumaututu o le a toe tatalaina le Ekalesia [iinei].”³

I le taimi o le Taua Lona II o le Lalolagi, sa toefoi atu ai Fujiya i Tokio, lea na ia tala’i atu ai i ona tuaoi ma faatulaga ai ni sauniga a le Aoga Sa i vaiaso taitasi. Ina ua mavae le taua, sa maua ai se Fujiya se tusi na tuu e Edward L.

Clissold—o se tagata o le Au Paia o Aso e Gata Ai sa tautua i le militeli a Amerika—sa valaauliaina tagata o le Ekalesia i le atunuu ia faafesootai atu o ia. Sa vave ona asiasi atu Fujiya ia Edward i lona potu o le faletalimalo. Ina ua auai atu Edward i sauniga a le Au Paia o Aso e Gata Ai i Tokio, sa faate’ia o ia i le oo atu e latalata i le 100 tagata na auai.


“I na mea uma,” sa saunoa mulimuli ane ai Fujiya, “o le meaalofa aupito silisili, ma se meaalofa tumau, o le iloaina lea ma le opomauiina o le faatuatua moni—o lona uiga o le iloaina lea o le Tama Faalelagi, o Iesu Keriso ma le Agaga Paia.”⁴

Atiaaina o le Ekalesia i Hawaii

O Jonathan H. Napela o se faamasino faaaloogiaina tele i le motu o Maui a o lei papatisoina o ia ma lona faletua, o Kiti, i le 1851. Ina ua mavae ona faamalosi Jonathan e faamavae mai lona tofiga o le faamasino ona o lona auai ai i le Ekalesia, sa ia tuuto atu lona malosi e atiae ai le Ekalesia i tagata e tautatala i le gagana Hawaii. Sa aoao e Jonathan le faifeautalai o George Q. Cannon i le gagana, sa fesoasoani e faaliliu le Tusi a Mamona, ma atiae le uluai polokalama mo le aoaoina o faifeautalai i soo se gagana ese.

O se taunuuga, e silia ma le 3,000 tagata moni o Hawaii na auai i le Ekalesia i totonu o le tolu tausaga. “E matua manino lava ia i matou o le ekalesia lena a le Atua,” sa tusia ai e Jonathan. “E toatele o i ai luga o nei motu ua mauaina se faatuatua malosi e ala i le alofa tunoa o le Atua, e ala ia Iesu Keriso le Alii, ina ia mafai ona mauaina le Agaga Paia.”⁵

Taumatau: O se tasi o uluai tagata liliu mai i Hawaii, sa fesoasoani Jonathan Napela e faaliliu le Tusi a Mamona i le gagana Hawaii. Lalo: Wilhelm Friedrichs (lona lua mai le agavale) ma Emil Hoppe (ogatotonu, laina pito i tua) sa auai i le uluai papatisoga i Atenitina.



ATA O JONATHAN NAPELA MAI FAALOLOGA A LE POTUTISI O TALAFAASOLOPITO A LE EKALESA MA AKAWA

I le 1872, sa maua ai Kiti Napela i le lepela ma sa manaomia ai ona ave i le nofoaga o lepela i Moloka'i. Nai lo le nofo ai faatasi ma le Au Paia, sa aioi atu ai Jonathan i le nofoaga ia taofia ai foi ma ia. "I le taimi puupuu na totoe," sa ia tusi atu ai i le fono faatonu o le soifua maloloina, "Ou te fia faatasi ma lo'u toalua."⁶ Sa taliaina le talosaga, ma avea ai Jonathan ma peresitene o le paranesi i Moloka'i. Sa galulue vavalalata lava Jonathan ma le patele Katoliko i le lotoifale, Patele Tamiano, e auauna atu ia i latou uma na mafatia i le faama'i. Sa i'u ina maliu Jonathan i le lepela na maua ai o ia i le nofoaga.

"Ua Ou Olioli i le Avea ai ma se Meafaigaluega i Aao o le Atua"


O le auaiga o Friedrichs ma Hoppe sa na o le pau ia o tagata o le Au Paia o Aso e Gata Ai i Atenitina ina ua latou masii atu iina mai Siamani i le amataga o le vaitau o le 1920. Sa taumafai Wilhelm Friedrichs ma Emil Hoppe e faasoa



atu le talalelei i lo latou atunuu fou, sa tufatufa atu ia tamaitusi ma valaaulia isi e auai i a latou fonotaga. "Ou te faalagolago atoa i lo'u Tama Faalelagi o le a ia auina maia ni uo faamaoni o e o le a taliaina le Talalelei," sa tusia ai e Wilhelm, "aua ua ou olioli i le avea ai ma se meafaigaluega i aao o le Atua."⁷

Peitai, sa i ai ni luitau iloga. Sa nonofo valavala mamao ia aiga ma sa ao ona faimalaga i le lua itula ina ia feiloai faatasi ai. Ona o Emil o se tiakono ma o Wilhelm o se aoao i le Perisitua Arona, sa le mafai ai ona faatautaia sauniga e pei o le faamanatuga pe tuu atu foi ni faamanuiaga faaleperisitua.

I le 1924, sa fanauina ai e Hildegard Hoppe se pepe teine, ae sa maliu i le lua masina mulimuli ane. A o faanoanoa o ia, sa fesili ai Hildegard pe mafai



*O lo latou onosai
i le faataatiaina
o le faavae o
le Ekalesia na
faatagaina ai isi
ia galulue faatasi
mulimuli ane i le
faaumeaina o le
Au Paia.*

Mo nisi faamatalaga e uiga i nei Au Paia ma isi Au Paia faatuatua mai le lalolagi atoa, asiasi ane i le Country Histories i le vaega o Talafaasolopito o le Ekalesia i le Gospel Library app po o le history.lds.org.

Ina ua feiloai Phillipe ma Annelies Assard (agavale) ma Lucien ma Agathe Affoué i Côte d'Ivoire, sa olioli uma ulugalii e toalua i le iloa sa le i tuua na o i latou i le Ekalesia ina.



faapefea ona faaaofia le igoa o le pepe i totonu o faamaumauga a le Ekalesia. O se taunuuga, sa amata ona fesootai atu Wilhelm i taitai o le Ekalesia i le Aai o Sate Leki.

I le tausaga ma le afa mulimuli ane, sa auina atu ai Elder Melvin J. Ballard (1873–1939) o le Korama a Aposetolo e Toasefululua faatasi ma isi faifeautalaini ina ia feiloai i le vaega faatupulaia o tagata liliu mai i Buenos Aires. Ina ua latou taunuu atu ia Tesema o le 1925, sa papatisoina e Elder Ballard le toatele o tagata liliu mai ma faatulaga ai se paranesi. I le Aso o le Kerisimasi, sa faapaia ai e Elder Ballard ia Amerika i Saute mo le galuega faafaifeautalaini ma faatulaga ai le uluai misiona i le konetineta.

Toe Aumaiga o le Talalelei i Ona Tagata

Sa atiae e Phillipe ma Annelies Assard se olaga toafimalie i le taimi na tu'itu'i atu ai faifeautalaini i le la faitotoa i Köln, Siamani, i le 1980. Sa vave ona la taliaina le talalelei ma lagona le "lofituina i faamanuiaga." Sa lei pine

ae lagona e Phillipe se manao malosi e toe foi atu i lona atunuu moni o Côte d'Ivoire e faasoa atu i ai le tala-lelei toefuataiina. "O le 1986 la, i le mavae ai o le tele o tatalo ma anapogi ma lo'u toalua," sa faamatalaina e Phillipe, "sa tonu ai ia te a'u e toe foi atu i Ivory Coast e foai atu mea ua ou maua, e faaleleia ai le toatele o lo'u aiga ma lo'u nuu."⁸

A o lei tuua Siamani, sa feutagai Phillipe ma taitai o le Ekalesia. E ui sa lei ni iunite a le Ekalesia i Côte d'Ivoire, ae sa i ai se afoaiga o tagata sa auai i le Ekalesia a o i ai i isi atunuu. Sa tuu atu i le au Assards se lisi o o latou igoa ma mo le tausaga na sosoo ai sa ia tusitusi atu ai ma le filiga i tagata taitoatasi. Na faasolosolo lava, sa toefaamumu e le au Assards aloiafi o le faatuatua i isi ma sa maua ai le faatagaga e amata ona faia ni sauniga i Aso Sa i lo latou fale. Sa sosoo ai ma uarota ma paranesi, ma i le 1997 sa faatu ai le uluai siteki i Côte d'Ivoire. ■

FAAMATALAGA

1. Frances McOmber, i le Ruth McOmber Pratt, "Frantiska Vesela Brodilova," laupepa e lei lolomiina ma faasalalauina (2009), 18.
2. Františka Brodilová, in Pratt, "Frantiska Vesela Brodilova," 25.
3. Fujiya Nara, i le Lee Benson, "Japanese Member Survives Adversity," *Church News*, Feb. 17, 1979, 7.
4. Fujiya Nara, i le Benson, "Japanese Member Survives Adversity," 7.
5. Jonathan Napela, i le "Foreign Correspondence: Sandwich Islands—Minutes of Conference, Makawao, April 1st, 1852," *Deseret News*, Nov. 27, 1852, 4.
6. Jonathan Napela, i le Fred E. Woods, "A Most Influential Mormon Islander: Jonathan Hawaii Napela," *The Hawaiian Journal of History*, vol. 42 (2008), 148.
7. Wilhelm Friedrichs, letter, dated Mar. 5, 1924, Argentine Mission Correspondence, Church History Library.
8. Robert L. Mercer, "O Paonia i Ivory Coast," *Liahona*, Mat. 1999, 19.



O Le Tusi a Mamona na te Suia Olaga

Na atinae e nei tagata liliu mai le faatuatua e ala i le faitauina o le Tusi a Mamona.

Emoni lava o le Tusi a Mamona o se meaalofo ua faamoemoeina e aumai ai i tatou, o le fanau a le Atua, i se malamalamaaga o le talalelei moni a Iesu Keriso. Ua manatu Enrique Serpa Bustamante, o se tagata o le au paia mai Lima, Peru, o le Tusi a Mamona o ni tusi mai se matua agaalofa: “Na tusia e lo tatou Tama Faalelagi ia ‘tusi’ e ala i perofeta, e tuuina mai ai fautuaga, faamafanafanaga, ma le taitaiga mo lo tatou manuia ma faamanuia ai i tatou i taimi uma. E ese Lona potu i Lana fuafuaga ua Ia silafia ai le auala e tuuina mai ai ia i tatou na tusi o le alofa i le taimi tonu e saunia ai o tatou loto ia malamalama i Ana faamanuiga ma Lana talalelei.”

O nisi nei o molimau mai nisi o tagata liliu mai i le lalolagi po o le a se mea e uiga i le Tusi a Mamona e tulagaese ia i latou a o latou aoao e uiga i le Ekalesia.

O Se Tasi Molimau ia Iesu Keriso

Sa ou vaai i se kopi o le Tusi a Mamona i le fale o le Safafine o lo’u uso i Ibadan, i Nigeria. I le avefa ai ma se tagata e fiafia e faitautusi, sa ou fia malamalama ai pe aisea ua fai mai ai le tusi, “o se tasi molimau ia Iesu Keriso,” o lea na ou aveina ai le tusi ma faitau i ai.

O le soaautu “o se tasi molimau ia Iesu Keriso” na matala ai lo’u mafaufau i le ono i ai o se Faaola o le atulaulau nai lo na o se Faaola o tagata Isaraelu, lea sa avefa o se popolega tele ia te a’u i lena vaitaimi. O Lana asiasiga ia sa Nifae ma le faatulagaina o Ana tulafono ma sauniga i na tagata, na ou fia iloa atili ai e uiga i Lana galuega.

O lena soaautu na taitai atu ai a’u e aoao atili e uiga i le Ekalesia. Sa amata ona ou lagonaina le Agaga a o ou usitai i le apoapoaga o loo tusia i le Tusi a Mamona, e pei o le tatalo ia iloa le upumoni mo a’u lava ia (tagai Moronae 10:4). Ua ou iloa nei o loo soifua lo tatou Faaola ma e alofa ia i tatou uma.

Ezekiel Akeh, Idaho, USA

1 Nifae 8—Fua “sili ona Suamalie Nai Lo o Mea Uma Sa Ou Tofo Muamua i Ai”

Ile 1 Nifae 8:11–12, o loo faamatala ai e Liae le fua o le laau o le ola e “sili ona suamalie, nai lo o mea uma sa ou tofo muamua i ai. . . . Sa faatumulia lo’u agaga i le olioli tele.” Ina ua ou faitau i nei fuaiupu, sa malosi lo’u lagona o lenei fua sa sili ona faapitoa, ma sa ou manao foi i ai.

Sa ou lagona le malamalama tele ia Liae. Sa ou mafaufau pe ana faapea o au o Liae, ma sa i ai lenei fua, semanu e tutusa ma lagona ma o le a matuai manao lava ia aai ai foi lou aiga. Sa faapitoa le moni o lenei mea mo au ona o ou matua e lei avefa ma ni tagata o le Ekalesia; o lea, e tusa lava pe ou te faitau i nei fuaiupu i le taimi lenei, e foliga mai o loo tautala mai i mea o loo i totonu o lou loto.

Sa ou iloina o lenei fua e faapitoa, ae ou te lei iloina ua faatusa i le alofa o le Atua ma Lana talalelei. Mulimuli ane, ina ua ou malamalama i le uiga o le fua, sa ou mafaufau i le sa’o lelei o lona faamatalaina mai i tusitusiga paia.

O tusitusiga paia o faamaumauga moni o upumoni mai perofeta ma o loo i ai le afioga a le Atua.

Eun Jin Yeom, Gyeonggi, Korea i Saute

Iakopo 5:74—o se Manao e Auauna Atu i le Atua

Ao ou aoao e uiga i le Ekalesia, sa ou faitau ai i le Iakopo 5:74. Sa mau ia te au mai lava i le taimi na ou faitau i ai. Sa avea au o se tagata toaga tele o lau ekalesia muamua i lou olaga atoa, ma sa i ai lava e le aunoa se manao e auauna i le Atua. Sa faapea foi ona ou faamoemoe ia i ai se aso ou te aoga ai faafilosofia ma mataupu silisili ina ia mafai ona ou auauna ia te Ia. Ua uma ona pasi au suega ulufale e aoga faafilosofia.

Ae o le a le mafai ona galo ia te au le taimi muamua na ou faitau ai i lenei mau. Ou te manatua o le po ina ua uma ona ou auai mo le taimi muamua i se sauniga a le Ekalesia o le AAG. I le taimi o se tasi o malologa i le va o vasega, sa ou vaai ai i luga o le laupapa puletini le faaaliga na maua

e Peresitene Thomas S. Monson e faatatau i le tuuina i lalo o tausaga o faifeautalai.

Ina ua ou faitau i le Iakopo 5:74 i lenei po, sa ou iloa sa ao ona ou auauna atu i le Atua. Ma i se isi tulaga, o le vaavaai atu i faifeautalai—i na alii talavou e toalua o e sa tutusa o matou matutua—o tuuina atu o lau ola mo Ia, na ou iloa ai, o le auala lenei e mafai ona ou faia ai faapea. O le po ao lumanai lenei sauniga a le Ekalesia, sa ou filifili ai e papatiso. O le po ina ua maea le sauniga, sa ou filifili ai ou te alu i se misiona. Sa ou toe foi mai i le aiga ma le mamalu ina ua maea ona ou auauna atu i tagata matagofie o le Misiona a Filipaina Cebu Sasae.

Josef Gutierrez, Batangas, Filipaina

O Le Tusi a Enosa—Faamagaloga mo Agasala

Ole taimi muamua na ou faitau ai i le Tusi a Mamona, sa ou le iloa po o fea e amata ai. Sa ou tauivi ma le faamagaloga, ae maise lava i le faamagaloina o au lava ma le iloa pe sa ou agavaa mo le faamagaloina. Sa fai mai se tasi o tamaitai faifeautalai o le a ou maua le tali i tusitusiga paia, ma afai ou te lei iloa le mea e amata ai, e tatau ona ou tatalo e uiga i ai ma o le a i ai iina mau na ou manao-mia. Sa tonu ia te au e suesue solo ma faitau i le mea na ou taofi ai—o le tusi a Enosa, fuaiupu e 4–6. Sa ou iloina e moni le Tusi a Mamona i lenei lava taimi ina ua uma ona ou faitau i ai.

Jennifer Andreski, Kalefonia, ISA

Mosaea 27—O Le Avanoa e Suia ai

Ina ua ou faitau muamua lava i le Tusi a Mamona, o le vaega o le Tusi a Mamona sa sili ona ou fiafia i ai o le Mosaea ina ua teena e le atalii o Alema le Ekalesia ae taumafai e faaleaga. Ae sa i ai se suiga tele ia te ia—sa ia lagona le Agaga Paia ma sa suia o ia i se tagata talitonu. E ese lou fiafia i lenei mea ona o le avanoa e sui ai e tatau ona tuuina atu i tagata uma.

Maria Gracia Henrique Gonzalez, Maule, Chile

Mosaea 27:28–29—Fiafia ma le Togiolaina

Ile avea ai ma se tagata fou o le ekalesia, sa faagaetia lava a'u i le Mosaea 27:28–29. Sa ou—ma o loo ou—matuai





Ezekiel Akeh



Josef Gutierrez



Jennifer Andreski



Marie-Chantal Hogue



Venu Bhaskar Nakka

faafetai tele ona sa alofa mutimutivale le Alii ia te au ma togiolaina au mai se olaga o agasala. Ae ou te lei papatiso, sa ou faapea sa ou fiafia, ae e leai se mea e mafai ona faatusalia i le fiafia na ou lagonaina i le taimi lava na ou taliaina ai le talalelei toefuataina. E lei i ai se taimi na ou lagonaina ai le matuai to'a ma le matuai mauiinoa e faapea o loo teuina se lumanai susulu [mo au].

Ina ua uma ona [ou] talia le valaaulia a Alema e “o mai ma ia papatiso i le salamo, ina ia avea foi outou ma e mafai ona aai i le fua o le laau o le ola” (Alema 5:62), sa ou oo foi i lea lava faamafanafanaga ma le laveaiga toafilemu e tasi e pei o Alema le Itiiti ina ua ia tusia: “Sa ou i ai i se lua loloto sili ona pogisa; ae o lenei ua ou vaaia le malamalama ofoofogia o le Atua. Sa puapuagatia lo'u agaga i le mafatia e faavavau, ae ua se'ia ese a'u, ma ua lē toe tiga lo'u agaga.” (Mosaea 27:29). O lenei fuaitau sa fesoasoani ou te malamalama ai o lau amataga fou i le olaga ma lou fiafia fou ua maua sa faavaeina i luga o le taliaina o Iesu Keriso o lou Faaola ma lou Togiola. O lenei ua le gata mai lou loto faafetai ona na totogi e lou Faaola le tau o le faamasinotonu ma mafai ai ona ou lagonaina pea lava pea lene alofa togiola e tasi i taimi uma ou te salamo ai.

Marie-Chantal Hogue, Onetario, Kanata

O Lena Tama'i Tusi Lanu Moana

Sa ou ola a'e i Initia, lea sa ou feiloai ai i faifeautalai ma faato'a auai ai i le ekalesia. O lenei Aso Sa o le Aso Sa o le Eseta. Ona o la'u taimi faigaluega, sa ou tuai mai ai i le lotu ma auai ai i se vasega a le autalavou i le Aoga Sa, lea sa aoao ai e se tasi o faifeautalai le lesona. Sa ia sii maia ni mau mai se tusi lanu moana lea ou te lei vaai muamua lava i ai ae sa foliga mai e pei o le Tusi Paia. A o ia aoao mai, sa ou lagonaina se lagona malosi i lo'u loto ma sa iloa ai sa tatau foi ona ou mauaina lenei tusi.

Sa ou alu atu sa'o lava ia te ia ina ua uma le vasega ma fai atu ia te ia, “Ou te manaomia lenei tusi.” Talu ai o le tusi lea o ana lava seti o tusitusiga paia, sa le mafai ai ona ia tuu maia ia te a'u, ae sa ia faatagaina a'u e tilotilo i ai ma tagotago i ai. Sa mafai ona ou vaai i upu auro o lolomiina i le pito i luma: “O Le Tusi a Mamona.” Sa ou toe mauaina foi lea lava lagona e tasi ou te manaomiaina le tusi mo a'u lava ia. Sa ave e le faifeautalai lo'u tuatusi ma folafola mai na te aumaia se tusi mo a'u. Ma le mauiinoa lava, sa o mai faifeautalai i lo'u fale mulimuli ane ma tuu mai ia te a'u la'u lava kopi o le Tusi a Mamona. Ona la amata lea ona aoao a'u i lesona.

I lenei tausaga, sa aumai ai e le Eseta se faamanuiaga le matalitonuina i lo'u olaga: le Tusi a Mamona. O lenei tama'i tusi lanu moana sa aumaia se agaga o le ola i totonu o lo'u olaga, ma sa ou faafetai ai na ou maua le avanoa e aoao ai mai [le tusi]. ■

Venu Bhaskar Nakka, Kalefonia, ISA



O UPUMONI MAMANA I TOTONU O LE TUSI A MAMONA

“E tupu se mea mamana pe a saili atu se atalii/afafine o le Atua ia iloa atili e uiga ia te la ma Lona Alo Pele. E leai ma se isi mea o loo manino ma mamana atili ai le aoaoina o na upumoni nai lo le Tusi a Mamona. . . .

“O'u uso e ma tuafafine pele, ou te molimau atu o le Tusi a Mamona o le afioga moni lava a le Atua. O loo i ai tali i fesili sili ona taua o le olaga.”

Peresitene Russell M. Nelson, “O Le Tusi a Mamona: Faamata e Faape'i Lou Olaga e aunoa ma ia?” *Liahona*, Nov. 2017, 61, 62.

O TAGATA LELEI O ST. GEORGE

Pe tusa o le 12 o o’u tausaga, sa ou matamata ai i se ata tifaga a le Ekalesia na faaali mai ai Peresitene Lorenzo Snow (1814–1901) o tatalo mo le Au Paia o Aso e Gata Ai i St. George, Iuta, ISA, o e na mafatia mai le lamala matautia.

“Le Alii e,” sa tatalo ai Peresitene Snow, “faamanuia tagata lelei o St. George.”

O lena fasifuaitau, “o tagata lelei o St. George,” na tuua se uunaiga tumau i lo’u mafaufau talavou. Ona ou te nofo i Chile, sa ou taumafai lava e mafaufau po o a ituaiga Au Paia faamaoni e tataua ona i ai “tagata lelei o St. George.” Sa ou fia feiloai ia i latou.

E silia ma le 30 tausaga mulimuli ane, i le 2005, sa matou o ai ma lo’u aiga e ave le ma atalii lona lua i Provo, Iuta, e auai ai ma lona uso, o lē sa a’oga i le Iunivesite o Polika Iaga. O le afiafi ina ua matou taunuu, sa ou fai atu ai, “Ou te fia alu e vaai ia tagata lelei o St. George.”

“Ae, Papá,” sa tetee mai ai lo’u atalii matua, “e mamao tele St. George.”

“Vaai,” sa ou tali atu ai, “sa totogi e Papá pepa malaga o vaalele. O loo totogi e Papá ia meaai. O loo totogi e Papá le kesi. “E na o le tasi lava le mea lea e manao ai Papá mo ia lava. E fia manao o ia e feiloai i tagata lelei o St. George!”

“Ua lelei,” sa fai mai ai lo’u atalii ina ua ia iloa e mamafa ia te a’u.

O le aso na sosoo ai, sa matou malaga ai i le taavale mo le 260 maila (418 km). Ina ua taunuu atu i St. George, sa matou o atu i le nofoaga autu o tagata asiasi i le malumalu ma malaga taamilo i le maota o le taumalulu o Peresitene Polika Iaga (1801–77). Sa matou asiasi atu foi i le tapeneko, lea sa valaaulia ai a’u e lauga atu i lo’u aiga mo se minute mai le pulelaa lava e tasi lea na lauga atu ai Peresitene Snow i “tagata lelei o St. George.” Sa matou savalivali solo i le aai, ma matamata ma feiloai atu i tagata. Sa foliga mai i latou pei lava o tagata masani ma faamaoni o le Au Paia o Aso e Gata Ai.

Sa ou fialia ua matou o. Ae ina ua matou toe foi atu i Chile, sa ou iloa ai se mea: Sa ou vaai muamua i “tagata lelei o St. George.”

Ona o la’u galuega ma o’u valaaua i le Ekalesia, sa ou faimalaga ai i Chile atoa. I Calama, ua ou vaai ai i talavou matutua o e tauivi e tausi ia poloaiga. I La Serena, ua ou vaai ai i matua tuuto o e taunuu vave mai ma a latou fanau mo sauniga a le Ekalesia. I Antofagasta, ua ou vaai ai i Au Paia o Aso e Gata Ai o e finau mo mea e sa’o i aso uma. I Vallenar, Copiapó, Caldera, Tocopilla, ma isi aai, ua ou vaai ai i tagata o le ekalesia e o i o latou tulivae e tatalo ona agai lea i luma e tusa lava pe le o faigofie [le olaga].

A ou vaai i tagata faamaoni o le Au Paia o Aso e Gata Ai o e usiusitai ma tumau—e tusa lava po o fea latou te nonofo ai ma po o a foi ni luitau latou te fetai ai—ou te faapea ifo ia te a’u lava ia, “O tagata lelei nei o St. George.” ■

Claudio Gonzalez, Antofagasta, Chile

Aou vaai i tagata faamaoni o le Au Paia o Aso e Gata Ai o e usiusitai ma tumau—e tusa lava po o fea latou te nonofo ai ma po o a foi ni luitau latou te fetai ai—ou te faapea ifo ia te a’u lava ia, “O tagata lelei nei o St. George.”



“O LE MEA MONI, O A’U O SE TASI”

Faato’a ou nofo ifo lava i lalo i le nofoa o le pasi ae fālō mai se tamaloa mai le auala savali ia te a’u ma fai mai, “E i ai sou agaga matagofie.”

E le tau fai atu, sa ou te’i. E le’i faamalo muamua mai lava se isi ia te a’u e uiga i lo’u agaga. I le le mautinoa ai pe faapefea ona tali atu, sa na ona ou fai lava i ai, “Faafetai lava.”

Sa ta’u mai e le tamaloa ia te a’u na mafai ona ia iloa ona o lana galuega ma lana vaega faalelotu. Sa ou faalogo ia te ia a o ia tuuina mai ia te a’u fautuaga i le auala e faatumauiina ai le matagofie o lo’u agaga.

Ina ua afe atu le pasi e tu, sa ma taufai tutu uma i luga e o ese ma sa ia tuu mai se manatu mulimuli ia te a’u: “Ia mautinoa e aua lava ne’i e faalogo i na Mamona.”

Sa foliga mai na tu le taimi mo se minute. Sa vaai lenei tamaloa i se mea faapitoa i o’u foliga, ae sa leai sona manatu sa mafua ona o la’u tapuaiga.

O le a faapefea la ona ou tali atu? Ma le faamaoni lava, o lo’u manatu muamua lava o le fai atu o se tala ma faafoliga ou te lei lagonaina o ia. Sa ou popole afai ou te ta’u atu ia te ia o a’u o se tagata o le Ekalesia, atonu e tali le lelei mai pe faiupu malolosi mai foi.

Ae na oo mai se mau i lo’u mafau-fau: “Aua ou te le ma i le talalelei ia Keriso: aua o le mana lava lea o le Atua e ola ai i latou uma o e faatua-tua” (Roma 1:16). Sa ou iloina ou te le ma i le talalelei, ma sa ou iloina sa le mafai ona susulu atu lo’u agaga mo isi pe a na fai ou te lei tu atu o se molimau. Faatasi ma lo’u naunautaiga fou, sa ou tepa atu i le tamaloa ma fai i ai, “O le mea moni, o a’u o se tasi [o i latou].”



Sa ou iloina sa le mafai ona susulu atu lo’u agaga mo isi pe a na fai ou te lei tu atu o se molimau.

Sa pulatoa mai le tamaloa ia te a’u ae ou pulatoa atu i ai. Sa faateia a’u, sa ata o ia ma fai mai e le mafai ona auai o ia i le Ekalesia ona e fiala tele o ia i le kofē. Sa ou ata foi, ma alu loa le tagata ia i lona ala.

E oo mai i lenei aso o loo ou fiala lava e uiga i le filifiliga sa ou faia.

Ou te iloa e mafai ona faigata ona tu atu o se tagata o le Ekalesia. O nisi taimi e ono tautfaamatau! Ae a tatou tutu atu mo le Atua, e mafai ona susulu atu o tatou agaga e avea ma malamalama i le lalolagi. ■

Abby Thorne, luta, ISA



O a'u tamoega i le pakaga taavale sa faaaauu pea, sa fai ma tuu, mo le tolu tausaga.

TAMOE ATU I TOTONU I LE EKALESIA

I se tasi aso, a o tau saili se nofoaga e tamoē ai, sa ou filifili e faataitai le pakaga taavale o se lotu i le matou pitonuu. Sa ou fiafia i ai ona sa malamalama i moli ma faasimā. Sa ou iloa o le tamoē faasefulu i le faasefululima faataamilo i le fale o le a atoa ai la'u toleniga tolu maila (4.8 km).

O a'u tamoega i le pakaga taavale sa faaaauu pea, sa fai ma tuu, mo le tolu tausaga. Mai lea taimi i lea taimi, sa ou vaai ai i tagata i le pakaga taavale ona o nisi taimi ou te tamoē ai a o faia ni sauniga Lotu ma isi gaoioiga.

E tele ni taimi, sa ou maua ai uunaiga sa ou manaomia ona talanoa i se tasi e uiga i le Ekalesia, ae sa ou le iloa pe faapefea ona faia. A o ou foi atu i le fale mai le galuega i se tasi afiafi, sa tonu ai ia te a'u ou te afe [i le falesa] ma vaai pe mafai ona maua atu ai se tasi iina. Ina ua

ou savali atu i totonu o le falesa, sa ou maua atu ai faifeautalai a o faamaeaina le la faatalanoaga ma lo la peresitene o le misiona. Sa ou faailoa atu i ai a'u lava ma matou nonofo ai i lalo i le faapaologa. O iina sa la'ua aoaoina ai a'u i la'u uluai lesona o le talalelei.

I le gasologa o isi vaiaso e lua na sosoo ai, sa faaaauu ai pea ona matou feiloai ma faifeautalai. Ina ua ou auai i le sauniga faamanatuga, sa faaali mai e tagata o le uarota ia te a'u le alofa, taliaina, faaumeaga, ma le faamalosiuga. A o ou mafaufau e uiga i mea sa ou aoaoina, sa ou iloa ai o lo'u fiailoa e uiga i le Ekalesia sa atiaeina i se manaoga mo a'u ia filifili ina ia papatisoina. Sa ou lagonaina le uunaia o a'u e le Agaga e fai le mea ua finagalo lo'u Tama Faalelagi ia te a'u e fai, ae sa ou faaaauu pea ona tauivi ma le faaiuga. Sa i'u lava ina

papatisoina a'u ia Novema 2001, i le 36 o o'u tausaga.

O la'u faaiuga e tamoē i totonu o le pakaga taavale o le falesa sa foliga mai sa le'i taua i lena taimi. Ae sa taitai atu ai i o'u faamanuiaga silisili: o lo'u avea ai ma tagata o le Ekalesia; feiloai ai i lo'u toalua aulelei, o Jennifer; ma faamauina ai ia te ia mo le olaga nei ma le faavavau i le Malumalu o San Diego Kalefonia.

O lea la, afai e te vaai i se tasi o faamalositino i le pakaga taavale i le tou falelotu, ia faailoa i ai oe lava ia. E te le iloa lava—atonu e le pine ae avea o ia ma tagata sili ona fou o le tou uarota! ■

Daniel R. Thompson, Kalefonia, ISA

O LE FAUTUAGA SA OU LE'I FIA FAALOGO I AI

I na ua ma filifili ma lo'u toalua e lamata le maua lava pisinisi, sa faigata lava le uluai tolu tausaga. Sa ma le maua se tupe mama ma pa'u atu ai i aitalafu. Sa ma galulue malolosi, ae o faafitauli le mafaufauiina sa avea ai lena taimi ma taimi sili ona faigata o o ma olaga.

Sa oo ina faateleina le leaga ina ua oti lo'u tina faaletulafono i le aso na mavae ai le Kerisimasi ma i se vaiaso mulimuli ane, i le Afiafi a o lumanai ai le Tausaga Fou, sa matua ou ma'i lava. I lea taimi, sa leai ma se ma tupe, sa le toe i ai foi se ma taavale, ae o le mea sili ona leaga o mea uma, sa le toe maua le ma inisiua o le soifua maloloina.

Mulimuli ane, sa maua a'u i se ituaiga matautia o le kanesa sa atiaeiina e le itiiti ifo ma le lima tausaga. Sa ogaoga lava ma na manaomia vave ai se taotoga. Sa utiuti lo'u taimi, ma sa leai se ma tupe mo le tausiga faafomai taugata sa ou manaomia.

Sa matou feiloai ma le ma epikopo ma talosaga i ai mo se fesoasoani. Sa ma faamalamalama atu i ai o lenei mea o se tulaga moni lava tau i le ola ma le oti. Sa popole le epikopo, ae sa ia ta'u mai ia i maua na ia lagona le uunaiga e faatalitali teisi lava a o lei tuuina maia se fesoasoaniga sei vaai pe i ai se isi auala e ono matala mai ia i maua. Sa ia faamautinoia mai afai e lava lo ma faatuatua, o le a saunia e le Alii se auala mo a'u e maua ai se fesoasoaniga sa ou manaomia.

O le taimi muamua, o le tali a le epikopo sa ou ita ma tiga ai. Sa ou lagona ua la tuulafoa'ia uma ma le Alii a'u. Ae sa i ai sa'u molimau o le tala-lelei, ma sa ou talitonu sa valaauina e

le Atua le epikopo. E ui i lo'u lototiga, ae sa ou tatalo ina ia fesoasoani mai le Tama Faalelagi ia te a'u ia faaaauu pea ona alofa atu, faaaloalo, ma lagolago lo'u epikopo. Ina ua ou tatalo mo lenei mea, sa faamafanafanaina a'u ma lagona o le a fesoasoani mai le Alii ia te a'u i se auala.

Sa ma agai i luma ma lo'u toalua i le faatuatua, ma sa ou mauaina sue-suega faafomai sa manaomia ma faatulagaina ai lo'u taotoga, e ui i le leai o se ma tupe. O le aso a o lumanai ai lo'u taotoga, sa ma faatau ese atu ai le ma pisinisi mo se tau lelei lava, lea

na mafai ai ona ma totogia uma a'u pili o le falemai.

Ua i'u nei ina manino mai le mafuaaga sa faatuai ai ona fesoasoani mai lo'u epikopo. Sa ia galue i musumusuga ina ia mafai ai mo a'u ona mauaina se aafiaga taua faaleagaga. O lena aafiaga na aoaoina a'u e faalagolago i le Faaola, e tusa lava pe foliga mai e tofotofoina ma taufaamatau le ala. Ou te faafetai mo le fautuaga sa ou le'i fia faalogo ai mai lo'u epikopo. Ua ou iloa nei o le Atua o se Atua o vavega ma Na te le tuulafoaiina lava i tatou. ■ Taofia le igoa, Porto Alegre, Pasila



Sa utiuti lo'u taimi, ma sa leai se ma tupe mo le tausiga faafomai taugata sa ou manaomia.

O Malaga Faapaionia e Tolu o Onapo Nei

Saunia e Sarah Keenan

Ao ou auauna atu i la'u misiona i Melepone, Ausetalia, sa ou i ai i se uarota sa faia mo tamaiti aoga faavaomalo. Ina ua latou aoao e uiga i paionia i le Aoga Sa, sa ou tomanatu i le mata'ina o i latou—sa toetoe lava o tagata liliu mai i latou uma, ma sa leai ma se tasi sa i ai se tuaa na asaina laufanua valevalenoa o Amerika i Matu.

O le mea na faateaia ai, o le toatele o tamaiti aoga faavaomalo sa faaga-eetiaina i tala na faasoaina. Sa ta'ua e nisi o i latou le auala na fesooteai atu ai i latou i uluai Au Paia i se tulaga patino: e pei foi lava o paionia, o nei tamaiti aoga faavaomalo o ni tagata fou liliu mai ma sa faia ni osigataulaga e faatu ai le Ekalesia i eria na latou ola ae ai. Mo nisi o nei tagata o le ekalesia, a le toalaiti le Ekalesia ia pe sa leai foi i o latou nuu moni. O i latou o paionia o onapo nei, o loo mamanuina se

talatuu faalelotu fou mo tupulaga o lumanai.

O ni aafiaga se tolu nei mai tagata liliu mai ua auai i tulaga o paionia o onapo nei.

FAAMAMALUINA O LO'U AIGA I NI AUALA FOU

Nami Chan, Taoyuan, Taiuani

Olo'u aiga ma le toatele o le matou aiga lautele i Taiuani o tagata Puta (Buddhist). A o ou talavou, ou te manatua le fesoasoani ai e saunia taulaga mo tuaa ma atua e tele i le Tausaga Fou a Saina ma isi aso malolo. O se tumasani faaleaiga mo i matou, faapea ai foi ma se auala e faamanatu ai o matou tuaa ma aumai ai le filemu ma le manuia i lo'u aiga.

Ina ua auai nisi o lo'u aiga i se lotu Kerisiano tutoatasi, sa leai lava se

E toatolu talavou matutua ua faasoamaia a latou tala o le auai i le Ekalesia ma fatuina se talatuu o le faatuatua mo i latou lava ma o latou aiga.

aafiaga i lo'u aiga i le taimi muamua. Ae i le taimi o le aso faamanatu o le Ching Ming Festival, pe a outou tapuai i tuaa ma susunu mea manogi i o latou tuugamau, na mumusu o'u aiga Kerisiano e auai ai. Sa latou fai mai ua latou tuuto atu e mulimuli i Poloaiga e Sefulu, aemaise lava le "Aua ne'i e fai mo oe ni atua ese i o'u luma" (Esoto



20:3). Sa lei talanoaina lava e lo'u aiga nisi lava talitonuga muamua, ae talu mai lena aso, sa avea le FaaKerisiano ma faatusa o le faafanoga o tumasani i mata o lo'u aiga ma sa vaaia i se malamalama le lelei.

A o ou auai i se iunivesite, sa ou feiloai i ni faifeautalai Mamona i luga o le alatele. O le mea masani lava, ou te le fiafia i mea la te ta'u mai, ae o nisi o aafiaga sa saunia ai lo'u loto e talia le la savali. A o feiloai ai ma i laua, sa ou malie e tatalo ma faitau le Tusi a Mamona, ma sa ou amata atiaaina se molimau patino e uiga i mea sa aoaoina ai a'u. Ae, ona o lagona o o'u matua e tetee i le FaaKerisiano, sa ou le ta'uina ai ia i laua sa ou fia manao ina ia papatisoina. I le mavae ai o le tele o masina talu le feiloaiga muamua ma faifeautalai, sa i'u ai loa ina ou ta'uina

i o'u matua lo'u manao ina ia papatisoina ma lo'u manao ia auuuna atu i se misiona. Sa le fiafia i laua, ae sa ou iloa sa ou faia le filifiliga sa'o.

E leai ma ni o'u tuua paionia, ae ou te lagona ua ou malamalama i lo latou ositaulaga. E faigata le lafoai o nisi tumasani ae faafeagai ma le itu tetee mai tagata o le aiga. E oo lava i lenei taimi, i le lima tausaga talu ona ou auai i le Ekalesia, i lea taimi na ou auuuna ai i se misiona, e lei lagolagoina atoa lava e lo'u aiga la'u faaiuga, ae ua latou taliaina lava. O le auai i le Ekalesia ua faatagaina ai a'u e faamamalu lo'u aiga i ni auala fou, e ala i le faia o talafaasolopito o aiga ma le sailia o o'u tuua. O la'u molimau ia lesu Keriso ma Lana Togiola ua fesoasoani ia te a'u i le foiaina o soo se feteenaiga matou te ono oo i ai ma lo'u aiga.

MAUAINA O LE OLIOLI MAI LE TALALELEI

Harry Guan, Iuta, ISA

Sa ou ola a'e i Saina ma manatu ia Ste a'u o se Kerisiano, e ui i le mea moni e faapea sa ou lei alu lava i se lotu. Sa ou naunau i le Atua ma lesu Keriso, ma sa ou mafaufau o le aoaoga faavae FaaKerisiano sa matua mafanafana lava.

Ina ua ou masii atu i le lunaite Setete mo le kolisi, sa amata ona ou auai i se lotu Kerisiano tutoatasi. Ina ua mavave ni nai masina, sa ou faalogo e uiga i Le Ekalesia e Iesu Keriso o le Au Paia o Aso e Gata Ai mai nisi o uo o ē sa fua-fua e auai i le lunivesite o Polika laga. Sa ou fesili i ni nai tamaiti aoga i le lotu Kerisiano e uiga i le Au Paia o Aso e Gata Ai ma sa faateia ina ua latou lapataia ma le naunautai a'u ia taumamao ese mai le "Au Mamona." Sa ou faalogo i le latou fautuaga i le taimi muamua, ae a o ou matamata i ala faaagafesootai pe tusa ma se vaiaso mulimuli ane, sa ou tau ai i se lauga a Elder Jeffrey R. Holland o le Korama a Aposetolo e Toasefululua. I lea lauga, na ia ta'ua ai o tagata o le Ekalesia e tatau ona faaloalo i isi tapuaiga (tagai i le "Faith, Family, and Religious Freedom," [lds.org/prophets-and-apostles](https://www.lds.org/prophets-and-apostles)). A o ou faalogologo atu ia Elder Holland, sa ou lagona le mea lea ua ou iloaina nei o le Agaga ma filifili ai e manaomia ona ou aoao atili e uiga i le Ekalesia.

Sa i'u ina ou alu i le lotu ma mulimuli ane ai feiloai i

faifeautalai. Sa ootia a'u i a la aoaoga, aemaise lava le ata o le faaolataga. Sa lei fiafia tele o'u matua ina ua ou filifili e papatisoina, ae sa laua taliaina ua lava lo'u matua e faia ai a'u lava ia faaiuga. Ina ua asiasi mai o'u matua matutua ia te a'u i Amerika i ni nai masina mulimuli ane, sa mafai ona ou aoaoina i laua e uiga i le talalelei. Sa la filifili uma ina ia papatisoina.

Ua aumai e le talalelei ia te a'u le tele o le olioli ma ua taitai atu ai a'u i le o le a avea ma a'u āvā. Ua tauia ai osigataulaga uma sa ao ona ou faia pe o le a faia.

SAUNIAINA O LE ALA MO TUPULAGA I LE LUMANAI

Brooke Kinikini, Hawaii, ISA

Sa ou auai i le Ekalesia ina ua 15 So'u tausaga, ae sa ou alu lava i le lotu ma atiaeina lo'u faatuatua ma le molimau talu ina ou tamaitiiti. E ui na o a'u le tagata o le ekalesia i lo'u aiga, ae sa alolofa a'u uo faamaoni ia te a'u ma taitai a'u e ala i a latou faataitaiga.



E le pei la o paionia anamua, sa ou le tau savali ma se taumafaiga tele e tulei se taavale tosolima e asaina laufanau valevalenoa aisā. O le mea moni, sa ou lei feagai ma le tele o ni faigata ina ua auai i le Ekalesia. Ae o le mea mautino, sa le toe fiauo mai nisi o a'u ua ma sa ao ona ou auai i le lotu na o a'u ma alu i le seminare na o a'u lava. Ae a ou mafaufau atu i le aafiaga na i ai ma faaauau ai i lo'u aiga, ou te iloa o se tasi lea o faaiuga aupito sili ua ou faia. O la'u faaiuga ina ia papatisoina, ina ia faamauina i le malumalu, ma ia tumau faamaoni i a'u feagaiga ua fatua'i ai se filifili o tuutuuga faifai pea o le aafia lelei ai olaga o la'u fanau aulelei e toatolu, faapea ai foi ma tupulaga i le lumanai, ma faavavau.

O le avea ma se paionia e faatatau i le sauniaina o le ala mo isi. Ou te fialia e manatu o se tasi o faamanuiaga e tele ua ou mauaina mo le avea ai ma se tagata faamaoni o le Ekalesia o le mafai lea ona ou fesoasoani e aumai isi ia Keriso. O se polokalama itiiti—e pei o le papatisoga o se teineitiiti 15 tausaga le matua i Maui, Hawaii, po o se tatalo faamaulalo a se tamaitiiti 14 tausaga le matua i se togavao—e mafai ona suia ai olaga o aiga i le tuanai, taimi nei, ma le lumanai.

O le faalagiga faanonapo nei o paionia ua le na o le faapolopoloina mo tagata liliu mai. A o tatou sailia e atiae se talatuu tumau o le faatuatua mo tupulaga i le lumanai, e mafai ona avea i tatou uma ma ni paionia. ■

E alala le tusitala i Iuta, ISA.



UMIAINA O LO TATOU TALATUU O PAIONIA

“Ou te alofa ma faamamalu le faatuatua ma le lototele o na paionia i le popofou o le Ekalesia. O le taimi lena sa va i vasa le mea sa nonofo ai o’u augatama. . . . Sa leai se tasi na faigamalaga i le asaina o fanua valevalenoa. Ae i le avea ai ma se tagata o le Ekalesia, ou te umia ma le lotofaafetai ma le mitamita lenei talatuu o paionia o sa’u lava ia talatuu.

“Faatasi ai ma lena lava olioli, ou te umiaina foi mo’u ia talatuu o paionia o le Ekalesia i ona po nei, o e o loo aumau i atunuu uma, o a latou tala foi o le tutumau, faatuatua, ma ositaulaga ua faaopoopo atu ai fuaiupu fou mamalu i le tali o le vii o le malo o le Atua i aso e gata ai.”

Elder Dieter F. Uchtdorf o le Korama a Apisetolo e Toasefululua, "Faatuatua o o Tatou Tama," Liahona, Me 2008, 70.

Lagona le Motusia o Fesootaiga?

Taumafai e Faalemu

Saunia e Charlotte Larcabal

Mekasini a le Ekalesia

Afai e te manatu e faatalitali i se laina umi faatasi ma apogaleveleve ma gata i lau lisi o mea e te fefe ai, e le na o oe la e faapena.

Pe tatou te tutu i le laina, poloka o le alatele, po o le tauautilo o le pasi, tatou te le fiafia i le faatalitali.

O le mea e lelei ai mo i tatou, o le faatalitali ua tutusa moni lava ma se mea e fefe i ai: o se mea tatou te fefefe i ai, ae le o se mea tatou te oo i ai i aso uma. Ua tatou ola i se vaitaimi o le le fia manao e faatali. Ua matua faatelevaveina lava e tekinolosi mea uma lea e faapuupuu ai le tatou gauai atu i se mea nai lo se i'a auro (ioe, e moni).¹ A oo ina tulai mai se manaoga e faatali, tatou te taumafai lava e faatumu o tatou taimi—e masani lava o le liliu atu i se masini feaveai.

E leai se mea e masani ona sese i tekinolosi po o le mataalia, ae o se olaga saosasoa atoa ai ma mea faalavafau faifai pea e mafai ona taofia i tatou mai se mea e sili atu ona taua.

E Sili Atu Nai Lo se Mau Mata'ina

E lei lava atu, sa ou lagona ai le see ese atu faaleagaga. Sa le mafai ona ou malamalama i ai. Sa ou alu i le lotu, fai ni tatalo pupuu, ma sioa i

a'u tusitusiga paia. Sa ou lagonaina mai lea taimi i lea taimi ni uunaiga faaleagaga, ae o le aotelega lava, sa ou lagonaina sina motusia o fesootaiga.

E pei ona ou ta'u atu i le Tama Faalelagi o se tatalo naunautai lenei, o nei upu sa oo mai i le mafaufau: "Ia [filemu], ma ia outou iloa o a'u lava o le Atua" (Salamo 46:10).

Sa peisea'i o le upu *filemu* sa faamamafaina, vase lalo, ma i se ituaiga faamatamatatele.

Atonu sa ou faia uma ni mea sa'o, ae sa ou faia na mea i se saosasoa tele ma se taulaiga papa'u. Sa amata ona ou ola i le talalelei i se auala faalavafau.

Sa leai se gaoioiga faalelotu na mafai ona aumaia ia te a'u se fesootaiga loloto faaleagaga [ma le Atua] pe afai sa puupuu ma faalavafauina lo'u auai. Sa sili atu nai lo se mau mata'ina. Ina ia iloa le Atua ma ia fesootai ma le malamalama paia ma le loloto sa ou faananau tele i ai, sa ou manaomia ai le faalemu ma ia filemu.

O le faatinoga o lena uunaiga sa le i faigofie. Ae na faia ai se eseesea atoa.

Ia Faalemu Nei . . .

Ua aoao mai Nifae, o i latou e "*saili ma le filiga* o le a maua e ia; ma o le a

E leai lava ma se tasi na fai mai, "Ou te fiafia e faatali." Ae atonu sa tatau ai ia i latou.

faaali ia te i latou mealilo a le Atua, e ala i le mana o le Agaga Paia" (1 Nifae 10:19; faapooopo le faamamafa).

Se'i o tatou vailiiliina lenei fuaiupu: O le iloaina o mealilo a le Atua e manaomia ai le *saili ma le filiga*. O se faiga masani faifai pea ma le faamoe-moe i ai, ae le o se sailiga e faatasi ona fai i le google. O le isi, o mealilo e le o ni mea e oso a'e faafuasei i luga; e faasolosolo lava ona *faaali* mai i latou. O lenei faagasologa e alu ai le taimi. Ma o lena taimi e taua tele! O le *taimi* tatou te faaluina e mafaufau loloto ma saili atu ai, na te aumaia ia i tatou le *taimi* e fesootai atu ai i le Agaga, le e ana le mana lea e oo mai ai tali.

Na tautino mai e Peresitene Tavita O. MaKei (1873–1970) e faapea o le manatunatu loloto—“o mafau-fauga loloto faifai pea i nisi o autu faalelotu”—o se “tasi lea o . . . faitotoa aupito sili ona paia lea tatou te oo atu ai i le afoaga o le Alii.”² E ala i le faalemu, e mafai ai ona tatou tatalaina se faitotoa i faaaliga. E mafai ona tatou vaai i talaatu o tulaga faatonuina le sa’o a le lalolagi ua salalau solo ma

fesootai atu i tulaga faatonuina faalelagi. Tatou te *manaomiaina* lena faitotoa. E manaomia ona tatou faalemu.

E Manaomia ai Taumafaiga

Mo a’u, o le faalemu o lona uiga o le tootuli ma tautala atu ma le leotele a o ou tatalo. O a’u taga faaaloalo ma a’u lava ia upu na faaleoina sa fesoa-soani ia te a’u e taulai lelei atili atu. O le faalemu o lona uiga o le suesueina


o tusitusiga paia mai kopi lolomi ma le tusilimaina o faamatalaga i pepa. E faaalu atili ai nisi taumafaiga ma taimi, ma o lena taumafaiga ma taimi faateleina o se auala lelei lea e “ala mai ma fafagu [ai] o outou mafau-fau,” o lea e faatagaina ai le Agaga ma le manao mo le upumoni e “galue i totonu ia te oe” ma lena fatu o le molimau ia “mauaa, ma tupu ae, ma fua mai” (Alema 32:27, 37).

E mafai ona tatou mauaina toetoe lava o soo se faamatalaga i le taina o ni mea i masini komepiuta, ae o le malamalama faaleagaga ma le liuaina e manaomia ai le *taimi* ma *taumafaiga* filiga. E le taua le *auala* e te faalemu ai ma tuuto atu taumafaiga i le talalelei, ae e taua lou faia! Afai na o le tuu mai lava o faamatalaga ia i tatou [e aunoa ma a tatou lava taumafaiga], ua tatou aveesea le tele o lo tatou auai i lo tatou lava aoaoina. Tatou te aveesea avanoa e fesootai atu ai i le Agaga.

E mafai lava ona tatou taliaina ma faaaoga ma le mautinoa tekinolosi ma mea faonapo nei ia e faafaigofieina ai galuega i aso taitasi ma mafai ai ona tatou faaaogaina ma le mataalia atili o tatou taimi. Ae e le aoga lo tatou ola i se olaga faalavefauna atoa ma manatu papa’u ia e tele ina tatou oo i ai ona o le [faaaogaina o tekinolosi]. Nai lo le fefe i le manaomia ona faatalitali, e mafai lava ona tatou taliaina e ave ma se avanoa e faalemu ai, manatunatu loloto ai, ma faalolotoina ai i lo tatou sootaga ma le Agaga. ■

FAAMATALAGA

1. Tagai Leon Watson, “Humans Have Shorter Attention Span Than Goldfish, Thanks to Smartphones,” *The Telegraph*, May 15, 2015, telegraph.co.uk.
2. *Aoaoga a Peresitene o le Ekalesia: Tavita O. MaKei* (2011), 31, 32.



Taulimaina o Fesili Faigata:

3 MATAUPU FAAVAE E MAFAI ONA FESOASOANI

O le auala leni e saili ai tali i se ala e faamalosi ai lou faatuatua.



Sa i ai sau fesili e uiga i le talalelei po o le Ekalesia? Pe sa e popole pe o le uiga o lau fesili ua le lava lou faatuatua po o le lava foi o le malosi o lau molimau?

O fesili o se vaega masani ma talafeagai o lau malaga i le olaga faaletino. E mafai ona latou taitai

atu oe i le malamalama ma le faatuatua. Peitai, o ou uiga, uunaiga, ma le faagasologa mo le sailia o tali e aafia ai le taunuuga.

I le seminare o le a e aoao ai i nei mataupu faavae e tolu o le atamai i aoaoga faavae e mafai ona fesoasoani e taiala oe i upu moni e faavavau.

1. Faatino i le Faatuatua

A i ai sau fesili, e mafai ona e faatino i le faatuatua e ala i le filifili e faalagolago i le Atua ma liliu atu muamua ia te Ia mo ni tali. E aumai e le Atua ia tali i “lea fuaitau i luga o lea fuaitau, ma lea mataupu i luga o lea mataupu” (2 Nifae 28:30). E taua le faalagolago i le molimau ua uma ona e maua i taimi e masalosalo ai.

“Masalosalo i ou masalosaloga ae e te lei masalosalo i lou faatuatua.”¹ —Elder Dieter F. Uchtdorf
 “Pipiimau i mea ua uma ona outou iloa ma tutu malosi seia oo ina oo mai le malamalama sili atu.”² —Elder Jeffrey R. Holland

2. Iloilo Manatu ma Fesili i se Vaaiga Faaletalalelei

Afai e te iloilo ina ni fesili i le anotusi o le ata o le faaolataga ma aoaoga a le Faaola, o le a mafai ona e amata vaai i mea i le ala e silasila i ai le Atua. O lenei faiga o le a fesoasoani ia te oe e toe suesueina au fesili e faaoga ai le tagavai o le upumoni a le Atua nai lo upu a le lalolagi.

“O le taula atu i upumoni e faavavau . . . o le a tatou maua ai le filemu lea e sau mai le faatuatua ia Iesu Keriso ma le iloa o loo tatou i ai

i luga o le ala i le ola e faavavau.”³ —Peresitene Dallin H. Oaks

“Afai e te iloaina soo se mea e foliga mai o loo punitiaina le malamalama ma le olioli o le talalelei i *lou* olaga, ou te valaaulia oe e tuu i se vaaiga faaletalalelei. Vaavaai e ala atu i ni tioata faaletalalelei ma ia mataalia e aua le faatagaina ni mea e le taua i le olaga e faanefuina lau vaaiga e faavavau o le fuafuaga sili o le fiafia.”⁴ —Elder Gary E. Stevenson

3. Saili le Malamalamaaga Atili e ala i Punavai ua Tofia mai le Lagi

Ua tuu atu e le Atua ia te oe ni punavai se tele e faaoga a o e sailia le upumoni. Ua aofia ai le Agaga Paia, o tusitusiga paia, lou aiga, taitai o le Ekalesia, ma e oo lava i punavai i fafo atu o le Ekalesia e faamalosi ai lou faatuatua ia

Iesu Keriso. A e saili mo ni tali, ia mautinoa ia e iloa le eseese i le va o punavai e le faatuatua ina ma punavai e faatuatua, ia o le a faamalosi ai lou faatuatua ma valaaulia ai le Agaga Paia i lou olaga.

“O faamanuiaga e tele . . . e oo mai i au taumafaga e faalatele, faalolotoina, ma faateleina lou malamalamaaga o le upumoni. Faaaoga ia tusitusiga paia ma tautinoga a perofeta e faalatele ai lou iloa.”⁵ —Elder Richard G. Scott (1928–2015)

“E faaaauu pea ona tatou sailia le upumoni mai tusi lelei uma ma isi punavai anoa. ‘Afai o i ai nisi mea e mama, matagofie, pe logoleleia pe tauleleia, matou te saili atu i nei mea’ [Mataupu Faavae o le Faatuatua 1:13].”⁶ —Elder Dieter F. Uchtdorf

Faataitai i ai mo oe lava ia!

O faataitaiga nei ua faaalai ai le auala e mafai ona faia ai. Ia manatua e le o ni tali atoatoa nei, ua na o ni faataitaiga o le auala e mafai ona taumafai ai se alii talavou po o se tamaitai talavou e tali nei

fesili mo i latou lava. O le a e manao e faaaauu pea ona suesue ma tatalo e uiga i autu o loo i ai ni au fesili e maua ai ni tali ma faamalosi ai lau molimau.

Aisea e faataga ai e se Tama Faalelagi alofa ia mea leaga e tutupu?

Faatino i le faatuatua: Na ou lagonaina le alofa o le Atua mo a’u ma iloa o loo soifua o Ia, e ui ou te le malamalama i le mafuaaga e faataga ai e le Atua mea leaga e tutupu.

Suesue manatu ma fesili mai se vaai faaletalalelei: O le faitalia o se vaega taua o le ata o le faaolataga. Ua auina mai i tatou e le Atua i lalo i le lalolagi ina ia oo i tofotofoga, faia ni faaiuga, ma maua se tino faaletino. Ae o le faatagaina o tagata e fai ni faaiuga o lona uiga o nisi taimi o le a faia ai e tagata ni filifiliga sese ma aafia ai olaga o isi tagata. Ma o tofotofoga ia e le o se taunuuga o ni filifiliga le lelei—e pei o faalavelave faalenatura, le atoatoa o le malosi, ma le oti—e mafai ona maua ai avanoa mo tatou e faamalosi ai a tatou molimau ma faalagolago ai i le Atua.

Saili le malamalamaaga atili e ala i punavai ua tofia mai le lagi:

O le a se tala a tusitusiga paia ma perofeta o aso nei e uiga i le mafuaaga tatou te oo ai i ni mea faigata? “O lou tiga ma ou puapuaga o le a nao sina minute laitiiti; ma ona oo lea, a fai e te talitalia lelei, o le a faaeaina oe e le Atua i luga” (MF&F 121:7–8). Sa saunoa Elder Jeffrey R. Holland o le Korama a Apose-tolo e Toasefululua e faapea, “E le tuua lava e le Atua i tatou, e le tuua i tatou e le lagolagoina i luitau tatou te fetai ai.”⁷ Ou te le iloa ia mafuaaga mo o’u tofotofoga uma, ae ou te talitonu na faatino e Iesu Keriso le Togiola mo a’u ma mo tagata uma. E mafai ona ou liliu atu ia te Ia ma i le Tama Faalelagi mo le filemu, malosi, ma le lagolago i taimi o o’u tofotofoga (tagai i le Alema 7:11–12).



E mafai faapefea ona ou iloa le taimi e talanoa mai ai le Agaga Paia ia te a'u?

Faaitino i le faatuatua: E ui i nisi taimi e faigata ai mo a'u ona iloina pe o o'u mauaina ni musumusuga, ae ou te iloa mai le faalogo atu i molimau a isi ma le faitauina o tusitusiga paia o le a fesoasoani mai le Agaga ia ou malamalama pe afai ou te taumafai e faalogo atu i Lana fautuaga.

Suesue manatu ma fesili mai se vaaiga faaletalalelei: Ua foai mai e le Atua ia i tatou le meaalofa o le Agaga Paia ina ia mafai ai ona tatou mauaina musumusuga e fai ai le mea sa'o. Afai ou te mauaina se uunaiga e fai se mea lelei, e mafai ona ou iloina e mai le Agaga, e tusa lava pe foliga mai o o'u lava ia mafaufauga.

Saili le malamalamaaga atili e ala i punavai ua tofia mai le lagi: Ua aoao mai tusitusiga paia: "Ia e loto maualalo; ma o le a taitai ai oe e le Alii lou Atua i le lima, ma tuu mai ia te oe tali i au tatalo" (MF&F 112:10). Sa aoao mai Elder David A. Bednar o le Korama a Aposetolo e Toasefululua e faapea "o le manao faamaoni ma le agavaa e valaaulia ai le agaga o faaaliga i o tatou olaga."⁸ Afai o loo ou taumafai ina ia loto-maualalo ma fai le mea silisili ou te mafaia ina ia agavaa ai mo le Agaga, o le a fesoasoani mai le Alii e taitai atu a'u i tali. O le a Ia aoao a'u i le auala e fetalai patino mai ai le Agaga ia te a'u.

Faaiuga

O fesili e le o se faailoga o le leai o se faatuatua; e masani lava o fesili o se faailoga o se molimau o loo tuputupu ae. A e faaitino i le faatuatua, suesue manatu ma fesili mai se vaaiga faaletalalelei, ma saili le malamalamaaga atili e ala i punavai ua tofia mai le lagi, e mafai ona e mauaina ni tali i au fesili ma se faatuatua tele atu ia Iesu Keriso. ■

FAAMATALAGA

1. Dieter F. Uchtdorf, "O Mai, ma Auai Faatasi ma i Matou," Oke. 2013 konafesi aoao.
2. Jeffrey R. Holland, "Le Alii e, Ua Ou Faatuatua," Ape. 2013 konafesi aoao.
3. Dallin H. Oaks, "As He Thinketh in His Heart" (Church Educational System devotional for young adults, Feb. 8, 2013), lds.org/prophets-and-apostles.
4. Gary E. Stevenson, "Gasetoto Faaleagaga," Oke. 2017 konafesi aoao.
5. Richard G. Scott, "O le Mauaina o le Poto Faaleagaga," Oke. 1993 konafesi aoao.
6. Dieter F. Uchtdorf, "O Le A le Upumoni?" (Church Educational System devotional for young adults, Jan. 13, 2013), broadcasts.lds.org.
7. Jeffrey R. Holland, "O Auaunaga a Agelu," Oke. 2008 konafesi aoao.
8. David A. Bednar, "O Le Agaga o Faaaliga" Ape. 2011 konafesi aoao.

MAIMOA I LE AUALA E AOGA AI LENEI MEA

Maimoa i le ata vitio o le "Tala a Madison" e tagai ai i se tamaitai talavou na oo i lenei faagasologa e tali ai ana lava ia fesili. Asiasi i le [lds.org/go/71853](https://www.lds.org/go/71853).



*E mafai faapefea ona ou
tausia se tagata ma se uiga
faigata faapea?*

INA UA FAIGATA LE **AUAUNA ATU**

Saunia e Lyka T. Valdez

O se tasi o mea aupito sili ona luitauina ua ou faatoilaloina, o lo'u uiga "Ou te le kea." Sa ou le pulunaunau i mea sa ou faia, sa ou ita ma lē onosai i tagata.

Sa suia atoa lenei uiga i se tuuaga a le aoga ina ua talosagaina a'u e tausii lo'u tama matua e 76 tausaga le matua. O "Papa," e pei ona matou valaauina ai o ia, sa mafatia i le pe o le tino (stroke), lea sa pe atoa ai le afa o lona tino. Ina ua talosaga a'u e lo'u aiga e tausii o ia mo le lua masina, sa le mafai ona ou mafaufauina pe faapefea ona fai!

Sa tatau ona ou vave ala i luga e sauni lana malu taeao, lana vai taele, ma ana vailaau faafomai. Sa ou fesoasoani ia te ia e savalivali solo mo ana faamalositino i aso taitasi. Talu ai e faigata ona fealuai, o lea sa ou i ai i ona talaane i taimi uma, sa aofia ai le taimi e faamālū ai ma le falemamao. I le avea ai ma se teine 18 tausaga le matua, o le vaega lenei sa sili ona faigata.

E ese ai mai nei mea uma, sa faigata ona faatasi ma ia. E le o ia o se tagata o le Ekalesia ma sa ese ana mataupu faavae nai lo a'u. O ia o se toeaina sa tumu i faanoanoaga—sa faataio i taimi uma, e le taitai ata, ma fai mai soo, "O le a ou oti!" Ona o lenei uiga, sa faigata ai mo i ma'ua ona fefaasoa'i i se sootaga lelei.

O le taimi muamua, sa ou faia mea uma na mafaia e aloese ai mai a'u feau, ae sa le aoga lena faiga. O lea sa ou filifili ai e sui o'u uiga ma tuu atu la'u taumafaiga silisili ona lelei.

I le mavae ai o se vaiaso o lenei uiga fou, o le auauna atu ia Papa sa oo ina avea ma se olioliga ia te a'u. Sa faatupulaia lo'u onosai, ma sa oo ina ou malamalama i ona mafatiaga.

A o ou auauna atu ia te ia, sa ou le toe manatu ia te ia o se avega ae nai lo lena, o se avanoa e fatua'i ai ni taimi lelei faatasi ma ia.

Sa suia foi Papa. O lenei toeaia mata faasia sa avea ma tamamatua laumatafiafia ma agamalu. Sa oo lava ina fiafia e faalogologo i pese o Faapitoa mo le Autalavou (EFY).

I se tasi po na ou faalogo atu ai ia te ia o manamananū mai, o lea sa ou tilotilo atu ai i totonu o lona potu e fia iloa po o le a lana mea o fai. Sa tatalo o ia mo le taimi muamua. Sa musuia lava a'u i aso uma e lenei suiga.

O lea la ua ou toe foi i le kolisi, ae o loo ou alu pea faalua i le masina e asi Papa faatasi ma lo'u aiga. Ma te aai faatasi ma ia ma pepese faatasi ma ia. Ua faateteleina le faaletonu o lona soifua maloloina, o le taimi nei la o le fesoasoaniga aupito sili ona mamana e mafai ona ou avatu o tatalo mo ia.

Ou te faafetai mo le avanoa e tausi ai Papa ona sa fesoasoani ia te a'u e iloa mea ou te gafatiaina ona avatu. O le alofa o se mea mamana tele—na ia faamaluluina uma o ma loto ma Papa. Ua ou aoaoina le uiga o le ositaulaga ma le aagalofa. O le mea moni, e faamalalalama e le alofa mama loto uma! ■

E alala le tusitala i Santiago, Filipaina.



AUAUNA ATU I LOU AIGA

“Amata lau auaunaga i o outou lava fale ma i totonu o o outou lava aiga. O loo i ai sootaga e mafai ona faavavau. E tusa lava pe afai—ma aemaise lava pe afai—o le tulaga o lou aiga e itiiti ifo ma le atoatoa, e mafai ona e maua auala e auauna ai, siitia, ma faamalolosia. Amata i le mea o e i ai, alofa ia i latou i o latou tulaga o i ai, ma saunia mo le aiga e te fia manao ai i le lumanai.”

Bonnie L. Oscarson, Peresitene Aoao o Tamaitai Talavou, “O Manaoga i o Tatou Luma,” konafesi aoao Oke. 2017.



1. FAAAOGA TUSITUSIGA PAIA MA AOAOGA A PEROFETA O ASO NEI (TAGAI MF&F 52:9).

O le fatu lea o lau lauga. Aua o le tasi lea o mafua-aga autu ua tatou i ai i le Lotu—ia aoao atu ma aoao mai le talalelei a Iesu Keriso. E mafai ona e suesueina lau autu faatasi ma le fesoasoaniga a le Taiala i Tusitusiga Paia (i le scriptures.lds.org) ma lauga o le konafesi aoao (saili e ala i autu i le gc.lds.org). la mautiloa ua e malamalama i mau ma upusii ua e fuafua e faaoga i lau lauga. Afai e te manaomia se fesoasoani, fesili i ou matua po o taitai o le Ekalesia.

2. VALAAULIA LE AGAGA. O se manatu lelei i taimi uma le muai tatalo ma saunia ia maua le Agaga e faatasi ma oe a o e lauga atu. E le gata e aumai e le Agaga le mafanafana i ou musele, ae e molimau mai foi o la e uiga i le upumoni (tagai i le MF&F 42:14). Valaaulia le Agaga i a outou sauniga faamanatuga e ala i le tuuina atu o lau molimau e uiga i mea e te talitonu i ai e moni.

3. MAFAUFAU I SE TALA PATINO. O se tasi o auala sili e faia ai fesootaiga ma isi o le auala atu lea i tala. Tatou te fiafia e faalogo atu i aafiaga o isi ma pe faape'i o latou olaga. O lea ia taumafai ai e mafaufaui se aafiaga mālīe, tulagaese, pe lu'itauina na e oo i ai lea e fesootai ma le mataupu faavae o le talalelei ua atofa atu ia te oe e lauga i ai. O le a se mea na e aoaoina mai lena aafiaga? Na faapefea ona fesoasoani ia te oe? O se auala sili lea e tatala ai lau lauga pe afai e te le o iloa pe faapefea ona amata.

4. FAATAITAI, FAATAITAI, FAATAITAI! A uma ona e tusia lau lauga, atonu e te manao e faataitai ona lauga leotele na o oe, ona lauga lea i luma o tagata o lou aiga po o ni uo. E mafai ona e iloa ina pe o i ai lau lauga i totonu o le taimi faatapulaaina ma pe o i ai ni vaega e manaomia ona e faamaninoina. Afai e malie i ai le epikopo, e mafai foi ona e alu muamua i le tou falesa e faataitai ai lau lauga i luga o le pulelaa!

7

MOTUGĀ'AFĀ mo
LE TUUINA ATU
O SE LAUGA

*E te lauga i le sauniga
faamanatuga i se taimi vave?
Faataitai motugā'afa nei.*

Saunia e Sarah Hanson

Ou te le iloa ia te oe, ae a tofia a'u e lauga i le sauniga faamanatuga, ou te lagona lava le popolevale—e le ona o le tusiga o le lauga ae o le *tuuina atu* moni o le lauga. Ou te popole i taimi uma, “Ae a pe afai e pe iva [la'u lauga]? Ae faapefea pe afai e galo ia te a'u ona ta'u atu se mea? Ae faapefea pe afai e feseta'i ia te a'u se upu?”

Na e lagonaina lea lava lagona e tasi? (Talosia e le na o a'u.) Afai o lea, ia e le o le iuga lea o le lalolagi! Siaki motugā'afa nei e fitu e faaleleia ai ou tomai tautala ma tuu atu ai se lauga mataalia.

TUUINA ATU O LE LAUGA



5. ALOESE MAI LE AMATAINA I LE “OU TE LE O FIA TU ATU I LUGA NEI.” O lea amataga e mafai ona tele ni ona foliga eseese, ae o le toatele o le au faafofoga e vave lava ona latou iloaina. E masani lava o se mea faapenei, “Ina ua valaau mai le epikopo ia te a’u e talosagaina pe mafai ona ou lauga, sa ou taumafai lava e mafaufau i se ‘alofaga e le faia ai.” E mafai e le toatele o tagata o le Ekalesia ona malamalama i le le toafimalie e ono oo i ai le lauga atu, ae a tau na ona e faapea atu, “Ou te le o fia i ai iinei,” e mafai ona lagona e tagata lena mea o le “Faamolemole aua ne’i faalogo mai ia te a’u.” O le mea sili lava o le aloese mai lena amataga atoa lava—ia naunautai i lau autu!

6. TAUTALA MA LE MANINO. O se mea masani lava mo se tasi le tautala vave pe lemu foi ona o musele. Ou te matua iloa lelei! Ae e taua le tautala ma le manino a o e tuu atu lau lauga ina ia mafai ona malamalama le potopotoga ia te oe. Ia faia se taumafaiga mataala e faalemu, faaleo au upu, ma ia talafeagai le leotele (ioe, e oo lava i se faaleotele leo, e mafai lava ona tau le lagona). E fia faafofoga lava tagata i mea e te saunoa ai!

7. IA TILOILO PE I LUGA. O le tepataulai atu i tagata o se vaega taua tele o fesootaiga lelei. O loo faaalua ai o loo e taulai atu ma le faamaoni ma saofagā i se talanoaga. Ia, e te le tau tepataulai atu i tagata uma i le potopotoga a o e lauga atu, ae e tusa foi pe e te tilotilo i luga i le pito i tua po o luma o le potu, o le a sili atu ona e mata’ina o se failauga. Aloese mai lou punou ai pea ma tilotilo i lau lauga! E fia vaai atu le au faafofoga i lau ataata, ae le o lou tumua’i.

E oo foi lava i nei motugā’afa e fitu, e te ono fesasia’i foi ni upu pe matauina foi se tasi o moe i le atulaina nofoa lona tolu. Ae pe avea ai la oe ma se failauga le lelei? E leai lava!

A tatou faia se mea e le masani ai mai lo tatou tulaga toafimalie, e masani lava ona lagonaina le atuatuvaale pe faia foi ni nai mea sese laiti. Ae a tau lava ina e taumafai i le mea silisili ma valaaulia le Agaga, e le afaina la pe e te tau fetu’u pe galo foi se mea ona ta’u atu. O loo e faia le galuega a le Atua ma fesoasoani i Lana fanau ia aoao atili e uiga i le talalelei!

Afai e te aoao atu ma molimau atu i mea ua e talitonu i ai, o le a lelei mea uma. ■

E alala le tusitala i Iuta, ISA.

O A Mea Tatou Te Faia i le Malumalu?

O le malumalu o se nofoaga paia e mafai ona tatou faalatalata atili atu ai i lo tatou Tama Faalelagi ma Iesu Keriso. I totonu o le malumalu, e aooina ai i tatou i upumoni taua, auai ai i sauniga faaleperisitua (sauniga paia), ma osia ai feagaiga (folafolaga paia) faatasi ma le Atua e saunia ai i tatou e toefoi atu i Lona afoaga.

E mafai ona tatou mauaina sauniga mo i tatou lava faapea ai foi ma o tatou tuua. Mo se faataitaiga, e mafai e talavou ona auai i papatisoga e fai ai ma sui o o latou tuua ma isi sa lei mauaina le avanoa e papatiso ai i le pule tatau a o soifua i latou. Mo tagata matutua, o isi sauniga o le malumalu e aofia ai faaeega paia ma faamauga (e pei o faaiipoipoga faalemalumalu).



Papatisoga ma Faamauga mo o Tatou Tuua

O le papatisoga ma le faamauga e taua i le faaolataga o tagata uma e mafai ona tali atu, o e sa ola i le lalolagi (tagai i le Ioane 3:5). Peitai, e toatele tagata ua maliliu e aunoa ma le mauaina o le avanoa e faalogo ai i le talalelei pe mauaina foi nei sauniga. E ala i le alofa tunoa ma le alofa mutimutivale o Iesu Keriso, o se ala lea ua saunia mo tagata uma e maua ai nei faamanuiaga. I totonu o malumalu, e mafai e tagata agavaa o le Ekalesia ona faatino papatisoga e fai ai ma sui o i latou ua maliliu. I le lalolagi o agaga, o loo tala'i ai le talalelei (tagai MF&F 138), ma o i latou e faalogo i ai e mafai ona filifili e talia [le talalelei] ma sauniga e faatino mo i latou.

O FAAPEFEA ONA E SAUNIA?

E mafai faapefea e le tausiga o au feagaiga o le papatisoga ona fesoasoani ia te oe e saunia ai e maua sauniga o le malumalu?

.....
.....
.....

O a nisi mea e te manaomia ona fai e saunia ai e maua sauniga o le malumalu?

.....
.....
.....

O aoga lau pepa faataga o le malumalu. Afai e le o i ai sau pepa faataga o le malumalu, e mafai ona e faatulagaina se taimi e vaai ai lou epikopo po o le peresitene o le paranesi.

.....



O LE MALUMALU: O SE FAATUSA O LO TATOU FAATUATUA

“O malumalu taitasi o se faatusa lea o lo tatou faatuatua i le Atua ma o se faamaoniga o lo tatou faatuatua i le olaga pe a mavae le oti. O le malumalu o se faamoemoega lea o gaoioiga uma, lesona uma, ma laasaga uma e agai ai i luma i le Ekalesia. O a tatou tau-mafaiga uma i le talaiina atu o le talalelei, faaatoatoaina o le Au Paia, ma le togiolaina o e ua maliliu e tau atu i le malumalu paia.”

Peresitene Russell M. Nelson, “Ia Saunia mo Faamanuiaga o le Malumalu,” *Liahona*, Oke. 2010, 46.

Faaeega Paia

O le upu *faaeega paia* o lona uiga o le “meaalofa.” O le faaeega paia o le malumalu o se meaalofa lea mai le Atua lea Na te tuuina atu ia te oe faamanuiaga faapitoa, e aofia ai le "mana mai luga" (MF&F 95:8).

Ina ua e auai i le Ekalesia, sa e mauaina ni sauniga se lua—papatissoga ma le faamauga. O le faaeega paia o le malumalu e maua foi i ni vaega se lua. Muamua, e te mauaina le sauniga amata, lea e “mulumulu” mama ai oe i se faiga faafaatusa ma tauagafau ma maua ai faamanuiaga faapitoa e faatatau i lou tofi paia ma le gafatia e faavavau. I le vaega lona lua, e te mauaina le vaega o totoe o lou faaeega paia a o e aoao atili e uiga i le ata o le faaolataga, e aofia ai le Fofofoaga, lo tatou faamoemoega i le lalolagi, ma le misiona ma le Togiola a Iesu Keriso.

I le taimi o le faaeega paia, tatou te faia ai ni folafolaga faamaoni ia usiusitai i le Atua, mulimuli ia Iesu Keriso, ia ola mama a’ia’i, ma fesoasoani e fausia le malo o le Atua. Afai tatou te tausua a tatou feagaiga, tatou te maua folafolaga o le mauaina o faamanuiaga uma e faavavau a le Atua.

Faamauga

O aiga e totonugalemu i le fuafuaga a le Atua mo lo tatou fiafia. O le tuufaatasia o aiga e faavavau o le faamanuiaga silisili lea o loo maua i totonu o le malumalu e ala i le pule faamau o le perisitua—le pule lava lea e tasi sa ta’u atu e Iesu i Ana Aposetolo (tagai i le Mataio 16:19). O faamauga o le malumalu ua mafai ai e tane ma ava ma fanau ma matua ona faatasia e faavavau e ala i lo latou faamaoni i a latou feagaiga. ■



Ina ia aoao atili e uiga i le alu i le malumalu mo le taimi muamua, asiasi i le “Inside Temples” i le [lds.org/temples](https://www.lds.org/temples).

O Se Tulaga o

LAGONA FAANOANO

Sa ou iloa lava e tatau ona ou fiafia i le Sapati, ae ou te leiloa pe faapefea.

Saunia e Alyssa Nielsen

Ua ta'u mai e tusitusiga paia o le aso Sapati o se aso paia. O se aso olioli ma fiafia, o se aso e malolo ai, o se aso faamanatu.¹ Ae i ni nai tausaga talu ai, a o ou talavou, sa ou maua ni Aso Sa faanoanoa. Nai lo le filemu, sa ou lagona le atuatuvaile. Nai lo le olioli, faanoanoa. Nai lo le faamoemoe, ta'usalaina. Sa i ai ni ou lagona malolosi o le faanoanoa i le Sapati.

O taeao o Aso Sa taitasi, pe a maea se taimi tele o le maasiasi i le lafi i lalo o lo'u ieafu, e i'u lava ina ou ioeina o le Aso Sa moni lea ma fai ai loa o'u ofu mo le lotu. I le lotu, ou te iloiloaina

lo'u vaiaso ua tuanai. I le taimi o le faamanatuga, ou te faaopoopo uma mea na ou toilalo ai, e tu a'e lava le failauga muamua e le'i taitai lava uma [na faaopoopo]. O le vaega atoa e totoe o le lotu e avea ma se taua o le tautao fiofi o loimata a o faateteleina le ta'usalaina i faanoanoaga fou o lagona le fiafia tele i le lotu.

Sa faapena foi ma le aoauli. Ou te lagona le ta'usalaina i filifiliga ua tuanai, atuatuvaile i filifiliga o le lumanai, ma le faanoanoa i tulaga o loo i ai i le taimi nei. A aunoa ma le aoga ma gaioiga faaopoopo e faalavelave ia te

a'u, ou te faaaluina lo'u taimi e mafau-fau ai i manatu le lelei.

Ina ua maea ona faalogologo, faitau, ma toe faitau le saunoaga a Peresitene Russell M. Nelson i le konafesi aoao ia Oketopa 2015 e uiga i le auala e avea ai le Sapati o se aso fiafia, sa ou tatalo mo le filemu ma le fiafia mo le Sapati nai lo le faanoanoa lea sa ou lagonaina i le taimi nei.² Ma sa oo mai se tali.

Tulai Atu i le Tama Faalelagi ma Iesu Keriso

Sa ou lagona le uunaia e sui la'u tulaui mai o'u pagatia i la'u sootaga



ATA NA TUSIA E DAVID STOKER

O LE SAPATI

ma le Tama Faalelagi ma le Faaola. Nai lo le mafaufau loloto i o'u toilalo, sa ou faaalu le taimi e mafaufau loloto ai i lo La aafiaga i lo'u olaga.

A oo mai mafaufauga le lelei, sa ou ta'u soo ia te a'u lava mea sa ou iloa ma talitonu i ai e uiga i le Atua ma Iesu Keriso: O a'u o se afafine o le Atua. E alofa o Ia ia te a'u. O Iesu Keriso o lo'u Tuagane, ma na Ia togiola mo a'u. E finagalo i Laua ia ou fiafia ma toefoi atu ia te i Laua. O le Sapati o se meaalofo mai le Atua.

Sa amata ona ou faatino le faatua-tua i lenei molimau.

Talia ma le Agavaa le Faamanatuga

O le suia o la'u taulaiga na taitai atu ai a'u e toeiloilo foi le auala na ou taulimaina ai le faamanatuga. Mo se taimi umi na ou taulimaina ai le faamanatuga o se taimi e faasala ai a'u lava ia. Ae e le o lona faamoemoega lena. O le faamanatuga o se sauniga paia e toe faafou ai a tatou feagaiga. O se avanoa e toe faamamaina ai e ala i le mana togiola a Iesu Keriso. O le taulai atu i le sauniga ma le feagaiga i le faatua-tua ma se loto salamo, na ou iloa ai sa ofo mai e le faamanatuga le

filemu a o ou taliaina le meaalofo o le faamagaloga, tausia o a'u feagaiga, ma le mauaina o le Agaga o le Alii (tagai i le MF&F 20:77, 79).

O le mafaufau i le Togiola a Keriso i le taimi o le faamanatuga na aumaia ai se isi meaalofo i lo'u mafaufau. E le gata na mafai ona faamagaloina a'u, ae sa mafai foi ona ou mauaina le faamalologa ona na tauaveina e lo'u Faaola i Ona lava luga o'u tiga ma vaivaiga (tagai i le Alema 7:11–12). Na auala mai i Lana Togiola ma le faamanatuga, sa mafai ai ona ou maua le filemu ma le malosi i le Sapati—po o se isi foi lava aso—nai lo le atuatuvaile ma le faanoanoa.

Ma sa ou mauaina lena filemu. O loo i ai lo'u Faaola iina mo a'u i Aso Sa ma taimi uma!

Faataitai Onosai Faatua-tua

Sa le o se vaifofo lea e tasi le vai-aso. Sa avea o se tauiviga, ma sa alu ai se taimi. “Ae peitai a tatou faamoe-moe i le mea ua le vaaia, tatou te faatalitali atu i ai ma le onosai” (Roma 8:25). Sa faaauau pea ona ou galue i la'u taulaiga ma tatalo ia lagona le fiafia mo le Sapati.

I le aluga o taimi, sa ou maua le filemu ma le fiafia i lena aso paia, ae sa lei mafai ona ou faavaivai ai iina pe toe see atu foi i faanoanoaga o le Sapati. O vaiaso taitasi e manaomia ai se taulaiga filiga i le Faaola ma le faamoemoega o le Sapati, ae ou te iloa o le folafolaga o le filemu ma le olioli e moni lava. ■

E alala le tusitala i Iuta, ISA.

FAAMATALAGA

1. Tagai i le Esoto 20:11; Esoto 31:15; Levitiko 23:32; Isaia 58:13; Mataupu Faavae ma Feagaiga 59:13.
2. Tagai i le Russell M. Nelson, “O Le Sapati o se Aso Fiafia,” *Liahona*, Me 2015, 129–32.

ATA O FAASOLOGA O TAALOGA

O NISI ENA O SEMASINA LE UMI,

FAAFAAFAA

O ISI ATA O
FAASOLOGA
O TAALOGA E TUMAUE



O le ata leni o le faasologa o taaloga o le fu o le Lalolagi 2014 ma e fa o se valouga o soo se taumilasoaga i le lumanai.

E Mafai Ona E Agavaa mo le Malumalu

Saunia e Elder Quentin L. Cook

O Le Korama a Aposetolo e Toasefululua

Olo tatou naunautaiga sili o le ola lea o tagata o le Ekalesia ia agavaa mo se pepa faataga o le malumalu. Faamolemole aua nei vaai atu i le malumalu o se sini mamao ma masalo o se sini e le mafai ona ausiaina. O le galulue ai ma o latou epikopo, e mafai ai e le toatele o tagata ona ausia tulaga manaomia uma amiotonu i se taimi puupuu lava pe a i ai so latou naunautaiga ia agavaa ma salamo atoatoa i solitulafono. E aofia ai ii ma le naunautaiga ina ia faamagalalo i tatou lava ma aua nei taulai atu i o tatou faaletonu po o agasala tatou te le agavaa ai e ulu atu i se malumalu paia.

Na faataunuaina le Togiola a le Faaola mo fanau uma a le Atua. Na faamalieina e Lana taulaga togiola ia manaoga o le faamasinotonu mo i latou uma o e ua salamo moni. Ua faamatala mai e tusitusiga paia lenei mea i se auala sili ona matagofie:

“E ui lava ina pei o ofu mumu a outou agasala, e sisina ia e pei o le kiona” (Isaia 1:18).

“Ma ou le toe manatua i [latou]” (Jeremia 31:34).

Matou te faamautinoa atu ia te outou o le ola amiotonu i mataupu faavae o le a aumaia ia te oe ma lou aiga le fiafia, faamalieina, ma le filemu. O tagata o le Ekalesia, tagata matutua uma ma talavou, latou te faamaonia lo

latou lava agavaa pe a latou tali i fesili o le pepa faataga o le malumalu. O le tulaga manaomia taua lava o le faateleina lea o la tatou molimau i le Atua le Tama; Lona Alo, o Iesu Keriso; ma le toefuataiga o Lana talalelei ma lagonaina le auaunaga a le Agaga Paia.

Faamolemole ia silafia lo tatou mananao ma le naunautai ina ia faia e tagata uma soo se suiga talafeagai ia agavaa ai mo le malumalu. Ia iloilo ma le agaga tatalo po o fea o e i ai i lou olaga, saili le taitaiga a le Agaga, ma talanoa i lou epikopo e uiga i le sauniaina o oe lava mo le malumalu. Sa saunoa mai Peresitene Thomas S. Monson (1927–2018) e faapea, “E leai se isi sini e sili atu ona taua mo oe e te galue agai i ai nai lo le agavaa e alu i le malumalu.”¹

Ou te tatalo o le a taitoatasi i tatou ma faamamaluina le Faaola ma faia soo se suiga talafeagai ia “vaaia ai i tatou lava i totonu o Ona malumalu paia. O le faia o lea mea, tatou te mafai ai ona ausia Ona faamoemoega paia ma saunia i tatou lava ma o tatou aiga mo faamanuiaga uma a le Alii ma Lana Ekalesia ia e mafai ona tuuina mai i lenei olaga ma le faavavau. ■

Mai se saunoaga i le konafesi aoao ia Aperila 2016.

FAAMATALAGA

1. Thomas S. Monson, “O Le Malumalu Paia—o se Sulu i le Lalolagi,” Ape. 2011 konafesi aoao.



Sa fanau i **Logan, Iuta** i le aso 8 o Setema, 1940

Mai le 1960 i le 1962, sa ia auauna atu i le

Misiona a Peretania,

ma o Elder Jeffrey R. Holland o se tasi o ana soa.



Sa lagolagoina o se uso o le

Korama a Aposetolo e Toasefululua

i le aso 6 Oketopa, 2007



Sa taalo i taaloga o le suega siamupini o le setete i le

lakapi ma le pasiketipolo i le aoga maualuga.

Faaipoipo atu ia Mary Gaddie i le

Malumalu o Logan Iuta

i le aso 30 o Novema, 1962



E toa 3 le fanau ma fanau a fanau e 11



O Le Malaga a Isapela



Saunia e Jessica Larsen
E faavae i se tala moni

Pasila, 1992

Sa taupulapula Isapela i luga i le lanumoana malosi o le lagi. Sa lei iloa atu ni puao. Sa ia faasusu ona laugutu mamago.

Sa talatalanoa lemu ona matua ma Peresitene Santiago, le peresitene o le siteki. Sa leotele tele le afi o le vaa sa le mafai ai ona ia lagona i latou. Ae sa ia iloa le mea sa latou talanoa ai. Sa le toe i ai se vai inu.

Sa taumafai Isapela e taulai atu i le mafuaaga mo le latou malaga. Sa latou o i le malumalu ina ia faamauina o se aiga! Sa ia manatua le faalogo atu i ona matua o talanoa e uiga i le matagofie o le malumalu i São Paulo talu lava lona teineitiiti. O le o iina sa foliga mai na toetoe lava e pei o se tala faagogo. E ui i mea uma, sa nonofo le aiga o Isapela i Manaus, i le lotolotoi o le vaomatua o le Amasone, ma o le malumalu sa silia ma le 2,000 maila (3,219 km) le mamao ese.

Ona fuafua lea e Peresitene Santiago se malaga e onosao e o ai iina. E silia ma le 100 tagata o le au paia sa filifili e o ai. “O le a aveva ma se taulaga,” Sa ta’u atu ai e *Mamãe* ia te ia. “Ae o le ositaulaga e aumai ai faamanuiaga.”

I le taimi muamua sa faafiafiaina lava le malaga. Sa latou momoe i luga o upega sa taupe i luga o le fola o le vaa, pepese i viiga, ma faitau tusitusiga paia.

Ona oo lea ina leai se vai inu, ae o le vai o le vaitafe sa palapala tele i le inu.

Sa lagona e Isapela le pa’i atu o *Mamãe* i lona lima. “O loo faapotopoto faatasi e Peresitene Santiago i tatou uma,” o lana tala lea. “O le a tatou tatalo mo se timu.”

Sa auai Isapela i le vaega, ma amata loa le tatalo. Ina ua maea le tatalo, sa ia lagona le mälū o le ea na pa’i atu i lona ua. Sa ia tamoe atu i le itu o le vaa ma manava ai. Sa fotu mai ni puao matagi paauli ma agai mai ia i latou. Sa le’i pine ae amata ona maligi ifo le timu! Sa tatala atu lona fofoga e pu’e ai suätimu i lona laulaufaiva.

“Vave!” sa alaga atu ai *Mamãe*. “Aumai pakete, falai—soo se mea a!”

Sa uu mai e Isapela se falai ma faalala atu. Sa ia manao e pu’e uma le suavai na te mafaia. Sa galulue faatasi tagata uma, taliē ma fiafia. Sa le’i pine ae fai se latou pati tele i le susū! Sa na o le 15 minute le umi o le matagi. Sa lava lea mo i latou e maua ai le suavai uma sa latou manaomiaina. O se vavega lava.

Sa le’i pine ae taunuu le vaa i le laueleele. Ae o loo toetoe pea le 1,500 maila (2,414 km) latou te o ai. Sa feosofi uma tagata i luga o le pasi mo le vaega o toetoe o le malaga. Mo ni aso, na salutu solo le pasi i auala gaoa.

O le a umi ma lamatia le malaga, ae o le oo atu i le malumalu o le a tauia.



O FAAMANUIAGA LE MAFATAUINA

“O faamanuiaga o le malumalu e le mafaatauina.”

Peresitene Thomas S. Monson, (1927-2018), “Faamanuiaga o le Malumalu,” *Liahona*, Me 2015, 93.



I se tasi taimi na malosi ai le patatu o le pasi na ta’e ai le faamalama tele i luma! O isi taimi na latou oso atu ai i totonu o aai vevela ma tumutumu. Ae pau le mea lelei ai o auala iina sa lei goaia tele!

Sa lotofaafetai tagata uma i taimi uma pe a latou tutu i se nuu po o se taulaga e aai ai. Sa latou aai i falesa pe aai faatasi foi ma tagata o le Ekalesia i le aluga o le malaga. O le po muamua lava, na latou taunuu ai i le leva o le po, sa popole ai Isapela ina ne’i leai se tasi e faatali mai. “Aua le popole,” sa fai atu ai *Mamāe* ma se ataata lēlavā. “Vaai!”

Sa tutu mai le peresitene o le paranesi ma tagata o le Ekalesia i tafatafā ala. Sa latou uu maia se fu’a sa faitauina “O le ositaulaga e aumai ai faamanuiaga.” Na ataata Isapela. E sa’o a *Mamāe*!

I le mavae ai o aso goaia, sa i’u loa ina latou taunuu i São Paulo. Sa tu Isapela i luga o lona nofoa ina ia maua se vaaiga lelei atu a o taamilo ai le pasi i le pioga. Sa faafuasei ona feei tagata i luga o le pasi i le fiafia. “*O templo! O templo!*” Sa mafai ona latou iloa atu le tumutumu umi, lauiti o le malumalu i luga a’e o laina niu. Sa susulu ifo le la i luga o le agelu auro o Moronae.

Sa vaivai tagata uma, ae sa leai se tasi na fia malolo. Sa latou mananao ina ia faamauina loa i le taimi lava lena. Ina ua oo i le taimi mo lona aiga e faamau ai, sa fai ma le faaeteete e Isapela ona laei papae. A o ia savali atu i totonu o le potu o faamauga, sa ia vaaia le fiafia o lona tama. Sa maligi ifo loimata o le olioli i fofoga o *Mamāe*. O le latou malaga sa umi ma sa lamatia foi.

“Ae sa tauia le ositaulaga,” sa mafaufau ai Isapela.

Sa ia ataata a o ia [tootuli] i lona tulaga ina ia faamauina i lona aiga e faavavau. ■

E alala le tusitala i Texas, ISA.



I le 2012 sa fausia ai se malumalu i Manaus, Pasila, lea sa ola a’e ai Isapela. E oo ifo i lena taimi, ua matutua Isapela ma isi o le fanau faatasi ma o latou lava ia aiga. E toatele i latou na o mai e vaai i lena malumalu fou matagofie ma manatua ai la latou lava malaga.

Saunia e Jenna Koford

E faavae i se tala moni

“E i ai so’u aiga i lalo nei. Alolofa ia te a’u” (Tusi Pese a Tamaiti, 188).

A netelea! Le pasi lea ua tu!” Sa valaau mai ai Nana. Sa tamoe atu Anetelea i le faitotoa. Sa ia faatofa atu ia Nana, Papa ma lona tuafafine laititi, o Eimi. Sa laititi tele Eimi e alu i le a’oga, o lea sa nofo ai i le fale ma Nana ma Papa.

Sa fiafia Anetelela i le A’oga. Sa fiafia o ia e taaalo ma ana uo i le malologa. Sa fiafia o ia i lana faiaoga, o Ms. Kimball.

Ina ua mavae le malologa o le taeao, sa fai mai Ms. Kimball, “O le vaiaso fou o le a faia ai le tatou Aso o le Aumai-se-Matua-i-le-A’oga. A o mai tou matua, ia mautinoa latou te aumaia se mea mai i a latou galuega

Sa le’i mautinoa tele Anetelea e uiga i le Aso o le Aumai-se-Matua-i-le-A’oga.

O Matua
Matutua Lelei



e faaali mai ia i tatou. Ua matou fiala lava e faalogo atu ia i latou!”

Na vevela foliga o Anetelea. Sa le'i i ai ma se mea na te faamatalaina e uiga i ona matua. Na te le manatuaina ni mea se tele e uiga i lona tina. Sa aluese [lona tina] a o laititi lava o ia ma sa le iloaina e Anetelea lona tama.

Sa faalogo Anetelea a o talanoa isi tamaiti e uiga i o latou tina ma tama. O le tina o Tony o se fuimu, ma o le tama o Jessica sa faigaluega i le pāmanu. Sa faamoemoe tamaiti uma o le a aumai e lona tama se manuki po o se solofa (sloth) i le vasega!

“Ae a ou matua?” Sa fesili ai Tony ia Anetelea.

Sa tilotilo Anetelea i ona vae. Sa faamimigi ona tauau. “Matou te nonofo ma o'u matua matutua.”

Sa alofa Anetelea ia Nana ma Papa, ae sa le'i i ai ni a la galuega lelei. Sa faatau atu e Nana ia palanikeke ma ofu pepe. Sa ave e Papa se loli lapoa o meai. Sa le'i mautinoa tele Anetelea e uiga i le Aso o le Aumai-se-Matua-i-le-A'oga.

O lena po na faitau ai Anetelea i le mataupu muamua o le Tusi a Mamona: “O au o Nifae, na fanaua e ni matua lelei . . .” (1 Nifae 1:1).

“Matou te le o nonofo ma o'u matua,” sa mafaufau ai Anetelea. “O lea matou te nonofo ma Nana ma Papa.”

Ae savali atu loa Eimi i totonu o le potu o Anetelea, ma fusi se palanikeke mafanafana. Sa ia tuu i luga e vaai i ai Anetelea. “Sa fai e Nana!”

“Ioe, sa fai e Nana mo oe.” Sa ataata teisi Anetelea.

Sa ia mafaufau i mea mananaia uma sa faia e Nana mo ia—faia o le malu taeao a o lei amata le aoga, fesoasoani i ana meaaoga, taaalo i taaloga ma ia ma Eimi. Sa matua pei lava Nana o se tina.

Ona mafaufau lea o Anetelea ia Papa. E faitau e Papa tala ia Anetelea i po uma. Sa ia fesoasoani foi i ana meaaoga. Sa ia aoao foi Anetelea e tietie i se uila vilivae. Sa matua pei lava Papa o se tama.

Sa faateleina le ataata a Anetelea. Sa matua lotofaafetai o ia mo Nana ma Papa. Sa ia lagona pea le popole e uiga i le aumaia o matua matutua i le a'oga. Ae o le a lelei lava. “Atonu e leai ni o'u matua lelei,” sa ia mafaufau ai, “ae e i ai ni o'u matua matutua lelei, ma o se mea faapitoa lena.”

I le Aso o le Aumai-se-Matua-i-le-A'oga, sa saofafai ai Anetelea ma Papa i le pito i tua o le vasega ma faalologolo i matua o isi tamaiti. Sa aumai e le tina o Tony lana toniga fuimu. Sa ia tuu atu i tagata uma e faaitaitai lana pulou. Sa aumai e le tama o Jessica se laumei mai le pāmanu.

“O lou avanoa, Anetelea,” sa fai mai ai Ms. Kimball.

Sa savavali atu Anetelea ma Papa i luma o le vasega. Sa manava loloa o ia ma fai atu, “O lo'u Papa e aveina se loli lapoa ma tiliva ai meai. E feiloai o ia i le toatele o tagata, ma e faigaluega malosi tele o ia.”

Sa tepa atu i luga Anetelea ma vaai atu o ataata mai Papa. Ona talanoa lea o Papa e uiga i le aveina o lana loli. Sa ia tuuina atu foi i tamaiti uma se meai mai lana galuega! Sa fai atu e tamaiti o le vasega a Anetelea le tele o fesili ia Papa e uiga i lana galuega.

Sa fiala lava Anetelea na faatasi atu Papa ma ia. O ia ma Papa ma Nana ma Eimi o se aiga—ma o i latou o se aiga lelei. ■

E nofo le tusitala i Iuta, ISA



Ua l'u Lava
[Ina Maua] se
Aiga e
Faavavau



Saunia e Jane McBride

E faavae i se tala moni

“O soo se mea e te faamaufaailogaina i luga o le lalolagi o le a faamaufaailogaina i le lagi” (Helamana 10: 7).

O le a le uiga o le ‘E Faavavau Aiga?’ Sa fesili ai Mia. Sa faaminoi atu lana maa o le taaloga i luga o le laupapa. Sa la taaalo ma lana uo mamae, o Zoey, i se taaloga i totonu o le potu malolo a Zoey. I luga o le pui-pui sa i ai se ata o loo faapea mai, “E Faavavau Aiga.” Sa fiafia Mia i lena faaupuga.

“O lona uiga e tusa lava pe a e oti, e avea pea outou ma se aiga,” sa faamalamalama atu ai e Zoey. Sa ia tuu i lalo se kata ae faaminoi lana maa o le taaloga.

Sa tilotilo solo Mia i le potu. Sa foliga masani lava. Sa i ai nofoa momi, laulau, aluga, ma se TV. Ae sa ese lagona sa i ai i le fale o Zoey mai lona lava fale. “E i ai sou aiga e faavavau?” Sa fesili atu ai Mia.

Sa autilo i luga Zoey mai le taaloga ma se ataata. “Ioe! Sa faaipopo lo’u tina ma lo’u tama i le malumalu. Ina ia mafai ona matou toe faatasi e faavavau.”

“Pe o le mafuaaga lena e ese ai lagona i le tou fale?” Sa fesili atu ai Mia.

Sa foliga le mautonu Zoey. “Ese?”

Sa lei iloa e Mia pe faapefea ona faamatala le lagona i totonu o le fale o Zoey. Sa fiafia ma mafanafana. Ae fai si faavalevaleyalea o lena tala. “E le afaina,” na ia fai mai ai. “Ta taaalo pea.”

I lena po sa le mafai ona taofi le mafaufau o Mia e uiga i le aiga e faavavau a Zoey. Sa fiafia o ia i le lagona i totonu o le fale o Zoey. I ni nai aso o le a malaga ese ai le aiga o Mia i Onataro, Kanata. Sa ia tomanatu pe faamata e faape’i lagona o le a i ai i lo latou fale fou.

“Mama, e lagona le fiafia tele i le fale o Zoey,” sa fai atu ai Mia a o faamoe o ia e Mama i lona moega. Ou te manao i lo tatou fale fou ia lagona foi faapela.” Sa mafaufau Mia e uiga i lona alofa tele ia Tina, Tama, ma ona tuagane laiti. “Ou te fia manao ia faavavau foi lo tatou aiga.”

Sa faalogo ma le filemu Tina. Ona ia fai mai lea, “E faapena foi a’u.”

O le aso na sosoo ai, sa valaau atu ai Tina i le tina o Zoey. Sa ia iloa ai e auai le aiga o Zoey i Le Ekalesia a Iesu Keriso o le Au Paia o Aso e Gata Ai.

“Ou te fia alu i lena lotu,” sa fai atu ai Mia i ona matua a o teu a latou ato. Sa toetoe lava a gaogao lo latou fale.

“Sa fai mai le tina o Zoey e mafai ona ia fesoasoani ia i tatou e sue se fale lotu,” sa fai mai ai Tama a o faamau se pusa.

Sa ataata Mia ma lagona se minoi i totonu o lona manava. Atonu e mafai ona lagona le mafanafana ma le fiafia o lo latou fale fou e pei o le fale o Zoey!

Ina ua latou faamautu i lo latou fale fou, sa amata loa ona o le aiga o Mia i le lotu. Sa lelei tele tagata iina. Sa ta’u e tagata uma le tasi ma le isi o “Uso” ma “Tuafafine.” Sa o Mia ma ona tuagane laiti i le Peraimeri. Sa fiafia o ia e usu pese ma faitau ia tusitusiga paia.

Sa le’i pine ae o mai ni tamaitai talavou se toalua i le fale o Mia. O o laua igoa o Sister Justin ma Sister Ramos, ma o i laua o ni faifeautalai.

Sa la ta’u atu i le aiga o Mia e uiga i le Tama Faalelagi, Iesu, ma le Tusi a Mamona. Sa fiafia Mia e faalogologo e uiga i le talalelei.

E oo lava i ona tuagane sa saofafai ma le filemu ma faalogo!

Sa ta’u atu e Mia ia Sister Justin ma Sister Ramos e uiga i le fale o Zoey. “Ou te manao i se aiga e faavavau e pei o le aiga o Zoey.”

“E finagalo le Tama Faalelagi ia i tatou uma ia i ai ni aiga e faavavau,” sa fai atu ai Sister Ramos ma se ataata tele. “E finagalo o ia ia tatou fiafia.”


Sa le’i pine ae filifili loa le aiga o Mia ina ia papatiso.

Sa malaga atu Zoey ma lona aiga i le taavale i Onetario mo le papatisoga. I le tausaga mulimuli ane, sa latou toe o mai foi. O lena la taimi ona ua faamauina ai Mia ma lona aiga i totonu o le malumalu!

O le aso o le faamauga, sa tu ai Mia i fafo o le malumalu faatasi ma lona aiga, sa laei papae. Sa latou ataata fiafia tele. Sa lagona e Mia le mafanafana ma le filemu i lona lotu. “Ua avea nei i matou o se aiga e faavavau!” sa ia fai mai ai ma le fiafia.

“E sa’o,” na fai mai ai Tama. “O i tatou o se aiga e faavavau.” ■

E alala le tusitala i Colorato, ISA.



O se Uo ma se Faifeautalai

Talofa!

O lo'u igoa o Juan Bautista, ma ou te sau mai Atenitina.

Ou te faasusulu atu lo'u malamalama e ala i le faasoaina atu o le talelele.



Uo Mamae

O a'u ma la'u uo mamae o Facundo na masani le tasi i le isi talu mai lo ma ta'i lima tausaga. Sa ma fiafia uma lava i le soka! Sa ou valaaulia o ia i le tele o gaoioiga a le Ekalesia.





O Le Fesili Muamua a Facundo


I le tasi taimi sa matou i ai faatasi ma Facundo i se 'aiga o le afaifi, sa ia fesili mai ai, "Aisea e tatalo ai le tou aiga i taimi uma?" Sa ou fai atu ona e faamanuiaina e le Tama Faalelagi i matou, ma o le auala lea matou te faafetai atu ai ia te Ia. Sa maofa o ia!



Afaifi Faaleaiga

Sa sau Facundo i se afaifi faaleaiga ina ua sauniuni lo'u uso o Peniamina mo le papatisoga. Sa lagona e Facundo le Agaga, ma sa ia fesili mai pe mafai ona papatisoina foi o ia! Ona talanoa lea o lo'u tama i matua o Facundo.

Sa aoaoina e faifeautalai le aiga o Facundo. Ona papatisoina uma lea o Facundo ma lona tuafafine o Augustine! E o mai ona matua i le lotu, ae e lei papatisoina lava i la'ua.



O Le Fesili Lona Lua a Facundo

Sa fesili Facundo i lo'u tina pe o le a tele sona iloa e uiga i le Atua e pei o a'u. Sa ataata [lo'u tina] ma fai atu ia te ia afai e suesue o ia i ana tusitusiga paia ma tatalo, e mafai ona ia iloa atili!



E MAFAI FAAPEFEA ONA E SUSULU ATU?


- Valaaulia se vo i se gaoioiga a le Ekalesia po o se afaifi faaleaiga.
- Avea ma se faataitaiga lelei o le agalelei ma le alofa.
- Tatalo mo se fesoasoani ma musumusuga.

AUINA MAI IA I MATOU SE FETU!



Sa talosagaina i tatou e lesu ia "pupula atu lo outou malamalama i luma o tagata" (Mataio 5:16). E faapefea ona e faapupula atu lou malamalama? Oti ese se fetu ma tusi ai sau tala i luga. Fai i se matua e imeli mai se ata o lau fetu, faatasi ma la latou faatagaga, i le liahona@ldschurch.org.

ATA NA PUENA E ALEJANDRO GUTIERREZ. ATA O LE PAPATISOGA MAI FAAALOLOGA A LE AIGA O FACUNDO.



“E i ai so’u faatuatua ma se molimau ia Iesu Keriso ma i Lana matafaioi i le avea ai ma o tatou Faaola ma Togiola.”

Saunia e Elder Gary E. Stevenson

O Le Korama a Aposetolo e Toasefululua


Mai le “A Gospel Perspective” (Brigham Young University–Hawaii devotional, Sept. 19, 2017), devotional.byuh.edu.

Kalapu Faitau

o le Tusi a
Mamona

AUAI MAI I LE FAITAUINA O LE TUSI A MAMONA!

E mafai ona e faitau na o oe, faatasi ma lou aiga, pe faatasi ma se uo. Ona auina mai lea ia i matou o sou ata o loo e faitauina le Tusi a Mamona ma ta'u mai ia i matou se mea ua e aoaoina po o sau tala e te fiafia i ai mai le Tusi a Mamona. Auina mai i le liahona.lds.org (kiliki le "Auina mai se Tusiga").



O le Mau o le Masina Lenei: Helamana 5:12

“Ia manatua, ia manatua lava e ao ina oulua atina ae lo oulua faavae i luga o le papa o lo tatou Togiola, o le Keriso lea, o le Alo o le Atua.”



O loo faitauina e lo'u aiga le Tusi a Mamona. O nisi taimi matou te faataitaia ai tala. O le mālie ia o lenei mea. Ou te aoaoina ni upu ma ni mea fou i aso taitasi. O le faia o nei mea ua fesoasoani ai ia te a'u ia tumau le taulaiga i le sauniga faamanatuga ma le Peraimerī. Ua fesoasoani foi ia te a'u e vavalalata ai ma lo'u aiga.

Amaron I., 7 tausaga, Phnom Penh, Cambodia



Ua ou fiafia lava e faitauina le Tusi a Mamona talu ona faailoa mai e faifeautalai ia i matou. O la'u tala ou te fiafia lava i ai i le tusi a Mosaea, o le taimi na taitai ai e le Tupu o Peniamina lona nuu e ala i lona faatuatua. Ou te manao ia faamaoni ma usitai i mea e faatonu a'u e o'u matua e fai.

Janice S., 10 tausaga, Iloilo, Filipaina

O LA TATOU ITULAU



"Ulvai Faaaliga," saunia e Alana L., 7 tausaga, Sao Paulo, Pasila



Marco Z., 9 tausaga, Lima, Peru



Ua ou fiafia lava ina ua papatisoina i le Ekalesia moni a Iesu Keriso. Ou te iloa o le Tusi a Mamona e moni ma ou te fiafia e faitauina i aso uma. Ua ia faia a'u e avea ma se uso matua e sili atu ona magafagafa mo o'u tei.

Andrei L., 10 tausaga, Iloilo, Filipaina



Harada K., 8 tausaga, Yokohama, Iapani

Sa Avea Ruta ma se Uo Faamaoni


Sa nofo se fafine e igoa ia Naomi faatasi ma Sona atalii e toalua ma o la taitoalua. Ina ua maliliu uma atalii, sa fai atu Naomi i taitoalua [o tama] ia la toefoi atu i o lava lava aiga. Ae o le tasi o avā nei, o Ruta, sa matua faamaoni lava. Sa ia filifili e nofo ma fesoasoani e tausī Naomi. Sa alu Ruta e ao mai saito mai se fanua na lata ane. Sa faalogo le pule o le fanua i le lelei tele o le tagata leni o Ruta. Sa agalelei atu o ia ia Ruta. Sa filifili loa Ruta e faaipoipo ia te ia. Sa tumau pea Ruta ma Naomi o ni uo lelei, ma sa fesoasoani Naomi e tausī le tama tama a Ruta. I ni tausaga mulimuli ane, sa soifua mai ai Iesu i le gafa leni o le aiga. O lona uiga o Ruta o se tasi o augatuaa o Iesu!

Faitau e uiga ia Ruta i le Ruta 1–4.



“Sa agalelei ma agalofa Ruta,” saunia e Kylee Q., 8 tausaga, Virginia, ISA

ATA NA TUSA E DILLEN MARSH



RUTA

Na filifili Ruta e avea ma se uo faamaoni, ma ou te mafaia foi!

- Tauloto le Ruta 1:16.
- Ina ia faamaoni o lona uiga ia lagolago se tagata e tusa lava pe faigata. Tusi i lau apitalaaga e uiga i se taimi na faamaoni mai ai se tagata ia te oe.
- Faia se uo fou i leni vaiaso. Aooo ni mea mālie se tolu e uiga ia i latou!
- E mafai ona avea a’u ma se uo lelei e ala i le ...

Hana ma Samuelu

Saunia e Kim Webb Reid

Sa lagona e Hana le faanoanoa tele i le le maua o sana tama. Sa ia tatalo i totonu o le malumalu. Sa Ia folafola atu afai e maua sana tama tama, o le a ia tausi a'e e auaua i le Atua.



Sa maua e Hana ma lona toalua se pepe! Sa faaigoa e Hana ia Samuelu. Sa ia iloa ua tali mai le Atua i ana tatalo.



A o tuputupu ae Samuelu, sa tausisia lava e Hana lana folafolaga. Sa ia talosagaina Eli, le ositaulaga i le malumalu, e aoao ia Samuelu i le auala e auauna atu ai i le Atua. Sa fesoasoani Eli e tausi Samuelu.

I se tasi po a o moe Samuelu, sa ia faalogo i se siufofoga. Sa ia fesili atu pe na valaauina o ia e Eli. Sa fai atu Eli o le Atua sa taumafai e fetalai atu ia Samuelu. O le taimi na sosoo ai na faalogo atu ai Samuelu i le siufofoga, sa ia faalogo. Ona fetalai mai lea o le Atua ia Samuelu. Sa faalogo Samuelu i le Atua ma mulimuli ia te Ia.





E mafai ona ou aoao e uiga i le Atua ma mulimuli i Ana poloaiga! ■

Mai le 1 Samuelu 1-3.

E Mafai Ona Ou Faasoa atu i Isi





Saunia e Peresitene
Ezra Taft Benson
(1899–1994)

AUMAI E LE TUSI A MAMONA LE ANOANOAI O FAAMANUIAGA

O loo i ai se mana i le tusi o le a amata ona tafe mai i o outou olaga i le taimi tou te amatalia ai se suesuega faamaoni o le tusi.

Pe le o i ai ea se mea i le taele o o tatou loto o loo faananau atu ia latalata atili i le Atua, ia avea atili e faapei o Ia i a tatou savaliga i aso taitasi, ia lagonaina Lona faatasi mai i taimi uma ia i tatou? Afai o lea, o le Tusi a Mamona la, o le a fesoasoani sili atu ia i tatou [ia latalata atili atu i le Atua] i lo se isi lava tusi.

Ua le na o le faapea ua aoao mai e le Tusi a Mamona ia i tatou upu moni, e ui o le mea moni lena na te faia. E le na o le faapea ua molimau mai e le Tusi a Mamona ia i tatou Keriso, e ui ina tonu lena mea. Ae e i ai se mea e sili atu. O loo i ai se mana i le tusi o le a amata ona tafe mai i o outou olaga i le taimi tou te amata ai ona faitau ma suesue ma le loto i ai i le tusi. O le a outou maua ai le malosi sili atu e tetee atu ai i faaososoga. O le a



outou maua ai le mana e aloese ai mai mea tau faasese. O le a outou maua ai le mana e tumau ai i le ala lauitiiti ma le vaapiapi. O tusitusiga paia ua ta'ua o “afioga o le ola” (MF&F 84:85), ma e leai se isi mea e sili atu ai ona moni lena faaupuga nai lo o le Tusi a Mamona. A amata loa ona e matelaina ma galala i le fia maua o na afioga, o le a e mauaina le ola i se faatelega sili atu naua o faamanuiaga. . . .

O nei folafolaga—alofa ma le lotogatasi faateleina i le aiga, ava ma le faaaloalo i le va o matua ma fanau, faaleagaga ma le amiotonu faateleina—e le o ni folafolaga fai fua, ae o le uiga tonu lava lea o le saunoaga

a le Perofeta o Iosefa Samita ina ua ia saunoa o le a fesoasoani le Tusi a Mamona e faalatalata atili atu i tatou i le Atua. . . .

Ua silia ma le 10 tausaga talu ai na ou faia ai le faaupuga lenei e uiga i le Tusi a Mamona:

“Pe o faalagolago ea taunuuga e faavavau i lo tatou tali atu e uiga i lenei tusi? Ioe, a lē o lo tatou faamanuiaga ia po o lo tatou ta’usalaga.

“O tagata uma o le Au Paia o Aso e Gata Ai, e tatau ona avea le suesueina o lenei tusi o se galuega faifaipea o le olaga. A leai o loo ia tuuina lona lava agaga i le tulaga lamatia ma teenaina le mea lena e mafai ona maua ai e lona olaga atoa le lotogatasi faaleagaga ma faaleatamai. O loo i ai se eseesega i le va o se tagata liliu mai o loo atiae i luga o le papa o Keriso e ala i le Tusi a Mamona ma piimau pea i lena āi uamea, ma le tagata e le o faia faapea.”


. . . Aua tatou te tumau i lalo o le ta’usalaga . . . e ala i lo tatou manatu mama i lenei meaalofa silisili ma ofoofogia ua tuuina mai e le Alii ia i tatou. Ae ia tatou maua folafolaga e fesootai ma le faatauaina [o le tusi] i o tatou loto. ■

Mai le “O Le Tusi a Mamona—O Le Maa ‘Au’au o La Tatou Tapuaiga,” Liahona, Ian. 1987, 6–7.



**AGAI I SISIFO,
SAUNIA E DAVID MEIKLE**

Mai le 1856 e oo atu i le 1860, e 10 kamupani o taavale tosolima na aofia ai le 3,000 tagata o le Au Paia o Aso e Gata Ai na masii ese atu mai Egelani, Uelese, Sikotilani, ma Sikanitiniava sa savalia le 1,300 maila (2,090 km) ia auai faatasi ma isi Au Paia i Siona. O nei paionia na tosoina mea uma na latou umiaina ma asaina laufanua valevalenoa o Amerika i taavale tosolima laupapa e ta'i 3' x 5' (1 x 1.5 m) le tetele.



AUTALAVOU MATUTUA

**LAGONAINA LE
MOTUSIA ESE?**

O loo tatou ola i se taimi o mea faalavefau i le olaga ma le le fia faatalitali i se mea. Ae ina ia fesootai moni lava ma le Atua, e manaomia ona tatou faatelegese ma ia filemu.

48

AUTALAVOU

**O E TAUIVI MA SE
FESILI FAIGATA?
O LE FESOASOANI
LENEI.**

50

SAUNIGA FAAMANATUGA

**7 MOTUGĀ'AFU
MO LE TUUINA
ATU O SE LAUGA**

56

TAMAITI

**AUAI MAI I LE
MATOU KALAPU
FAITAU O LE TUSI
A MAMONA!**

73

O LE EKALLESIA A
IESU KERISO
O LE AU PAIA O ASO
E GATA AI



4

4